




## **МАЛЫЙ ТРЕБНИК**



**Светлой памяти о. Евгения Амбарцумова  
посвящается.**

**Санкт-Петербург, 2005г.**

## Содержание

1. На всякое прошение.....	6
2. О болящих.....	8
3. Благодарение.....	11
4. О путешествующих.....	14
5. О заключенных.....	15
6. О учащихся.....	17
7. На начало дела.....	19
8. Молитва ко Пресвятей Троице.....	22
9. Кресту.....	23
10. Молитвы Богородице:.....	24
Благодарственная.....	24
От преп. Серафима Саровского.....	25
Целительнице.....	25
Иверской.....	27
Коневской.....	28
Казанской.....	30
Владимирской.....	32
Взысканию погибших и Всех скорбящих радости.....	35
Неупиваемой чаше.....	36
Скоропослушнице.....	39
Утоли моя печали.....	41
Знамению.....	42
Нечаянной Радости.....	44
Тихвинской.....	48
Троеручице.....	50
Покрову Пресвятой Богородицы.....	53

11. Святым ангелам.....	54
12. Каждому святому.....	55
13. Святителю.....	56
14. Преподобному.....	58
15. Мученику.....	60
16. Мученице.....	61
17. Всем святым.....	62
18. Молитва любимому святому.....	63
19. Молитвы святым:.....	64
Арсению Коневскому, преп.....	64
Артемию Веркольскому, прав.....	65
Александру Невскому, благ. кн.....	66
Александру Свирскому, преп.....	68
Александре, цар.....	69
Алексию Московскому, свят.....	70
Алексию человеку Божию.....	72
Амвросию Оптинскому, преп.....	73
Андрею, архиепископу Критскому, свят.....	75
Андрею Первозванному, ап.....	76
Андрею Рублеву, преп.....	78
Симеону Богоприимцу и Анне пророчице.....	80
Антипе, епископу Пергамскому, священномуч.....	82
Борису и Глебу, страстотерп.....	83
Варлааму Хутынскому, преп.....	85
Варваре, великомуч.....	86
Василию Великому, свят.....	87
Василию Новому, преп.....	88
Вонифатию, муч.....	90
Владимиру, равноап.....	92

Владимиру Московскому, муч.....	95
Вячеславу Чешскому, благ. кн.....	95
Вере, Надежде и Любви, и матери их Софии, мучч....	97
Гурию, Самону и Авиву, мучч.....	98
Георгию Победоносцу, великомуч.....	99
Герману Аляскинскому, преп.....	100
Сергию и Герману Валаамским, препп.....	102
Молитва преподобному Давиду Гареджийскому.....	102
Давиду, Псалмопевцу.....	103
Даниилу Московскому, благ. кн.....	104
Димитрию Донскому, благ. кн.....	106
Димитрию Ростовскому, свят.....	107
Димитрию Солунскому, великомуч.....	108
Екатерине, великомуч.....	109
Елисавете, препод-муч.....	111
Игнатию Богоносцу, священномуч.....	113
Игнатию Брянчанинову, свят.....	114
Илии пророку.....	116
Иоакиму и Анне, богоотцам.....	117
Иоанну Богослову, ап. и ев.....	119
Иоанну Воину.....	121
Иоанну Златоустому, свят.....	122
Иоанну Предтече.....	124
Иоанну Кронштадтскому, прав.....	125
Мефодию и Кириллу, святт.....	128
Константину и Елене, равноапп.....	130
Ксении Петербургской, блаж.....	132
Луке, ап. и ев.....	134
Моисею Мурину, преп.....	136

Николаю, свят.....	137
Нине, равноап.....	141
Ольге, равноап.....	142
Пантелеимону, великомуч.....	145
Параскеве Пятнице, муч.....	149
Петру и Павлу, апп.....	151
Серафиму Вырецкому, преп.....	153
Серафиму Саровскому, преп.....	155
Сергию Радонежскому, преп.....	156
Феодосию Черниговскому, свят.....	160
20. Тропари и величания общие.....	160
21. Тропари, кондаки и величания.....	174
Дванадесытым праздникам.....	174
22. На погребении.....	184
Погребение младенцев.....	190
Последование погребения.....	193
Чин исповеди.....	195
Молитвы жене.....	196
Молитвы жене на 40 день.....	198
23. Пасхальный канон и стихиры Пасхи.....	200
24. Евангелия общие.....	211
Чин освящения автомобиля.....	214
Дополнение.....	227
Владимиру Московскому, мученику.....	227
Елисавете, препод-муч.....	227
Петру и Павлу, апостолам.....	229
Молитва новомученикам Российским.....	231

### **1. На всякое прошение**

Еще молимся Тебе Господу Богу нашему, еже услышатися гласу моления нашего, и молитве: и помиловати рабов Твоих /имена/, благодатию и щедротами Твоими, и исполнити вся прошения их, и простити им вся прегрешения вольная и невольная, благоприятным же быти мольбам, и милостыням их пред Престолом Владычествия Твоего, и покрыти их от всех враг видимых и невидимых, от всякия напасти, беды и скорби, и недугов избавити и подати здравие с долгоденствием. Рцем вси, Господи услыши и помилуй.

Призри Владыко Человеколюбче милостивым Ти оком на раба Твоего /имя/, и услыши моления наша с верою приносимья, яко Сам рекл еси: вся елико молящяся просити, веруйте, яко приимете, и будет вам, и паки: просите и дастся вам: сего же ради и мы аще и недостойнии, уповающе на милость Твою, просим: подаждь благодать рабу Твоему /имя/ и исполни благая желания его: мирно же и тихо в здравии, и долгоденствии вся дни

его соблюди: рцем вси, скоро услыши и милостивно помилуй.

Еше молимся Господу Богу нашему, о еже призрети на стенания, слезы и вопль людей Своих, и видев озлобления, нищету и смирение наше милостиву быти и отвратити от нас весь гнев Свой праведно движимый на ны, и помиловати нас.

О еже не помянути беззакония и соблазнов нас грешных и недостойных рабов Своих, но милостивно очистити грехи наша, и отвратити гнев Свой праведно движимый на ны, Господу помолимся.

Согрешихом и беззаконовахом, и сего ради праведный Твой гнев постиже нас, Господи Боже наш, и сень смертная обыде нас, и ко адовым вратам приближихомся, но к тебе Богу нашему в болезни нашей умильно вопием: пощади, пощади Твоя и не погуби до конца, смиренно молим Тис я, услыши и помилуй.

**Ев.: Еф 5:9-21 Мф 7:7-11 или Мк 11:23-26  
или Лк 18:2-8**

**Молитва Господу Иисусу Христу**

Господи Святыи, в вышних живый и на смиренныя призираяй, и всевидящим оком Твоим призираяй на всю тварь! Тебе приклонением колен душ и телес наших молимся Тебе: прости десницу Твою невидимую от святого жилища Твоего и благослови люди Твоя Тебе молящиеся и от Тебе великия и богатыя милости ожидающия, и яко благ и человеколюбец, дела рук наших исправи, даруя нам мирная и премирная благая Твоя, и помилуй рабов Твоих /имена/, Яко Твое есть еже миловати и спасати нас, и Тебе славу воссылаем, со Безначальным Твоим Отцем и Животворящим Твоим Духом ныне и присно, и во веки веков. Аминь.

**2. О болящих**

**Тропарь, гл.4**

Скорый в заступлении Един сый Христе, скорое свыше покажи посещение страждущим рабом Твоим. И избави от недугов и горьких бо-



лезней, и воздвигни во еже пети Тя, и славити непрестанно, молитвами Богородицы едине Человеколюбче.

Врачу душ и телес, со умилением в сердце сокрушенном к Тебе припадаем, и стеляще вопием Ти: исцели болезни, уврачуй страсти душ и телес рабов Твоих /имена/: и прости им, яко благосерд, вся прегрешения, вольная же и не вольная, и скоро воздвигни от одра болезни, молим Тис я услыши и помилуй.

Не хотяй смерти грешных, но еже обратитися и живым быти, пощади и помилуй рабов Твоих /имена/, Милостиве, запрети болезни, остави всю страсть, и весь недуг, уголи зиму и огонь, и прости крепкую Твою руку, и якоже Иаирову дочь от одра болезни воздвигни, и здравых /здрава/ сотвори, молим Тис я услыши и помилуй.

Огненную болезнь Петровой тещи прикосновением Твоим исцеливый, и ныне люте страждущих рабов Твоих /имена/ болезнь благосердием Твоим исцели, здравие им скоро пода-

вая, прилежно молим Тис я Источниче цельбам, услыши и помилуй.

**Ев.: Мф 8:28-34; или 17:14-18; или Мк 5:1-20**  
**или Мк 9:17-31 или Лк 9:37-43**

Молитва о болящих

Владыко Вседержителю, Святый Царю, наказуй и не умерщвляй, утверждая ниспадающия и возводя низверженныя, телесныя человеков скорби справляй, молимся Тебе, Боже наш, рабов Твоих (имя рек), немоществующих посети милостию Твоею, прости им всякое согрешение вольное и невольное. Ей, Господи, лечебную Твою силу с небесе ниспосли, прикоснися телеси, угаси огневицу, укроти страсть и всякую немощь таящуюся; буди врач рабов Твоих (имя рек), воздвигни их от одра болезненного и от ложа озлобления целых и всесовершенных, даруй их Церкви Твоей благоугождающих и творящих волю Твою. Твое бо есть, еже миловати и спасати ны, Боже наш, и Тебе славу возсылаем, Отцу и Сыну и Святому Духу, ныне и присно, и во веки веков. Аминь.

### **3. Благодарение**

#### Тропарь, глас 4

Благодарни суще недостойнии раби Твои Господи,/ О Твоих великих благодеяниях на нас бывших,/ славяще Тя хвалим, благославим, благодарим, поем, и величаем Твое благоутробие,/ и рабски любовию вопием Ти:/ благодетелю Спасе наш: слава Тебе.

**Прокимен:** Воспою Господеви благодеявшему мне и пою имени Господа вышняго.

**Стих:** Возрадуется сердце мое о спасении Твоем.

#### Ев.: Лк. 85 зачало

О еже избавити Церковь Свою святую и рабы Своя /имена/ и всех нас от всякия скорби, беды, гнева, и нужды, и от всех врагов видимых и невидимых: здравием же, долгоденствием, и миром, и ангел Своих ополчением верных Своих всегда оградити, Господу помолимся.

Благодаряще со страхом и трепетом, яко раби непотребнии Твоему благоутробию, Спасе и Владыко наш Господи, о Твоих благодеяниях, яже изливал еси изобильно на рабех Твоих, припадаем, и славословие Тебе яко Богу приносим, и умиленно вопием: избави от всех бед рабы твоя /имена/, и всегда яко милостив исполни во благих желания всех нас, прилежно молим Ти ся, услыши и помилуй.

Якоже ныне милостивно услышал еси молитвы рабов Твоих /имена/, Госоподи, и явил еси на них благоутробию человеколюбия Твоего, сице и в предняя не презирая, исполни в славу Твою вся благая хотения верных Твоих и яви всем нам богатую милость Твою, вся нам согрешения презирая, молимся Ти, услыши и помилуй.

#### Молитва благодарственная

Господи Иисусе Христе, Боже наш, Боже всяческаго милосердия и щедрот, Егоже милость безмерна и человеколюбие неизследимая пучина! Ко Твоему величеству припадающе, со стра-

хом и трепетом, яко раби недостойнии, благодарение Твоему благоутробию о Твоих благодеяниях, на рабех Твоих бывших, ныне смиренно приносяще, яко Господа, Владыку и Благодетеля, славим, хвалим, поем и величаем и, припадающе, паки благодарим, Твое безмерное и неизреченное милосердие смиренно моляще. Да якоже ныне моления рабов твоих прияти и милостивно исполнити сподобил еси, и во предняя в Твоей и искренняго любви и во всех добродетелях преуспевающих Твоя благодеяния всех верных Твоих получитьи, Церковь Твою Святую и град сей, от всякого злаго обстояния избавляя и мир и безмятежие тем даруя, Тебе со Безначальным Твоим Отцем, и Пресвятым, и Благим, и Единосущным Твоим Духом во Единем Существовании славному Богу, всегда благодарение приносить и преблагая глаголати и воспети сподобиши: Слава Тебе, Богу, Благодетелю нашему, во веки веков. Аминь.

#### **4. О путешествующих**

Тропарь, глас 2

Путь и истина сый Христе / Ангела Твоего рабом Твои, ныне якоже Товии иногда, послы сохраняюща,/ и невредимых к славе Своей, от всякого зла во всяком благополучии соблюдающа:/ молитвами Богородицы, Едине Человеколюбче.

Ап.: Деян., гл.8, зач.20Ев.:Ин.гл.14,зач 17

О еже безбедное и мирное путешествие, и благополучное возвращение в здравии, и всяком благочестии подати им, Господу помолимся.

Луце и Клеопе во Эммаус спутешествовавый, и весело во Иерусалим возвратитися Твоим преславным познанием сотворивый, спутешествуй Твоею благодатию, и божественным благословением и ныне рабом Твоим сим /имена/ нами Тебе прилежно молящимся, и во всяком деле блазе, к славе пресвятаго Твоего имени благопоспешы, во здравии и благополучии, яко всещедрому Благодетелю, молим Ти ся, скоро услыши и милостивно помилуй.

Исааку и Товии ангела спутника посламый, и тем путешествие и возвращение их мирное и

благополучное сотворивый, и ныне Преплаже, ангела мирна рабом Твоим /имена/ нами Тебе молящимся пошли, во еже наставити их на всякое дело благое, и избавити от враг видимых и не видимых, и от всякого злаго обстояния здраво же, мирно и благополучно к славе Твоей возвратитися усердно молим Ти ся, услыши и помилуй.

**Священник кропит путешествующих святой водой, говоря:** *Да благословит вас Господь от Сиона, и узрите благая Иерусалима во вся дни живота вашего, и да исправит путь ваш в мире, в славу святого Своего имени. Аминь*

## **5. О заключенных**

### Тропарь, глас 2

Манассию от уз и горькаго заточения молитв ради свободивый, всещедрый Боже, и раба Твоего, нами ныне молящагося, от уз и заточения свободы, и от всякаго злаго обстояния избави, яко един Человеколюбец.

### Кондак, глас 5

Яко милосердия источник и благодати пучина, Христе Боже, не презри в скорбех и бедах Тебе

верою призывающих, но яко щедр, помилуй и от уз скоро свободи, да поем Ти: Аллилуиа.

Ев.: Иоан.8,21-32 (заचало 30)

О еже, якоже иногда прилежную Церкви Своя о Петре молитву, и нашу милостивно услышати, и от уз свободити рабов Своих /имена/, Госоподу помолимся.

Иосифа в темнице иногда в Египте заключенного преславно свободивый, и ныне нами Тебе призывающая /призывающего/ от уз и горькия беды избави, молим Ти ся,

Избавителю милостивый, услыши и скоро помилуй.

#### Молитва ко Господу

Господи Иисусе Христе, Боже наш, святаго апостола Твоего Петра от уз и темницы без всякаго вреда свободивый, приими, смиренно молимтися, моление сие милостивно во оставление грехов раба Твоего (имя), в темницу всаженнаго, и молитвами того, яко Человеколюбец, все-



сильною Твоею Десницею от всякаго злаго обстояния избави и на свободу изведи.

## 6. О учащихя

### Тропари:

Яко посреде учеников Твоих, пришел еси, Спасе, мир дая им, прииди к нам и спаси нас. Безкнижнныя ученики Дух Твой Святыи наказатели яви, Христе Боже, и многовещанным сльчим языков прелесть упраздни, яко всесилен".

На "Славу" - тропарь Пятидесятницы: **"Благословен еси, Христе Боже наш..."**.

На "И ныне" - Богородичен: **"Предстательство христиан непостыдное..."**

Затем Апостол (к Ефесеям, зачало 218-е) и Евангелие (от Марка, зачало 44-е) с обычными молитвословиями.

Перед Апостолом - прокимен: **"Из уст младенец и ссущих совершил еси хвалу"** со стихом: **"Возрадуется сердце мое о спасении Твоем"**.

Еще молимся Господу Богу нашему, о еже призрети милостивно на отроков сих, и низпослати в сердца, во ум и во уста их духа премудрости, разума же и благочестия и страха Своего, и просветити их светом Своего благоразумия, и подати им силу и крепость, во еже скоро прияти, и спешно навикнути Божествеинаго закона Его наказанию, и всему благому и полезному учению; еже преуспевати им премудростию и разумом, и всеми благими делы в славу Пресвятаго Его Имени, и даровати им здравие, и долголетны их сотворити к созиданию и славе Церкви Своея, рцем вси: Господи, услыши и милостивно помилуй.

#### Молитва

Господи Боже и Создателю наш, образом Своим почтй нас человеки, научивый избранныя Твоя, яво дивитися внемлющым учению Твоему, открывый премудрость младенцем; иже Соломона и всех взыскующих премудрости Твоей научивый, отверзи сердца, умы и уста рабов Твоих сих, во еже прияти силу закона Твоего, и со успехом познати преподаемая им

полезная учения, в славу Пресвятаго Имене Твоего, в пользу и созидание Святей Твоей Церкви, и разумети благу и совершенную волю Твою. Избави их от всякаго налога вражия, соблюди их в Православии и вере, и во всяком благочестии и чистоте во вся дни живота их, да преуспеют в разуме и во исполнении заповедей Твоих; да тако предуготовани прославляют Пресвятое Имя Твое, и будут наследницы Царствия Твоего. Яко Ты еси Бог силен в милости, и благ в крепости, и Тебе подобает всякая слава, честь и поклонение, Отцу, и Сыну, и Святому Духу, всегда, ныне и присно, и во веки веков, аминь.

### **7. На начало дела**

Тропарь, глас 4:

Союзом любви апостолы Твоя связавый, Христе,/ и нас Твоих верных рабов к Себе тем крепко связав, твори заповеди Твоя, и друг друга любити нелицемерно сотвори,/ Молитвами Богородицы, Едине Человеколюбче.

**На всякое прошение: Еф 5:9-21 Мф 7:7-11  
или Мк 11:23-26 или Лк 18:2-8**

Призри Человеколюбче, милостивным Твоим оком на рабы Твоя /имена/ к Твоему благоутробию верою припадающия /припадающего/ и услышав моление их, благое намерение, и дело их, благослови, и благополучно начати, и спешно, кроме всякаго препятия и славу Твою совершити, яко всеильному Царю, молим Ти ся, услыши и помилуй.

Ангела Твоего хранителя пристави делу сему, благоуветливе Господи, и еже запретити вся препятия видимых и невидимых врагов, поспешство же во всем ко благополучному завершению желающим сотворити, молим Ти ся, преблагий Спасе, услыши и помилуй.

О еже всеяти, и вскоренити благодатию Пресвятаго Своего Духа новую Своего нового завета заповедь, еже любити друг друга, и не себе угождати, но яже к славе Его, и созиданию искреннего всегда искати, Господу помолимся.

О еже поревновати нам древних христиан к Богу и к искреннему горящей любви, и наследником, и приемником тех быти, не образом точию, но детельною истиною, силою, действием и благодатию Пресвятаго Духа, Господу помолимся.

Заповедь новую Твоим учеником, еже любити друг друга давай, Владыко, обнови сию благодатию Пресвятаго Твоего Духа действительно в душах, и в сердцах наших, да николиже о своих си, но всегда о Твоем благоугодии, и искреннего спасении и и пользе попечение творити потщимся, молим Ти ся, благодателю милостивый, услыши и милостивно помилуй.

Молитвы пред началом всякого дела

Царю Небесный:

Благослови, Господи, и помоги рабом твоим / имена/ совершить начинаемое ими дело во славу Твою. Господи, Иисусе Христе, Сыне Единородный Безначальнаго Твоего Отца, Ты бо рекл еси пречистыми усты Твоими: яко без Мене не можете творити ничесоже. Господи наш,

Господи, верую объем в душах наших и сердцах Тобою реченная, припадаем благости Твоей: помози нам, грешному, сие дело, нами начинаемое, о Тебе Самом совершити, во имя Отца и Сына и Святаго Духа, молитвами Богородицы и всех Твоих святых. Аминь.

### **8. Молитва ко Пресвятей Троице**

Пресвятая Троице, Единосуцная Державо, всех благих вина, что воздадим Тебе за вся, яже воздала еси нам, грешным и недостойным, прежде, неже на свет произыдохом, за вся, яже воздаеши коемуждо нас по вся дни и яже уготовала еси всем нам в веце грядущем? Подобаше убо за толикия благодеяния и щедроты благодарити Тя не словесы точию, но паче дела, храняще и исполняюще заповеди Твоя: мы же, страстем нашим и злым обычаем внемше, в безчисленные от юности низвергохомся грехи и беззакония. Сего ради, яко нечистым и оскверненным, не точию пред трисветлое лице Твое безстыдно явитися, но ниже имене Твоего пресвятаго изрещи довлеяше нам, аще бы не Ты Сама благоизволила, во отраду нашу, возвестити, яко чистыя и праведныя

любящи, грешники кающияся милуеши и благоутробне приемлеши. Призри убо, о Пребожественная Троице, с высоты святяя славы Твоея на нас многогрешных и благое произволение наше вместо благих дел приими: и подаждь нам духа истиннаго покаяния, да возненавидевше всякий грех, в чистоте и правде до конца дней наших проживем, творяще пресвятую волю Твою и славяще чистыми помыслы и благими деяньми сладчайшее и великолепное имя Твое. Аминь.

### 9. Кресту

Да воскреснет Бог, и расточатся врази Его, и да бежат от лица Его ненавидящии Его.

Яко исчезает дым, да исчезнут; яко тает воск от лица огня,

так да погибнут беси от лица любящих Бога и знаменующихся крестным знамением,

и в веселии глаголющих: радуйся, Пречестный и Животворящий Кресте Господень,

прогоняяй бесы силою на тебе пропятаго Господа нашего Иисуса Христа,

во ад сшедшаго и поправшаго силу диаволу,

и даровавшего нам тебе Крест Свой Честный на прогнание всякаго супостата.

О, Пречестный и Животворящий Кресте Господень!

Помогай ми со Святою Госпожею Девою Богородицею и со всеми святыми во веки.

Аминь.

### **10. Молитвы Богородице:**

#### **Благодарственная**

Что Ти принесем, или что Ти воздадим, о премилостивая Госпоже Владычице, Заступнице рода христианского, за вся Твоя неисчетныя благодеяния, яже присно являеши всем призывающим имя Твое и Твоя помощи просящим; кто бо притекаяй к Тебе посрамлен и не услышан от Тебе отходит, о премилосердая Мати; Вем, Пречистая, яко, за множество грехов и беззаконий наших, несмы достойны ниже имя Твое пресладкое нареци, не точию песнопения от оскверненных устен Тебе приносить, и удобнее есть нам молчание любить. Но не явимся не памятливы и неблагодарни пред Тобою, дерзаем приностити Тебе сие коленопреклоненное славословие: Ты



же, Премилосердая Мати, не возгнушайся прияти е, яко от избытка любящих Тя сердец возносимое.

Сама Ты, Владычице, благодатию Твоею коснися сердец наших, да яко воск растаявша пролиются пред Тобою молитвы наша в слезных благодарениях и славословиях, благодарим Тя, Всепетая: не таим благодеяний Твоих, но велегласно возвещаем, да вси слышащии притекают к Тебе, единой непостыдней Заступнице рода христианского, и да немолчно славословим Тя, Всепетую, во веки веков. Аминь.

**От преп. Серафима Саровского**

Всемиловитая Владычице Моя Пресвятая Госпоже Всепречистая Дево Богородице Марие Мати Божия, несумненная и единственная моя Надежда! Не гнушайся меня, не отвергай меня, не остави меня. Заступись, попроси, услыши – виждь, Госпоже, помози, прости, прости, Пречистая.

**Целительнице**  
Тропарь, глас 4

Яко Пресветлая Звезда, просия Божественными чудесы святыи Твой образ “Целительнице”, подаждь убо и нам, Богородице Марие, исцеление недугов душевных и телесных, спасение и велию милость.

#### Молитва

Приими, о Всеблагословенная и Всемошная Госпоже Владычице Богородице Дево, сия молитвы, со слезами Тебе приносимыя от нас, недостойных раб Твоих, ко Твоему цельбоносному образу пение возсылающих со умилением, яко Тебе Самой зде сущей и внимлющей молению нашему. По коемуждо бо прошению исполнение твориши, скорби облегчаеши, немощным здравие даруеши, расслабленныя и недужныя исцеляеши, от бесных бесы прогоняеши, обидимыя от бед избавлявши, прокаженныя очищаеши и малыя дети милуеши: еще же, Госпоже Владычице Богородице, от уз и темниц свобождаеши и всякия многоразличныя страсти врачуеши: вся бо суть возможна ходатайством Твоим к Сыну Твоему, Христу Богу нашему. О Всепетая Мати, Пресвятая Богородице! Не пре-

стай молитися о нас, недостойных рабех Твоих, славящих Тя и почитающих Тя, и поклоняющихся со умилением Пречистому образу Твоему, и надежду имущих невозвратну и веру несумненну к Тебе, Приснодеве Преславней и Непорочней, ныне и присно и во веки веков Аминь.

### **Иверской**

#### Тропарь, глас 4

От святых иконы Твоя, о Владычице Богородице, исцеления и цельбы подаются обильно с верою и любовию приходящим к ней: тако и мою немощь посети, и душу мою помилуй, Благая, и тело исцели благодатию Твоею, Пречистая.

#### Кондак, глас 8

Аще и в море ввержена бысть святая икона Твоя, Богородице, от вдовицы не могущия спасти сию от врагов, но явилася еси хранительница Афона и вратарница обители Иверския, враги устрашающая и в православной Российской стране чтущия Тя от всех бед и напастей избавляющая.

### Молитва

О Пресвятая Госпоже Владычице Богородице, прими недостойную молитву нашу, и сохрани нас от навета злых человек и от напрасныя смерти, и даруй нам прежде конца покаяние, на моление наше умилосердися, и радость в печали место даруй. И избави нас, Госпоже, от всякия беды и напасти, скорби и печали и от всякаго зла. И сподоби нас, грешных рабов Твоих, одесную стати во втором пришествии Сына Твоего, Христа Бога нашего, и наследники нас быти сподоби Царствия Небеснаго и жизни вечныя, со всеми святыми в бесконечные веки веков. Аминь.

### **Коневской**

#### Тропарь, глас 1

Возсия нам, яко солнце светозарное от востока в велелепии, Твоя, Владычице, икона, озаряющи чудес сиянием преславно всех, выну приходящих к ней с верою и любовию и молящихся усердно Твоему, еже о Сыне Твоем и Бозе, величию. Слава Богу, Арсением сию давшему нам, слава воз-

вратившему от Новаграда, слава Действующему тою всем исцеления.

#### Молитва

О Всемиловитая Госпоже Дево Богородице! Вонми смиренному молению моему и сокрушенно ныне предстоящаго образу Твоему услыши глас. Вем бо, о Содетеля моего Мати, яко Ты предстательство христиан непостыдное и ходатайство ко Творцу непреложное. Вем и сие, яко беззакония моя превзыдоша главу мою и, яко бремя тяжкое, отяготеша на мне, и уже несмь достоин видети высоту Небесную, ниже воззрети ко Престолу славы Сына Твоего и Бога нашего, но достоин мук и вечнаго осуждения. Сего ради к Тебе (со Предстоящим купно) припадаю, Тя прошу умиленно, к Тебе со слезами взываю: сотвори к Нему Матернее Твое моление, да не отвержет нас, грешных, от лица Своего, но, яко Милостив, да простит нам согрешения наша вольная и невольная, на путь спасения наставляя нас и свыше силою укрепляя к Творению заповедей Своих святых. Да сохранит нас от соблазнов мира, от вожделений греховных, от козней диа-

вольских и от нападения видимых врагов. Да благословит дела рук наших, подавая обители сей и всякому граду и стране обилие благ земных, да сотворит нам дни благи и безмятежны, да оградит миром Церковь Свою Святую и разстоящая да соединит той, яко Благ Господь, Долготерпелив и Многомилостив, от всея твари со Отцем и Святым Духом славимый во веки веков. Аминь.

**Казанской**

Тропарь, глас 4

Заступнице усердная, Мати Господа Вышняго, за всех молиши Сына Твоего, Христа Бога нашего, и всем твориши спастися, в державный Твой покров прибегающих. Всех нас заступи, о Госпоже Царице и Владычице, иже в напастех и скорбех и в болезнях, обремененных грехи многими, предстоящих и молящихся Тебе умиленною душею и сокрушенным сердцем пред пречистым Твоим образом со слезами, и невозвратно надежду имущих на Тя, избавления всех зол, всем полезная даруй и вся спаси, Богороди-

це Дево: Ты бо еси Божественный покров рабом Твоим.

Кондак, глас 8

Притецем, людие, к тихому сему и доброму пристанищу, скорой Помощнице, готовому и теплomu спасению, покрову Девы: ускорим на молитву и потщимся на покаяние: источает бо нам неоскудныя милости Пречистая Богородица, предваряет на помощь и избавляет от великих бед и зол благонравныя и богобоящияся рабы Своя.

Молитва

О Пресвятая Госпоже Владычице Богородице! Со страхом, верою и любовью припадающе пред честною иконою Твоею, молим Тя: не отврати лица Твоего от прибегающих к Тебе, умоли милосердая Мати, Сына Твоего и Бога нашего, Господа Иисуса Христа, да сохранит мирну страну нашу, Церковь Свою Святую да незыблему соблюдет от неверия, ересей и раскола. Не имамы бо иныя помощи, не имамы иныя надежды, разве Тебе, Пречистая Дево: Ты еси Все-

сильная христиан Помощница и Заступница. Избави всех с верою Тебе молящихся от падений греховных, от навета злых человек, от всяких искушений, скорбей, бед и от напрасныя смерти: даруй нам дух сокрушения, смирение сердца, чистоту помышлений, исправление греховныя жизни и оставление прегрешений, да вси благодарне воспевающе величия Твоя, сподобимся Небеснаго Царствия и тамо со всеми святыми прославим Пречестное и Великолепое Имя Отца и Сына и Святаго Духа. Аминь.

#### Величание

Величаем Тя, Пресвятая Дево, Богоизбранная Отроковице, и чтем образ Твой святой, имже точиши исцеления всем с верою притекающим.

#### **Владимирской**

#### Тропарь, глас 4

Днесь светло красуется славнейший град Москва, яко зарю солнечную восприимши, Владычице, чудотворную Твою икону, к ней же ныне мы притекающе и молящся, Тебе взываем



сице: о, пречудная Владычице Богородице, моли-ся из Тебе воплощенному Христу Богу нашему, да избавит град сей и вся грады и страны христианския невредимы от всех навет вражиих, и спасет души наши, яко Милосерд.

Кондак, глас 8

Взбранной Воеводе победительная, яко избавльшеся от злых пришествием Твоего честнаго образа, Владычице Богородице светло сотворяем празднество сретения Твоего и обычно зовем Ти: радуйся, Невесто Невестная.

Молитва

О Всемилостивая Госпоже Богородице, Небесная Царице, Всемощная Заступнице, непостыдное наше Упование! Благодаряще Тя о всех великих благодеяниях, в роды родов людем российским от Тебе бывших, пред пречистым образом Твоим молим Тя: сохрани град сей (или: весь сию, или: святую обитель сию) и предстоящая рабы Твоя и всю землю Русскую от глада, губительства, земли трясения, потопа, огня, меча, нашествия иноплеменных и междоусобных брани.

Сохрани и спаси, Госпоже, Великаго Господина и Отца нашего Алексия, Святейшаго Патриарха Московскаго и всея Руси, и Господина нашего (имя рек), Преосвященнейшаго епископа (или: архиепископа, или: митрополита) (титул), и вся Преосвященныя митрополиты, архиепископы и епископы православныя. Дажь им Церковь Российскую добре управити, верныя овцы Христовы негиблемы соблности. Помяни, Владычице, и весь священнический и монашеский чин, согрей сердца их ревностию о Бозе и достойно звания своего ходити коегождо укрепи. Спаси, Госпоже, и помилуй и вся рабы Твоя и даруй нам путь земнаго поприща без порока преити. Утверди нас в вере Христовой и во усердии ко Православней Церкви, вложи в сердца наша дух страха Божия, дух благочестия, дух смирения, в напастех терпение нам подаждь, во благоденствии — воздержание, к ближним любовь, ко врагом всепрощение, в добрых делех преуспеяние. Избави нас от всякаго искушения и от окамененнаго нечувствия, в страшный же день Суда сподоби нас ходатайством Твоим стати одесную Сына Твоего, Христа Бога нашего, Емуже подобает всякая слава,

честь и поклонение со Отцем и Святым Духом, ныне и присно, и во веки веков. Аминь.

**Взысканию погибших и Всех скорбящих  
радосте**

Тропарь, глас 2

Всех скорбящих радосте, и обидимых Заступнице, и алчущих Питательнице, странных утешение, обуреваемых пристанище, больных исцеление, немощных покров и заступление, жезле старости, Мати Бога Вышняго Ты еси, Пречистая, потщися, молимся, спастися рабом Твоим.

Молитва

Заступнице Усердная, Благоутробная Господа Мати, к Тебе прибегаю аз, окаянный и паче всех человек грешнейший; вонми гласу моления моего, вопль мой и стенание услыши. Яко беззакония моя превзыдоша главу мою, и аз, якоже корабль в пучине, погружаюсь в море грехов моих. Но Ты, Всеблагая и Милосердная Владычице, не презри мене, отчаяннаго и во гресех погибающаго; помилуй мя, кающагося в злых делах моих, и обрати на путь правый заблудшую

окаянную душу мою. На Тебе, Владычице моя, Богородице, возлагаю все упование мое. Ты, Мати Божия, сохрани и соблюди мя под кровом Твоим, ныне и присно и во веки веков. Аминь.

#### Молитва вторая

Царице моя преблагая, Надеждо моя, Богородице, Приятелище сирым и странным Предстательнице! скорбящим Радосте, обидимым Покровительнице! Зриши мою беду, зриши мою скорбь: помози ми яко немощну, окорми мя яко странна. Обиду мою веси, разреши ту, яко волиши: яко не имам иныя помощи разве Тебе, ни иныя Предстательницы ни благия Утешительницы токмо Тебе, о Богомати, яко да сохраниши мя и покрыеши во веки веков. Аминь.

#### **Неупиваемой чаше**

##### Тропарь, глас 4

Днесь притецем вернии к Божественному и пречудному образу Пресвятыя Богоматери, напоющей верных сердца небесною Неупиваемою

Чашею Своего милосердия и людям верным чудеса показующей. Яже мы видяще и слышаще духовно празднуем и тепле вопием: Владычице премилостивая, исцели наша недуги и страсти молящи Сына Твоего Христа Бога нашего спасти души наша.

#### Молитва

О, Премилосердая Владычице! К Твоему заступлению ныне прибегаем, молений наших не презри, но милостивно услыши нас: жен, детей, матерей и тяжким недугом пианства одержимых, и того ради от матере своя — Церкви Христовой и спасения отпадающих, братьев и сестер и сродник наших исцели. О, Милостивая Мати Божия, коснися сердец их и скоро возстави от падений греховных, ко спасительному воздержанию приведи их. Умоли Сына Своего, Христа Бога нашего, да простит нам согрешения наша и не отвратит милости Своея от людей Своих, но да укрепит нас в трезвении и целомудрии. Приими, Пресвятая Богородице, молитвы матерей, о чадах своих слезы проливающих, жен, о мужех своих рыдающих, чад, сирых и убогих, заблужд-

шими оставленных, и всех нас, к иконе Твоей припадающих. И да придет сей вопль наш, молитвами Твоими, ко Престолу Всевышняго. Покрый и соблюди нас от лукаваго ловления и всех козней вражиих, в страшный же час исхода нашего помози пройти непреткновенно воздушныя мытарства, молитвами Твоими избави нас вечнаго осуждения, да покроет нас милость Божия в нескончаемые веки веков. Аминь.

**Молитва страждущего христианина,  
дающего обет трезвости**

Владыко Господи Иисусе Христе Сыне Божий, я недостойный раб Твой (имя), познав гибельность страстей, связывающих меня, и грехов, от них исходящих; пред Пречистым Образом Матери Твоей, Преподобной Владычицы нашей Богородицы, изъявляю твердое намеренье и даю крепкое обещание не пить вина и ничего алкогольного, а также не соблазнять к тому и других, равно не принимать никакого участия в различного рода непристойных играх, и больше не произносить скверных гнилых слов начиная с сегодняшнего дня и часа. О, Милосердный и

Щедрый Иисусе Христе, благослови благое намерение мое и помоги мне, слабому и нездоровому рабу Твоему (имя) силою Честного и Животворящего Креста, молитвами Пречистой Владычицы нашей Богородицы и всех святых Твоих благополучно совершить обещание это к славе Твоей во спасение души моей! Аминь.

#### Зарок

Я (имя) обещаю перед Святым Евангелием и Животворящим Крестом Господним исполнить данный мной зарок воздерживаться от (чего) ревностно, честно, со страхом Божьим, во благо моей семьи и себя самого и для спасения моей души, помня, что в нарушении его буду должен дать ответ перед Всевидящим Богом.

Да поможет мне Господь! Аминь.

## **Скоропослушнице**

### Тропарь, глас 4

Богородице притецем, сущии в бедах, и святей иконе Ея ныне припадем, с верою зовуще из глубины души: скоро наше услыши моление, Дево, яко Скоропослушница нарекшаяся. Тебе бо рабы Твои в нуждах готовую Помощницу имамы.

### Кондак, глас 8

В море житейстем обуреваемии, треволнению подпадаем страстей и искушений. Подаждь убо нам, Госпоже, руку помощи, якоже Петрови Сын Твой, и ускори от бед избавити ны, да зовем Ти: радуйся, Всеблагая Скоропослушнице.

### Молитва

О, Пресвятая Дево, Мати Господа Вышняго, Скоропослушная Заступнице всех, к Тебе с верою прибегающих! Призри с высоты небеснаго величия Своего на мене непотребнаго, припадающаго к иконе Твоей, услыши скоро смиренную молитву мене грешнаго и принеси ю к Сыну Своему: умоли Его, да озарит мрачную душу



мою светом Божественныя благодати Своя и очистит ум мой от помыслов суетных, да успокоит страждущее мое сердце и исцелит раны его, да вразумит мя на добрая дела и укрепит работати Ему со страхом, да простит вся содеянная мною злая, да избавит вечныя муки и не лишит небеснаго Своего Царствия. О Преблагословенная Богородице: Ты благоизволила еси нарещися во образе Своем Скоропослушница, повелевающи всем притекати к Тебе с верою: не призри убо мене скорбнаго и не попусти погибнути мне в бездне грехов моих. На Тя по Бозе все мое упование и надежда спасения, и Твоему покрову и предстательству поручаю себе во веки. Аминь.

### **Утоли моя печали**

#### Тропарь, глас 5

Утоли болезни многовоздыхающия души моя, Утолившая всяку слезу от лица земли: Ты бо человеком болезни отгоняеши и грешных скорби разрушаеши, Тебе бо вси стяжахом надежду и утверждение, Пресвятая Мати Дево.

#### Кондак, глас 6

Предстательство христиан непостыдное, ходатайство ко Творцу непреложное, не презри грешных молений гласы, но предвари, яко Благая, на помощь нас, верно зовущих Ти: ускори на молитву, и потщися на умоление, предстательствующи присно, Богородице, чтущих Тя.

#### Молитва

Надеждо всех концов земли и рабам Твоим (имена), Ты, Пречистая Дево, Госпоже Богородице, утешение наше! Не гнушайся нас, грешных, на Твою бо милость уповаем. Угаси в нас пламень греховный и покаянием ороси изсохшая сердца наша, очисти ум наш от греховных помыслов; прими воздыхание от души и сердца мольбу Ти приносящих. Буди о нас Ходатаица к Сыну Твоему и Богу, и укроти ярость Его праведную Матерними Твоими молитвами. Душевными и телесными язвы исцели, Госпоже Богородице, утоли болезни душ и телес, утиши бурю злых нападений вражеских; отъими бремя грехов наших и не остави нас до конца погибнути. Ты бо еси возведение человеческому роду, в печали скорая Помощница. Мати истинная Христа Бога

нашего, помогай нам, грешным рабам Твоим всегда, и ныне и присно и во веки веков. Аминь.

### **Знамению**

#### Тропарь, глас 4

Яко необоримую стену и источник чудес стяжавше Тя раби Твои, Богородице пречистая, сопротивных ополчения низлагаем. Темже молим Тя: мир граду Твоему даруй и душам нашим велию милость.

#### Кондак, глас 4

Честнаго образа Твоего знамение празднующе, людие Твои, Богородительнице, имже дивную победу на сопротивныя граду Твоему даровала еси. Темже Тебе верою взываем: радуйся, Дево, христиан похвало.

#### Молитва

О, Пресвятая Владычице Богородице, Небеснаго Царя Мати, Богоизбранная Отроковице! Не надежных надеяние, больных исцеление, сирым предстательнице, скорбящим утешение и радость, обидимым покровительнице и всем в

бедах и напастях сущим скорое поможение и заступление! Помози, о Мати Божия, и нам грешным в скорби нашей, возвесели радостию сердца людей Твоих; управи в мире и тишине жизнь нашу и не даждь во отчаяние впасти. Ты бо Едина еси паче всех святых и паче всех Горних умов Предстательница наша к Богу, яко Всеблагаго Царя Благая Мати. Темже мы, грешнии, на Пречистый Твой образ “Знамения” взирающе, умиленно преклоняем колена и, благоговейно лобызающе, молим Тя, Благосердая Мати: не отрини смиренного моления нашего и яви нам знамение милости Твоея: никтоже бо, к Тебе прибегая со упованием, исходит от Тебе посрамлен, но просит благодати и приемлет дар к полезному прошению, прославляя Сына Твоего и Бога, и Тебе с Ним, во веки веков. Аминь.

#### Величание

Величаем Тя, Пресвятая Дево, и чтим образ Твой честный, имже показала еси преславное знамение.

**Нечаянной Радосте**Тропарь, глас 4

Днесь, вернии людие, духовно торжествуем, прославляюще Заступницу усердную рода христианскаго, и притекающе к Пречистому Ея образу, взываем сице: О премилостивая Владычице Богородице, подаждь нам нечаянную радость, обремененным грехми и скорбьми многими, и избави нас от всякаго зла, молящи Сына Твоего, Христа Бога нашего, спасти души наша.

Молитва

О Пресвятая Дево, Всеблагаго Сына Мати Всеблагая, града и святаго храма сего Покровительнице, всех сущих во гресех, скорбех, бедах и болезнях верная Предстательнице и Заступнице! Приими молебное пение сие от нас, недостойных раб Твоих, Тебе возносимое, и якоже древле грешника, на всяк день многажды пред честною иконою Твоею молившагося, не презрела еси, но даровала еси ему нечаянную радость покаяния и преклонила еси Сына Твоего многим и усердным к Нему ходатайством к прощению сего грешнаго

и заблудшагося, тако и ныне не презри моления нас, недостойных рабов Твоих, и умоли Сына Твоего и Бога нашего, да и всем нам, с верою и умилением поклоняющимся пред цельбоносным образом Твоим, дарует нечаянную по коегождо потребе радость: грешником, погрязшим во глубине зол и страстей, — вседейственное вразумление, покаяние и спасение; сущим в скорбех и печалех — утешение; обретающимся в бедах и озлоблениях — совершенное сих избытие; малодушным и ненадежным — надежду и терпение; в радости и изобилии живущим — непрестанное Благодетелю Богу благодарение; бедствующим — милосердие; сущим в болезни и долгонедужии и оставленным врачами — нечаемое исцеление и укрепление; иждившим от недуга ум — ума возвращение и обновление; отходящим в вечную и нескончаемую жизнь — память смертную, умиление и сокрушение о гресех, дух бодр и твердую на милосердие Судии надежду. О Госпоже Пресвятая! Умилосердися о всех чтущих всечестное Имя Твое и всем яви всемогущий покров Твой и заступление: во благочестии, чистоте и честнем жительстве пре-

бывающия до скончания их во благости соблюди; злыя благи сотвори; заблуждшия на путь правый настави; всякому делу благому и Сыну Твоему угодному споспешествуй; всякое дело злое и богопротивное разруши; в недоумении и трудных и опасных обстояниях обретающимся незримую помощь и вразумление с Небесе ниспосли, от искушений, соблазнов и погибели спаси, от всех злых человек и от врагов видимых и невидимых защити и сохрани; плавающим сплавай, путешествующим спутешествуй; сущим в нужде и гладе буди Питательница; неимущим крова и пристанища буди покров и прибежище; нагим подаждь одеяние, обидимым и неправедно гонимым — заступление; клевету, поношение и хуление терпящия незримо оправдай; клеветники и хулители пред всеми обличи; ожесточенно враждующим нечаемое подаждь примирение и всем нам — друг ко другу любовь, мир, и благочестие, и здравие с долгоденствием. Супружества в любви и единомыслии сохрани; супруги, во вражде и разделении сущия, умири, соедини я друг ко другу и положи им союз любви неразрушимый; матерем детородящим скорое подаждь

разрешение, младенцы воспитай, юныя целомудри, отверзи им ум к восприятию всякаго полезнаго учения, страху Божию, воздержанию и трудолюбию настави; от домашня брани и вражды единокровныя миром и любовию огради; безматерних сирот буди Матерь, от всякаго порока и скверны отврати я и всему благому и богоугодному научи, прельщенные же и во грех и нечистоту впадшия, скверну греха отъявши, из бездны погибели изведи; вдов буди Утешительница и Помощница, старости буди жезл; от внезапныя смерти без покаяния всех нас избави и всем нам христианскую кончину живота нашего, безболезненну, непостыдну, мирну и добрый ответ на Страшнем Судищи Христове даруй: представльшияся в вере и покаянии от жития сего со Ангелы и всеми святыми жити сотвори; скончавшимся внезапною смертию милостива быти Сына Твоего умоли и о всех усопших, иже не имут сродников, о упокоении их Сына Твоего умоляющих, Сама буди непрестанная и теплая Молитвенница и Ходатаица: да вси на Небеси и на земли ведят Тя, яко твердую и непостыдную Предстательницу рода христианскаго, и, введуще,



славят Тя и Тобою Сына Твоего, с Безначальным Его Отцем и Единосущным Его Духом, ныне, и присно, и во веки веков. Аминь.

**Тихвинской**

Тропарь, глас 4

Днесь яко солнце пресветлое возсия нам на воздухе всечестная икона Твоя, Владычице, лучами милости мир просвещаючи, юже великая Россия, яко некий дар Божественный свыше благоговейне восприемши, прославляет Тя, Богомати, всех Владычицу, и от Тебе рождшагося Христа Бога нашего величает радостно. Емуже молися, о Госпоже Царице Богородице, да сохрани вся грады и страны христианския невредимы от всех навет вражиих, и спасет верою поклоняющихся Его Божественному и Твоему пречистому образу, Дево Неискусобрачная.

Кондак, глас 8

Притецем, людие, к Деве Богородице Царице, благодаряще Христа Бога, и к Тоя чудотворней иконе умильно взирающе припадем, и возопием Ей: о Владычице Марие! Присетивши страну

сию Твоего честнаго образа явлением чудесно, спасай в мире и благовременстве вся христианы, наследники показующи небесныя жизни. Тебе бо верно зовем: радуйся, Дево, мира спасение.

#### Молитва

Благодарим Тя, о Преплагая и Пречистая, Преплагословенная Дево, Владычице, Мати Христа Бога нашего, о всех благодеяниях Твоих, яже показала еси роду человеческому, наипаче же нам, христоименитым людям российского народа, о нихже ниже самый ангельский язык к похвалению доволен будет. Благодарим Тя, яко и ныне удивила еси неизреченную Свою милость на нас, недостойных рабех Твоих, преестественным самопришествием пречистыя Твоя иконы, еюже всю просветила еси Российскую страну; темже и мы, грешнии, со страхом и радостью покланяющесе, вопием Ти: о Пресвятая Дево, Царице и Богородице, спаси и помилуй вся люди, и подаждь им победы на вся враги их, и сохрани вся грады и страны христианския, и сей святыи храм от всякаго навета вражия избави, и всем вся на пользу даруй, ныне пришедшим с верою и мо-

лящимся рабом Твоим, и покланяющимся пресвятому образу Твоему: яко благословенна еси с Рождшимся от Тебе Сыном и Богом, ныне и присно и во веки веков. Аминь.

**Троеручице**

Тропарь, глас 4

Днесь всемирная радость возсия нам велия, даровася святей горе Афонстей цельбоносная Твоя, Владычице Богородице, икона, со изображением тричисленно и нераздельно пречистых рук Твоих, в прославление Святыя Троицы: созываеши бо верных и молящихся Тебе о сем познати, яко двема имаши Сына и Господа держати, третью же яви на прибежище и покров чтущим Тя от всяких напастей и бед избавляти, да вси, притекающи к Тебе верою, приемлют от всех зол освобождение, от врагов защищение. Сего ради и мы вкупе со Афоном вопием: радуйся, Благодатная, Господь с Тобою.

Тропарь, глас 4

Днесь светло красуется царствующий град Москва, имеющи в себе, о Всемилоливейшая,

всё твари Честнейшая, Заступнице наша Дево Богородице, честный образ Твой, имже подсолнечныя концы земли удивляеши и мир мирови даруеши, во образ бо Святыя Троицы являеши трие руце: двама убо Сына Своего, Христа Бога нашего, носиши, третию от напастей и бед верно к Тебе прибегающих избавляеши, и от потопления изымаеши, и всем полезная даруеши, и преподобному Михаилу Малеонскую гору показа, и всех всегда милуеши, честною ризою Своею покрываеши жительство сие и вся грады и страны наша, да зовем Ти: радуйся, Обрадованная.

#### Молитва

О Пресвятая Госпоже Владычице Богородице, велие чудо святому Иоанну Дамаскину явившая, яко веру истинную и надежду несумненную показавшему! Услыши нас, грешных раб Твоих (имена), пред чудотворною Твоею иконою усердно молящихся и просящих Твоея помощи: не отрини моления сего многих ради прегрешений наших, но, яко Мати милосердия и щедрот, избави нас от болезней, скорбей и печалей, прости со-

деянные нами грехи, исполни радости и веселия всех чтущих святую икону Твою, да радостно воспоем и любовию прославим имя Твое, яко Ты еси от всех родов избранная, благословенная во веки веков. Аминь.

Величание

Величаем Тя, Пренепорочная Дево, и чтим чудеса образа святого Твоего, трех пречистых рук Твоих явление в славу Божества, в Троице Бога нашего.

**Покрову Пресвятой Богородицы**

Тропарь, глас 4:

Днесь благовернии людие / светло празднуем, / осеняеми Твоим, Богомати, пришествием, / и к Твоему взирающе пречистому образу, умильно глаголем: / покрый нас честным Твоим Покровом/ и избави нас от всякаго зла, / молящи Сына Твоего, Христа Бога нашего, / спасти души наша.

Величание:

Величаем Тя, / Пресвятая Дево, / и чтим Покров Твой честный, / Тя бо виде святыи Андрей на воздусе, / за ны Христу молящюся.

Кондак, глас 3:

Дева днесь предстоит в Церкви, / и с лики святых невидимо за ны молится Богу, / ангели со архиереи покланяются, / апостоли же со пророки ликовствуют: / нас бо ради молит Богородица Превечнаго Бога.

**11. Святым ангелам**

Тропарь, глас 4

Небесных воинств Архистратиже, молим вас присно мы недостойнии, да вашими молитвами оградите нас кровом крил невестественныя вашея славы, сохраняя нас, припадающих прилежно и вопиющих: от бед избавите нас, яко чиновначальницы Вышних Сил.

**Прокимен, гл.4:** Творяи ангелы Своя духи, и слуги Своя пламень огненный.

**Стих:** Благослови, душе моя, Господа, Господи, Боже мой, возвеличился еси зело.

### Молитва

Вси святии Небесные бесплотные Силы, удостойте меня силы сокрушать все зло и страсти под ноги мои. Святии Бесплотные Серафимы, удостойте меня иметь пламенеющее сердце к Богу. Святии Бесплотные Херувимы, удостойте меня иметь премудрость для славы Божией. Святии Бесплотные Престолы, удостойте меня различать истину от неправды. Святии Бесплотные Господства, удостойте меня господствовать над страстями, чтобы дух поработил плоть. Святии Бесплотные Силы, удостойте меня иметь мужество в исполнении воли Божией. Святии Бесплотные Власти, удостойте меня иметь силу победы над злом. Святии Бесплотные Начала, удостойте меня служить Господу Богу в непорочности сердца и дел рук моих. Святии Бесплотные Архангелы, удостойте меня исполнять волю Господа нашего нашего Иисуса Христа. Святии Бесплотные Ангелы, удостойте меня руководствоваться заповедями Божиими во все дни жизни моей.

### **12. Каждому святому**

О, святыи угодниче Божий (имярек), подвигом добрым подвизався на земли, восприял еси на небесех венец правды, егоже уготовал еси Господь всем любящим Его; темже взирающе на святыи твой образ, радуемся о преславнем скончании жительства твоего и чтем святыю память твою. Ты же, предстоя Престолу Божию, приими моления наша и ко Всемилостивому Богу принеси, о еже простити нам всякое прегрешение и помощи нам стати противу кознем диавольским, да избавльшеся от скорбей, болезней, бед и напастей и всякаго зла, благочестно и праведно поживем в нынешнем веце и сподобимся предстательством твоим, аще и недостойни есмы, видети благая на земли живых, славяще Единаго во святых Своих славимаго Бога, Отца и Сына и Святаго Духа, ныне и во веки веков. Аминь.

### **13. Святителю**

Тропарь, гл.4:

Правило веры и образ кротости, воздержания учителя. Яви тя стаду твоему яже вещей истина; сего ради стяжал еси смирением высокая, нище-



тою богатая. Отче, святителю (имя) , моли Христа Бога спастися душам нашим.

**Прок., гл.7:** Честна пред Господем смерть преподобных Его.

**Стих:** Что воздам Господеву о всех, яже воздаде ми.

**Ев.: Иоанн.35; Иоанн.36; Мф.11; Мк.51; Лк.24**

#### Молитва

О пречестная и священная главо и благодати Святаго Духа исполненная, Спасово со Отцем обиталище, великий архиерее, теплый наш заступниче, святителю (имярек), предстоя у Престола всех Царя и наслаждаяся света единосущныя Троицы и херувимски со ангелы возглашая песнь трисвятую, великое же и неизследованное дерзновение имея ко всемиловитому Владыце, моли спастися паствы Христовы людем, благостояние святых церквей утверди: архиереи благолепием святительства украси, монашествующыя к подвигом добраго течения укрепи, цар-

ствующий град и вся грады и страны добре сохрани, и веру святую непорочну соблюсти умоли, мир весь предстательством твоим умири, от глада и пагубы избави ны, и от нападения иноплеменных сохрани, старья утеша, юныя настави, безумныя умудри, вдовицы помилуй, сироты заступи, младенцы возрасти, пленных возврати, немощствующыя и молящияся тебе от всех напастей и бед ходатайством твоим свободи: моли о нас Всещедрого и Человеколюбиваго Христа Бога нашего, да и в день Страшнаго Пришествия Его от шуияго стояния избавит нас, и радости святых причастники сотворит со всеми святыми во веки веков. Аминь.

#### **14. Преподобному**

Тропар, гл.8:

В тебе, отче, известно спасеся, еже по образу: приим бо крест, последовал еси Христу, и дея учил еси презирати убо плоть, преходит бо: прилежати же о души вещи бессмертней. Темже и со ангелы срадуеся, преподобне (имя), дух твой.

**Прок., гл.7:** Честна пред Господем смерть преподобных Его.

**Стих:** Что воздам Господеву о всех, яже воздаде ми.

**Ев.: Мф.43; Лк.24.**

#### Молитва

О священная главо, преподобне отче, преблаженне авво (имярек), не забуди убогих твоих до конца, но поминай нас всегда во святых и благоприятных молитвах к Богу: помяни стадо твое, еже сам упасл еси, и не забуди посетити чад твоих моли за ны, отче священный, за дети твоя духовныя, яко имеяй дерзновение к Небесному Царю: не премолчи за ны ко Господу, и не презри нас, верою и любовию чтущих тя: поминай нас недостойных у Престола Вседержителя, и не престай моляся о нас ко Христу Богу, ибо дана тебе бысть благодать за ны молитися. Не мним бо тя суща мертв: аще бо телом и представился еси от нас, но и по смерти жив сый пребываеши, не отступай от нас духом, сохраняя нас от стрел вражиих и всякия прелести бесовския и

козней диавольских, пастырю наш добрый. Аще бо и мощей твоих рака пред очима нашими видима есть всегда, но святая твоя душа со ангельскими воинствы, со безплотными лики, с небесными силами, у престола Вседержителя предстоящи, достойно веселится, ведуще убо тя воистину и по смерти жива суща, тебе припадаем и тебе молимся: молися о нас Всесильному Богу, о пользе душ наших, и испроси нам время на покаяние, да невозбранно прейдем от земли на небо, от мытарств же горьких, бесов воздушных князей и от вечныя муки да избавимся, и Небеснаго Царствия наследницы да будем со всеми праведными, от века угодившими Господу нашему Иисусу Христу: Ему же подобает всякая слава, честь и поклонение, со Безначальным Его Отцем, и с Пресвятым и Благим и Животворящим Его Духом, ныне и присно, и во веки веков. Аминь.

### **15. Мученику**

#### **Тропарь, гл.4:**

Мученицы Твои Господи, во страданиях своих венцы прияша нетленные от Тебе Бога нашего:

имуще бо крепость Твою, мучителей низложиша, сокрушиша и демонов немощныя дерзости. Тех молитвами спаси души наша.

**Прокимен, гл7:** Возвеселится праведник о Господе и уповает на Него.

**Стих:** Услыши, Боже, глас мой, внегда молити ми ся к Тебе.

**МУЧЕНИКАМ:** Святи, иже суть на земли Его, удиви Господь вся хотения Своя в них.

**Стих:** Предзрех Господа предо мною выну, яко одесную мене есть, да не подвижуся.

**Ев.: Лк.63; Иоанн.52; Мф.36; Лк.108.**

Молитва мученикам (общая)

О святити мученицы! Прострите благоприятныя молитвы ваша ко Господу и Создателю нашему и умолите Его благость даровати нам (имена) вся к вечному спасению потребная, таже и к житию сему временному нужная: веруем бо несомненно, яко вся возможна вам, яко истинным Его угодником. Ей, чудотворцы святити! Не посрамите упования нашего, но молитвами вашими

сотворите нас наследники быти Царствия Христова, да прославляем человеколюбие в Троице славимаго и покланяемаго Бога, Отца и Сына и Святаго Духа, и ваше святое заступление, во веки веков.

### 16. Мученице

**Прокимен:** Дивен Бог во святых Своих, Бог израилев

**Стих:** В церквах благословите Бога, Господа от источник израилевых

**Ев.: Мф.62; Мк.21.**

### Молитва

О многострадальная и премудрая /имя/ ! Ты душею на небеси у престола Господня предстоиши, на земли же данною тебе благодатию, различные совершаеши исцеления. Призри милостивно на предстоящие люди и молящиеся пред образом твоим, просящие твоя помощи: простри ко Господу святыя молитвы твоя о /имена/ и испроси нам оставление прегрешений наших, недужным исцеления, скорбящим и бедствующим

скорую помощь: умоли Господа, да подаст всем нам христианскую кончину и добрый ответ на страшнем суде Своем, да сподобимся и мы купно с тобою славить Отца и Сына, и Святаго Духа во веки веков. Аминь.

### **17. Всем святым**

#### Тропарь всем святым субботы, глас 2

Апостоли мученицы и пророцы, святителие, преподобнии и праведнии, добре подвиг совершившии и веру соблюдшии, дерзновение имуще ко Спасу, о нас Того, яко блага, молитве, молимся, спастися душам нашим.

#### Молитва

К вам, о святии вси и (имя святого), яко путеводным светильникам, деяньми своими осветившим путь небеснаго восхода, аз многогрешный смиренно колена сердца моего преклоняю и из глубины души взываю: умолите о мне Человеколюбца Бога, да не попустит ми еще блуждати по распутиям греха, но да просветит мои ум и сердце светом благодати Своея, яко да тою озаряем и подкрепляем, возмогу прочее время зем-

наго жития правою стезею непреткновенно преити и ходатайством вашим к Преблагому Господу сподоблюся, поне в мале причастник быти духовныя ваша трапезы в небесном чертозе Царя славы. Емуже со Безначальным Его Отцем и Пресвятым, Благим и Животворящим Духом буди слава, честь и поклонение во веки веков. Аминь.

### **18. Молитва любимому святому**

Угодниче Божий, (имярек)! Поминай нас в благоприятных твоих молитвах пред Христом Богом, да сохранит Он нас от искушений, болезней и скорбей, да дарует нам смирение, любовь, рассуждение и кротость, и да сподобит Он нас, недостойных, Царствия Своего. Аминь.

### **19. Молитвы святым:**

#### **Арсению Коневскому, преп.**

##### Тропарь, глас 1

Божественного любовию возгоревся, мирския пристрастия от души отвергше, тесным путем постничества во след Христа невозвратным умом шествовал еси, Арсение всеблаженне: от него же



и мзду трудов твоих на небесех восприим, поминай нас, чтущих святую память твою и вопиющих: слава Давшему ти крепость, слава Венчавшему тя, слава Действующему тобою всем исцеления.

#### Молитва

О преподобне отче наш Арсение, зрителю неизреченныя славы в Небеснем Царствии. Не остави обитель твою, в нейже труды и подвиги о Христе подъял еси, но сохрани ю в мире и тишине, да пребудет незыблема от ухищрений врагов видимых и невидимых. Укрепи в доброделании чад твоих, их же собрал еси, мудре, во обитель твою, да познают звание свое, да будут достойни попечения о них Богоматере. Посети с высоты небесныя всех, верно притекающих к тебе животворною твоею молитвою. Плавающих на мори управи. Волнения моря жития сего утиши. Церковные раздоры укроти. Мир мирови у Господа всем нам испроси. Болящих уврачуй спасительным твоим заступлением. В скорбех буди утешитель и наставник благий. Всем буди вся, яко же был еси и в земнем житии твоём.

Сотвори к Богу молитву, ибо дана ти есть благодать молиться за ны. Вемы бо, вемы воистину, яко много может молитва праведника, поспешествуемая ходатайством Богородицы. Аще и недостойны есмы, обаче и нас вручи Ея всеильному покрову и заступлению, да сподобимся улучшить блаженство в Царствии Сына Ея, Христа Бога нашего, купно с тобою и всеми святыми во веки веков. Аминь.

**Артемию Веркольскому, прав.**

Святой угодниче Божий, Артемие праведный, хранителю присный святых обители, твоим именем украшенная, и всего севернаго края Российския страны близкий защитниче! Призри милостивно на усердную молитву нас грешных и твоим благомошным предстательством испроси нам у Господа прощение согрешений наших, преспеяние в вере и благочестии и ограждение от козней диавольских. Моли Господа, да хранит во здравии и непремеяемом благополучии благочестивый народ наш, да подаст державе нашей мир, тишину и нелицемерное послушание, да

сподобит всех нас получить, по христианстей кончине, Небесное Царствие, идеже вси праведнии купно с тобою, присно славят Отца и Сына и Святаго Духа. Аминь.

**Александру Невскому, благ. кн.**

Тропарь, глас 4

Яко благочестиваго корене пречестная от-  
расль был еси, блаженне Александре, яви бо ты  
Христос яко некое Божественное сокровище Рос-  
сийстей земли, новаго чудотворца преславна и  
Богоприятна. И днесь сошедшеся в память твою  
верою и любовию, во псалмех и пениих раду-  
ющеся славим Господа, давшего тебе благодать  
исцелений. Егоже моли спасти град сей, и стране  
нашей Богоугодней быти, и сыновом Российским  
спастися.

Молитва

Скорый помощниче всех усердно к тебе при-  
бегающих и теплый наш пред Господем пред-  
стателю, святой благоверный великий княже  
Александре! Призри милостивно на ны, недо-  
стойныя, многими беззаконии непотребны себе

сотворшия, к раце мощей твоих ныне притекающая и из глубины сердца к тебе взывающая: ты в житии своем ревнитель и защитник православныя веры был еси, и нас в ней теплыми твоими к Богу молитвами непоколебимы утверди. Ты великое возложенное на тя служение тщательное проходил еси, и нас твоею помощию пребывати коегождо, в неже призван есть, настави. Ты, победив полки супостатов, от пределов российских оных отгнал еси, и на нас ополчающихся всех видимых и невидимых врагов низложи. Ты, оставив тленный венец царства земнаго, избрал еси безмолвное житие и ныне праведно венцем нетленным увенчанный на Небесех царствуеши, исходатайствуй и нам, смиренно молим тя, житие тихое и безмятежное и к Вечному Царствию шествие неуклонное твоим предстательством устрой нам. Предстоя же со всеми святыми Престолу Божию, молися о всех православных христианех, да сохранит их Господь Бог Своею благодатию в мире, здравии, долгоденствии и всяком благополучии в должайшая лета, да присно славим и благословим Бога, в Троице Святей

славимаго, Отца и Сына и Святого Духа, ныне и присно и во веки веков. Аминь.

**Александру Свирскому, преп.**

Тропарь, глас 4

От юности, богомудре, желанием духовным в пустыню вселився, единого Христа возжелал еси усердно стопам вслед ходити; темже и ангельстии чини зряще тя, удивишася, како с плотию к невидимым кознем подвизався, премудре, победил еси полки страстей воздержанием, и явился еси равноангелен на земли; Александре преподобне, моли Христа Бога, да спасет души наша.

Молитва

О преподобне и богоносне отче наш Александре! Испроси нам вся к житию сему временному благопотребная, паче же к вечному спасению нашему нужная. Буди нам, рабам Божиим (имена), чудотворче святыи, во всякой скорби и обстоянии скорый помощник. Наипаче же в час кончины нашея явися нам заступник благосердый, да не предани будем на мытарствах

воздушных власти злобнаго миродержца, но да сподобимся непреткновеннаго восхода во Царствие Небесное. Ей, отче, молитвенниче наш присный! Не посрами упования нашего, не презри смиренных молений наших, но присно о нас пред престолом Живоначальныя Троицы предстательствуй, да сподобимся вкупе с тобою и со всеми святыми, аще и недостойни есмы, в селениих райских славити величие, благодать и милость Единаго в Троице Бога, Отца и Сына и Святаго Духа, во веки веков.

**Александре, цар.**

Тропарь, гл.4

Царства земнаго славу презревши, / Единаго Христа, нас ради распятаго, возлюбила еси / и, Того мужественно исповедаючи, / венцем мученическим увенчалася еси, / всеблаженная царице Александро. / Темже и ныне Престолу Царя славы на Небесех предстоящи, / молися о спасении душ наших.

**Алексию Московскому, свят.**

Тропарь, глас 8

Яко Апостолом сопрестольна, и врача предобра, и служителя благоприятна, к раце твоей честней притекающе, святителю Алексие, богомудре чудотворче, сошедшеся любовью в память твою, светло празднуем, в песнях и пениих радующеся и Христа славяще, таковую благодать тебе даровавшего исцелений и граду твоему великое утверждение.

#### Молитва

О пречестная и священная главо и благодати Святаго Духа исполненная, Спасово со Отцем обиталище, великий архиерее, теплый наш заступниче, святителю Алексие! Предстоя у Престола всех Царя, и наслаждаяся Света Единосущныя Троицы, и херувимски со Ангелы возглашая песнь Трисвятую, велие и неизследованное дерзновение имея ко Всемилостивому Владыце, молися спасти люди паствы твоея, едиnorodный ти язык; благостояние святых церквей утверди, архиереи благолепием святительства украси; монашествующия к подвигом добраго течения укрепи; град сей (или: весь сию; аще во обители: святую обитель сию) и вся грады и страны добре

сохрани и веру святую непорочну тем соблюсти Господа умоли; мир весь умири, от глада и пагубы избави ны и от нападения иноплеменных сохрани нас; старья утеши, юныя накажи (науучи), безумныя умудри, вдовицы помилуй, сироты заступи, младенцы возрасти, плененныя возврати, немощствующия исцели и везде тепле призывающих тя и с верою притекающих к раце честных и многоцелебных мощей твоих, усердно припадающих и молящих ти ся от всяких напастей и бед ходатайством твоим свободи, да зовем ти: о Богоизбранный пастырю, звездо всесветлая мысленная тверди, тайнаго Сиона необоримый столпе, миродохновенный цвете райский, всезлатая уста Слова, московская похвало, всея России украшение! Моли о нас Всещедраго и Человеколюбиваго Христа Бога нашего, да в День страшнаго Пришествия Его шуияго стояния избавит нас и радости святых причастники сотворит со всеми святыми вовеки. Аминь.

**Алексию человеку Божию**

Тропарь, глас 4



Возвысився на добродетель и ум очистив, к желанному и крайнему достигл еси: безстрастием же украсив житие твое, и пощение изрядное восприим совестью чистою, в молитвах, яко безплотен пребывая, возсиял еси, яко солнце в мире, преблаженне Алексие.

#### Молитва

О великий Христов угодниче, святыи человеце Божий Алексие, душею на небеси Престолу Господню предстояй, на земли же данною ти свыше благодатию различная совершая чудеса! Призри милостивно на предстоящий святей иконе твоей люди, умиленно молящиеся и просящие от тебе помощи и заступления. Простри молитвенно ко Господу Богу честней руце твои и испроси нам от Него оставление согрешений наших вольных и невольных, в недужех страждущим исцеление, напастуемым заступление, скорбящим утешение, бедствующим скорую помощь, всем же чтущим тя мирную и христианскую живота кончину и добрый ответ на Страшнем Суде Христове. Ей, святче Божий, не посрами упования нашего, еже на тя по Бозе и

Богородице возлагаем, но буди нам помощник и покровитель во спасение, да твоими молитвами получивше благодать и милость от Господа, прославим человеколюбие Отца и Сына и Святаго Духа, в Троице славимаго и покланяемаго Бога, и твое святое заступление ныне и присно, и во веки веков. Аминь.

**Амвросию Оптинскому, преп.**

Тропарь, глас 5

Яко к целебному источнику, притекаем к тебе, Амвросие, отче наш, ты бо на путь спасения нас верно наставляеши, молитвами от бед и напастей охраняеши, в телесных и душевных скорбех утешаеши, паче же смирению, терпению и любви научаеши, моли Человеколюбца Христа и Заступницу Усердную спастися душам нашим.

Молитва

О великий старче и угодниче Божий, преподобне отче наш Амвросие, Оптинская похвало и всея Руси учителю благочестия! Славим твое во Христе смиренное житие, имже Бог превознесе имя твое еще на земли тебе суца, наипа-

че же увенча ты небесною честию по отшествии твоём в чертог славы вечныя. Приими ныне мольбу нас, недостойных чад твоих, чтущих тя и призывающих имя твое святое, избави нас твоим предстательством пред престолом Божиим от всех скорбных обстояний, душевных и телесных недугов, злых напастей, тлетворных и лукавых искушений, низпосли Отечеству нашему от великодаровитаго Бога мир, тишину и благоденствие, буди непреложный покровитель святых обителей твоих, в нихже в преуспянии сам подвизался еси и угодил еси всеми в Троице славимому Богу нашему, Ему же подобает всякая слава, честь и поклонение, Отцу и Сыну и Святому Духу, ныне и присно, и во веки веков. Аминь.

**Андрею, архиепископу Критскому, свят.**

Тропарь, глас 1

Христову Церковь цевницею языка твоего, песнословя умильно, возвеселил еси, богословием же Препетия Троицы славу всем сказал еси ясно, тем ты, яко тайноглагольника, поем, Андрее, пастырю Критский, и величаем память твою, Христа славяще дивнаго во святых Своих.

### Молитва

О пречестная и священная главо и благодати Святаго Духа исполненная, Спасово со Отцем обиталище, великий архиерее, теплый наш заступниче, святителю Андрее! Предстоя у Престола всех Царя и наслаждаяся света единосущныя Троицы и херувимски со ангелы возглашая песнь трисвятую, великое же и неизследованное дерзновение имея ко всемилостивому Владыце, моли спастися паствы Христовы людем, благостояние святых церквей утверди: архиереи благолепием святительства украси, монашествующыя к подвигом добраго течения укрепи, царствующий град и вся грады и страны добре сохрани, и веру святую непорочну соблюсти умоли, мир весь предстательством твоим умири, от глада и пагубы избави ны, и от нападения иноплемнных сохрани, старыя утеши, юныя настави, безумныя умудри, вдовицы помилуй, сироты заступи, младенцы возрасти, пленных возврати, немощствующыя и молящияся тебе от всех напастей и бед ходатайством твоим свободи: моли о нас Всещедраго и Человеколюбиваго.

ваго Христа Бога нашего, да и в день Страшного Пришествия Его от шуияго стояния избавит нас, и радости святых причастники сотворит со всеми святыми во веки веков. Аминь.

**Андрею Первозванному, ап.**

Тропарь, глас 4

Яко апостолов первозванный и верховнаго сущий брат, Владыце всех, Андрее, молися, мир вселенней даровати и душам нашим велию милость.

Молитва

Первозванне апостоле Бога и Спаса нашего Иисуса Христа, Церкви последователю верховный, всехвальне Андрее, славим и величаем апостольским труды твоя, сладце поминаем твое благословенное к нам пришествие, ублажаем честная страдания твоя, яже за Христа претерпел еси, лобызаем священныя мощи твоя, чтим святую память твою и веруем, яко жив Господь, жива же и душа твоя и с Ним во веки пребыва-

еши на Небеси, идеже и любиши ны тоюжде любовью, еуже возлюбил еси нас, егда Духом Святым прозрел еси наше еже ко Христу обращение, и не точию любиши, но и молиши о нас Бога, зря во Свете Его вся нужды наша. Тако веруем и тако сию веру нашу исповедуем во храме, иже во имя твое, святыи Андрее, преславно создася, идеже святыя мощи твоя почивают; верующе же, просим и молим Господа и Бога и Спаса нашего Иисуса Христа, да молитвами твоими, яже присно послушает и приемлет, подаст нам вся потребная ко спасению нас грешных; да якоже ты абие по гласу Господа, оставль мрежи своя, неуклонно ему последовал еси, сице и кийждо от нас да ищет не своих си, но еже к созиданию ближняго и о горнем звании да помышляет. Имуще же тя предстателя и молитвенника о нас, уповаем, яко молитва моя много может пред Господем и Спасителем нашим Иисусом Христом, Емуже подобает всякая слава, честь и поклонение со Отцем и Святым Духом во веки веков. Аминь.

**Андрею Рублеву, преп.**Тропарь, глас 3

Божественного света лучами облистаемый, преподобне Андрее, Христа познал еси Божию Премудрость и Силу и иконою Святыя Троицы всему миру проповедал еси Единство во Святей Троице, мы же со удивлением и радостью вопием ти: имей дерзновение ко Пресвятей Троице, моли просветити души наша.

Молитва

О священная главо, преподобне отче, преблаженне авво Андрее! Не забуди убогих твоих до конца, но поминай нас всегда во святых и благоприятных молитвах к Богу: помяни стадо твое, еже сам упасл еси, и не забуди посетати чад твоих моли за ны, отче священный, за дети твоя духовныя, яко имей дерзновение к Небесному Царю: не премолчи за ны ко Господу, и не презри нас, верою и любовию чтущих тя: поминай нас недостойных у Престола Вседержителя, и не престай моляся о нас ко Христу Богу, ибо дана тебе бысть благодать за ны молитися. Не мним бо тя суща мертв: аще бо телом и пре-

ставился еси от нас, но и по смерти жив съи пребываеши, не отступай от нас духом, сохраняя нас от стрел вражиих и всякия прелести бесовския и козней диавольских, пастырю наш добрый. Аще бо и мощей твоих рака пред очима нашими видима есть всегда, но святая твоя душа со ангельскими воинствы, со безплотными лики, с небесными силами, у престола Вседержителя предстоиши, достойно веселится, ведуще убо тя воистину и по смерти жива суща, тебе припадаем и тебе молимся: молися о нас Всесильному Богу, о пользе душ наших, и испроси нам время на покаяние, да невозбранно прейдем от земли на небо, от мытарств же горьких, бесов воздушных князей и от вечныя муки да избавимся, и Небеснаго Царствия наследницы да будем со всеми праведными, от века угодившими Господу нашему Иисусу Христу: Ему же подобает всякая слава, честь и поклонение, со Безначальным Его Отцем, и с Пресвятым и Благим и Животворящим Его Духом, ныне и присно, и во веки веков. Аминь.



**Симеону Богоприимцу и Анне пророчице**Тропарь, гл.1

Радуйся, Богоприимче старче Симеоне, во объятия приемый Спаса нашего и Господа. Веселися и ты честная пророчица Анна, возвестивши пришествие в мир Христа Бога нашего, сокрушившаго державу вражию и подающего нам велию милость.

**Прок.:** Возвеселится праведник о Господе и уповает на Него.

**Стих:** Услыши, Боже, глас мой, внемди молитви моея к Тебе.

**Ев. Лк.8**Молитва

О, великий угодниче Божий Богоприимче Симеоне! Предстоя Престолу Великаго Царя и Бога нашего Иисуса Христа, велие дерзновение имаши к Нему, во объятиих твоих нашего ради спасения носитися изволившему. К тебе убо, яко многомогущему предстателю и крепкому о нас молитвеннику, прибегаем мы, грешнии и недо-

стойнии. Моли Благодсть Его, яко да отвратит от нас гнев Свой, праведно по делом нашим на ны движимый, и, презрев безчисленная прегрешения наша, обратит нас на путь покаяния и на стезе заповедей Своих утвердит нас. Огради молитвами твоими в мире живот наш, и во всем благом благое поспешение испроси, вся яже к животу и благочестию потребная нам даруя. Якоже древле Великий Новоград явлением чудотворных иконы твоя от губительства смертнаго избавил еси, тако и ныне нас и вся грады и веси страны наша от всяких напастей и бед и напрасных смерти предстательством твоим избави, и от всех враг видимых и невидимых покровом твоим защити. Яко да тихое и безмолвное житие поживем во всяком благочестии и чистоте и, тако в мире временное сие житие прешедше, в вечный достигнем покой, идеже сподобимся Небеснаго Царствия Христа Бога нашего. Ему же всякая слава подобает со Отцем и Пресвятым Его Духом, ныне и присно и во веки веков. Аминь.

**Антипе, епископу Пергамскому, священномуч.**

Тропарь, глас 4

Идольския лести упрзднил еси, Антипо, и диавольскую поправ силу, пред богоборцы дерзновенно Христа исповедал еси. Темже с ангельскими чины в вышних водворился, Владыце всех славословие принося, и о нас молебное благодарение предлагаеши, благодать цельбы даруя. Сего ради тя чтим, священномучениче Антипо, моли Христа Бога, да спасет души наша.

Молитва

О, преславный священномучениче Антипо, скорый помощниче христианом в болезнях! Верую от всея души и помышления, яко дадеся тебе от Господа дар болящия исцеляти, недугующия врачевати и разслабленныя укрепляти. Сего ради к тебе, яко благодатному врачу болезней, аз немощный [немощная] прибегаю и твой досточтимый образ с благоговением лобызая, молюся: твоим предстательством у Царя Небеснаго испроси мне болящему [болящей] исцеление от удручающия мя зубныя болезни, аще бо и

недостойн [недостойна] есмь тебе, благостнейшаго отца и приснаго заступника моего, но ты, быв подражатель человеколюбия Божия, сотвори мя достойна [достойну] твоего заступления чрез мое обращение от злых дел к благому житию, уврачуй обильно дарованною тебе благодатию язвы и струпы души и тела моего, даруй ми здравие и спасение и во всем благое поспешение, да тако тихое и безмолвное житие пожив во всяком благочестии и чистоте, сподоблюся со всеми святыми славить всесвятое имя Отца и Сына и Святаго Духа. Аминь.

### **Борису и Глебу, страсотерп.**

#### Тропарь, глас 2

Правдивая страсотерпцы и истинныя Евангелия Христова послушатели, целомудренный Романе с возлюбленным Давидом, не сопротив ста ста врагу суцу брату, убивающему телеса ваша, душам же коснутися не могуцу: да плачется убо злый властолюбец, вы же радующеса с лики ангельскими, предстояще Святей Троице, моли-

теся о державе сродников ваших, Богоугодней быти, и сыновом Российским спастися.

#### Молитва

О двоице священная, братие прекрасная, доблии страстотерпцы Борисе и Глебе, от юности Христу верою, чистотою и любовью послужившии, и кровми своими, яко багряницею украсившиися и ныне со Христом царствующии, не забудьте и нас сущих на земли, но яко теплии заступницы, вашим сильным ходатайством пред Христом Богом, сохраните юных во святей вере и чистоте неврежденными от всякаго прилога неверия и нечистоты, оградите всех нас от всякия скорби, озлоблений и напрасныя смерти, укротите всякую вражду и злобу, действием воздвигаемую от ближних и чуждых, Молим вас, христоролюбивии страстотерпцы, испросите у Великодаровитаго Владыки всем нам оставление прегрешений наших, единомыслие и здравие, избавление от нашествия иноплеменных, междоусобныя брани, язвы и глада. Снабдевайте своим заступлением всех чтущих святую память вашу во веки веков. Аминь.

**Варлааму Хутынскому, преп.**Тропарь, глас 3

Иже на земли леганием, пощением же и бдением тело Твое изнуряя, Преподобне! вся плотская мудрования умертвил еси, и исцелений Струя Независтная явился еси, верую притекающим к раце мощей Твоих, Варлааме Отче наш: моли Христа Бога, спаситися душам нашим.

Молитва

О Преподобне и Богоносне Отче наш Варлааме! Услыши нас молящихся Тебе и буди нам помощник в скорбех наших, и избави нас от напастей, за множество прегрешений находящих на ны; умоли, Угодниче Христов! Всеблагаго Бога даровати нам оставление всех от юности нашея до настоящего дне и часа, делом, словом, помышлением и всеми чувствами содеянных нами согрешений, исходатайствуй нам невозбранный вход в Небесное Царствие, да прославляем непрестанно Славимую от Ангел Всесвятую Троицу, Отца и Сына и Святаго Духа! и Твое милостивное предстательство в безконечныя Веки. Аминь! И Богу слава!

**Варваре, великомуч.**Тропарь, глас 8

Варвару святую почтим: вражия бо сети сокруши и, яко птица, избавися от них, помощию и оружием креста, всечестная.

Молитва

Святая славная и всехвальная великомученице Варваро! Собранныи днесь в храме твоем Божественном люди, раце мощей твоих поклоняющися и любовьию целующии, страдания же твоя мученическая, и в них самого Страстоположника Христа, давшаго тебе не точию еже в Него веровати, но и еже по Нем страдати, похвалами ублажающе, молим тя, известная желания нашего ходатаице: моли с нами и о нас, умоляемаго от Своего благоутробия Бога, да милостивно услышит нас, просящих Его благостыню, и не оставит от нас вся ко спасению и житию нужная прошения, и дарует христианскую кончину животу нашему — безболезненну, непостыдну, мирну, Божественных Тайн причастну, и всем, на всяком месте, во всякой скорби и обстоянии

требующим Его человеколюбия и помощи, великую Свою подаст милость, да благодатию Божиею и твоим теплым предстательством, душою и телом всегда здрави пребывающе, славим дивнаго во святых Своих Бога Израилева, не удаляющаго помощи Своея от нас всегда, ныне и присно, и во веки веков, аминь.

**Василию Великому, свят.**

Тропарь, глас 1

Во всю землю изыде вещание твое, яко приемшую слово твое, имже боголепно научил еси, естество сущих уяснил еси, человеческия обычаи украсил еси, царское священне отче преподобне, моли Христа Бога спастися душам нашим.

Молитва

О великий и преславный святителю Христов, всея вселенския Церкви учителю богомудрый, православия твердый исповедниче и поборниче, всеблаженне отче Василие! Призри от высот небесных на нас, смиренно к тебе припадающих, и умоли Господа Вседержителя, Егоже верный на земли служитель был еси, да дарует нам веры



правья твердое и неизменное сохранение, Церкви святей послушание, жития нашего исправление, и во всех нуждах, скорбех и искушениях скорое поможение, терпение же и укрепление. Подаждь нам твое святое благословение, да оным осеняемии, сие новое лето и во вся дни богоугодно в мире и покаянии проживем и во Царствии Небеснем сподобимся купно с тобою и со всеми святыми Живоначальную Троицу воспевати и славити, Отца и Сына и Святаго Духа, во веки веков. Аминь.

#### Величание

Величаем тя, святителю Христов Василие, благочестно Церковь Христову сохраншаго.

#### **Василию Новому, преп.**

О священная главо, преподобне отче, преблаженне авво Василие! Не забуди убогих твоих до конца, но поминай нас всегда во святых и благоприятных молитвах к Богу: помяни стадо твое, еже сам упасл еси, и не забуди посещати чад твоих моли за ны, отче священный, за дети твоя духовныя, яко имеяй дерзновение к Небес-

ному Царю: не премолчи за ны ко Господу, и не презри нас, верою и любовию чтущих тя: поминай нас недостойных у Престола Вседержителя, и не престай моляся о нас ко Христу Богу, ибо дана тебе бысть благодать за ны молитися. Не мним бо тя суща мертв: аще бо телом и представился еси от нас, но и по смерти жив сый пребываеши, не отступай от нас духом, сохраняя нас от стрел вражиих и всякия прелести бесовския и козней диавольских, пастырю наш добрый. Аще бо и мощей твоих рака пред очима нашими видима есть всегда, но святая твоя душа со ангельскими воинствы, со безплотными лики, с небесными силами, у престола Вседержителя предстоящи, достойно веселится, ведуще убо тя воистину и по смерти жива суща, тебе припадаем и тебе молимся: молися о нас Всесильному Богу, о пользе душ наших, и испроси нам время на покаяние, да невозбранно преидем от земли на небо, от мытарств же горьких, бесов воздушных князей и от вечныя муки да избавимся, и Небеснаго Царствия наследницы да будем со всеми праведными, от века угодившими Господу нашему Иисусу Христу: Ему же подобает всякая

слава, честь и поклонение, со Безначальным Его Отцем, и с Пресвятым и Благим и Животворящим Его Духом, ныне и присно, и во веки веков. Аминь.

**Вонифатию, муч.**

Тропарь, глас 4

Мученик Твой, Господи Вонифатие, во страданиях своем венец прият нетленный от Тебе Бога нашего имей бо крепость Твою, мучителей низложи, сокруши и демонов немощныя дерзости того молитвами спаси души наши.

Молитва первая

О многострадальный и всехвальный мучениче Вонифатие! Ко твоему заступлению ныне прибегаем, молений нас, поющих тебе, не отвержи, но милостиво услыши нас. Виждь братию и сестры наша, тяжким недугом пианства одержимыя, виждь того ради от матери своея, Церкви Христовой и вечнаго спасения отпадающия. О святыи мучениче Вонифатие, коснися сердцу их данной ти от Бога благодатию, скоро возстави от падений греховных и ко спасительному воздер-

жанию приведи их. Умоли Господа Бога, Его же ради страдал еси, да простив нам согрешения наша, не отвратит милости Своея от сынов Своих, но да укрепит в нас трезвение и целомудрие, да поможет Своею десницею трезвящимся спасительный обет свой до конца сохранить во дни и ночи, о нем бодрствующе и о нем добрый ответ на Страшном Судилище дати. Приими, угодниче Божий, молитвы матерей, о чадах своих слезы проливающих; жен честных, о мужех своих рыдающих, чад сирых и убогих, от пианиц оставленных, всех нас, иконе твоей припадающих, и да приидет сей вопль наш молитвами твоими ко престолу Всевышняго даровати всем по молитвам их здравие и спасение душ и телес, наипаче же Царстве Небесное. Покрый и соблюди нас от лукаваго ловления и всех козней вражиих, в страшный час исхода нашего помози прейти непреткновенно воздушные мытарства и молитвами твоими избави вечнаго осуждения. Умоли же Господа даровати нам к Отечеству нашему любовь нелицемерную и непоколебимую, пред врагами Церкви святых видимыми и невидимыми силу непобедимую, да покрывает нас

милость Божия в нескончаемые веки веков.  
Аминь.

Молитва вторая - от пьянства и всякой страсти

Спаси, Господи, и помилуй рабов Твоих (имярек) словесами божественного Евангелия Твоего, читаемыми о спасении рабов Твоих сих (имярек). Попали, Господи, терние всех согрешений их, вольных и невольных, и да вселится в них благодать Твоя, просвещающая, опаляющая, очищающая сего человека. Во имя Отца и Сына и Святаго Духа. Аминь.

**Владимиру, равноап.**

Тропарь, глас 4

Уподобился еси купцу, ищущему добраго бисера, славнодержавный Владимире, на высоте стола сидя матери градов, богоспасаемого Киева, испытывая же и посылая к царскому граду увести православную веру, и обрел еси бесценный бисер, Христа, избравшаго тя, яко втораго Павла, и оттрясшаго слепоту во святей купели, душевную вкупе и телесную. Тем же празднуем твое успе-

ние, людие твои суще: моли спастися державы твоея Российския начальником, Христоролюбивому православному народу.

#### Молитва

О великий угодниче Божий, богоизбранный и богопрославленный, равноапостольный княже Владимире! Ты отринул еси зловерие и нечестие языческое, уверовал еси во Единого Истинного Триипостаснаго Бога и, восприяв Святое Крещение, просветил еси светом Божественныя веры и благочестия всю страну Русскую. Славяще убо и благодаряще Премилосердаго Творца и Спасителя нашего, славим, благодарим и тя, просветителя наш и отче, яко тобою познахом спасительную веру Христову и крестихомся во Имя Пресвятыя и Пребожественныя Троицы: тою верою избавихомся от праведнаго осуждения Божия, вечнаго рабства диаволя и адова мучительства: тою верою восприяхом благодать всыновления Богу и надежду наследования Небеснаго блаженства. Ты еси первый вождь наш к Начальнику и Совершителю нашего вечнаго спасения Господу Иисусу Христу; ты еси теплый молит-

венник и ходатай о стране Русской, о воинстве и о всех людех. Не может язык наш изобразити величие и высоту благодеяний, тобою излианных на землю нашу, отцев и праотцев наших и на нас, недостойных. О всеблагий отче и просветителю наш! Призри на немощи наша и умоли премилосердаго Царя Небеснаго, да не прогневается на ны зело, яко по немощем нашим по вся дни согрешаем, да не погубит нас со беззаконьми нашими, но да помилует и спасет нас, по милости Своей, да всадит в сердце наше спасительный страх Свой, да просветит Своею благодатию ум наш, во еже разумети нам пути Господни, оставити стези нечестия и заблуждений, тцатися же во стезях спасения и истины, неуклоннаго исполнения заповедей Божиих и уставов Святыя Церкви. Моли, благосерде, Человеколюбца Господа, да пробавит нам великую милость Свою, да избавит нас от нашествия иноплеменных, от внутренних нестроений, мятежей и раздоров, от глада, смертоносных болезней и от всякаго зла, да подаст нам благорастворение воздуха и плодоносие земли, да даст пастырем ревность о спасении пасомых, всем же людем

споспешение о еже усердно службы своя исправляти, любовь между собою и единомыслие имети, на благо же Отечества и Святыя Церкви верне подвизатися, да возсияет свет спасительная веры в стране нашей во всех концах ея, да упразднятся вся ереси и расколы, да тако поживше в мире на земли, сподобимся с тобою вечнаго блаженства, хваляще и превозносяще Бога во веки веков. Аминь.

Величание

Величаем тя, святыи равноапостольный княже Владимире, и чтем святую память твою, идолы поправшаго и всю Российскую землю святым крещением просветившаго.

**Владимиру Московскому, муч.**

**Вячеславу Чешскому, благ. кн.**

Тропарь, глас 4

Днесь Ангели с человеки радуются вкупе общим веселием. Небо и земля светло ликуют в память ти, святе. И мы, грешнии, прилежно ти вопием: помолись к Владыце о нас, избавити ны



от напасти, видимых и невидимых враг, чтущих пресветлую ти память.

#### Молитва

О святой княже Вячеславе! Усердно просим тя молиться за ны (имена), да простит Господь Бог наши согрешения вольные и невольные и очистит нас от всякия скверны плоти и духа, да избавит нас от козней диавола и сохранит от клеветы людския, да утвердит нас в истинной вере и благочестии, да соблюдет от суемудрых и душетленных учений, да сохранит сердца наша от соблазнов мира сего и да научит огребатися от плотских страстей и похотей, да тако горняя мудрствовати, а не земная, прославляя Единую Троицу во веки и в век века. Аминь.

#### **Вере, Надежде и Любви, и матери их Софии, мучч.**

#### Тропарь, глас 4

Торжествует Церковь первородных, и свеселится приемля мать о чадах веселящуюся, яже яко мудрости тезоименитая, тройственным бого-

словским добродетелем равночисленныя породи. Тья с мудрыми девами зрит уневестившиися Жениху Богу Слову. С нею и мы духовне в памяти их свеселимся, глаголюще: Троицы поборницы, Веро, Любве и Надеждо, в вере, любви и надежде утверждайте нас.

#### Молитва

О святыя и достохвальныя мученицы Веро, Надеждо и Любы, и доблестных дщереи мудрая мати Софие, к вам ныне притецем со усердною молитвою; что бо паче возможет прдстательствовати за ны пред Господем, аще не вера, надежда и любы, три сия краеугольныя добродетели, в нихже образ нареченныя, самую вещью тыя яviste! Умолите Господа, да в скорбех и напастех неизреченною благодатию Своею покрывает ны, спасет и сохранит, яко благ есть и Человеколюбец. Того славу, яко солнце незаходимое, ныне зряще светолепну, споспешествуйте, нам во смиренных молениях наших, да простит Господь Бог грехи и беззакония наша, и да помилует нас грешных и недостойных щедрот Его. Молите убо о нас, святыя мученицы,

Господа нашего Иисуса Христа, Ему же славу воссылаем, со Безначальным Его Отцем и Пресвятым и Благим и Животворящим Его Духом, ныне, присно и во веки веков. Аминь.

**Гурию, Самону и Авиву, мучч.**

Тропарь, глас 5

Чудеса святых Твоих мученик стену необориму, нам даровавший, Христе Боже, тех молитвами советы языков разори, Церковь святую укрепи, яко един Благ и Человеколюбец.

Молитва

О преславнии мученицы Гурие, Самоне и Авиве! Защитите нас, раб Божиих (имена), от напастей злых человек и козней демонских: оградите нас от нечаянной смерти, избавите от огня, меча и всякаго душепагубнаго обстояния. Ей, страсто-терпцы Христовы, устройте нам молитвами вашими вся благая и полезная, да благочестно житие временное прешедше и кончину непостыдну стяжавше, удостоимся теплым заступлением вашим со всеми святыми одесную Правосуднаго Бога Судии стати и Того непрестанно

славити, со Отцем и Святым Духом, во веки веков.

**Георгию Победоносцу, великомуч.**

Тропарь, глас 4

Подвигом добрым подвизался еси, страсто-терпче Христов Георгие, и веры ради обличил еси мучителей нечестие: жертва же благоприятна Богу принеслася еси. Темже и венец приял еси победы, и молитвами, святе, твоими, всем подаеши прегрешений прощение.

Молитва

О всехвальный, святыи великомучениче и чудотворче Георгие! Призри на ны скорою твоею помощию, и умоли Человеколюбца Бога, да не осудит нас, грешных, по беззакониям нашим, но да сотворит с нами по велицей Своей милости. Не презри моления нашего, но испроси нам у Христа Бога нашего тихое и богоугодное житие, здравие же душевное и телесное, земли плодородие, и во всем изобилие, и да не во зло обратим благая, даруемая нам тобою от Всецедраго Бога, но во славу святаго имени Его и в прослав-

ление крепкаго твоего заступления, да подаст Он стране нашей и всему боголюбивому воинству на супостаты одоление и да укрепит непременимым миром и благословением. Изряднее же да оградит нас святых ангел Своих ополчением, во еже избавитися нам, по исходе нашем из жития сего, от козней лукаваго и тяжких воздушных мытарств его, и неосужденным предстати Престолу Господа Славы. Услыши ны, страстотерпче Христове Георгие, и моли за ны непрестанно Триипостаснаго Владыку всех Бога, да благодатию Его и человеколюбием, твоею же помощию и заступлением обрящем милость, со ангелы и архангелы и всеми святыми одесную Правосудного Судии стати, и Того выну славити со Отцем и Святым Духом, ныне и присно, и во веки веков. Аминь.

**Герману Аляскинскому, преп.**

Тропарь, глас 7

Звездо пресветлая Церкве Христовы, на севере просиявшая, вся к Царствию Небесному путево-  
дящая, учителю и апостоле истинныя веры, пред-  
стателю и заступниче гонимых, украшение изящ-

ное Святыя Церкви во Америце, преподобне отче Германе Аляскинский, молися ко Господу Спасу нашему, спастися душам нашим.

#### Молитва

О преподобне отче Германе, новоявленный угодниче, Аляски просветителю! Молим тя: ходатайствуй нас, грешных рабех Божиих (имена), пред престолом Вседержителя Бога, да дарует нам вся потребная животу и благочестию, душам и телесем нашим здравие, во всех благих преспеяние и Свою всеильную помощь во всяких искушениях, бедах же и напастех, воздвигаемых на ны от врага спасения нашего. Наипаче же испроси, угодниче Христов, всем нам грехов отпущение, христианскую кончину жития и наследие Царствия Небеснаго у Христа Бога нашего, Ему же честь и слава, со Отцем и Святым Духом, ныне и присно и во веки веков.

#### **Сергию и Герману Валаамским, препп.**

О преподобнии и Богоноснии отцы наши Сергие и Германе! С верою и любовию припадающе к святей иконе вашей, умиленно молим

вас: не забудьте нас, недостойных и грешных (имена), но предстательством вашим оградите нас от злых козней вражих: утолите возстание страстей: укрепите немощь нашу в духовных бранех и подвизах, подлежащих нам: отжените всякое уныние и печаль греховную от сердец наших, и небесное утешение низпослите нам во трудех и скорбех наших. В страшный же час смертный предстаните всем нам, яко же блазии ходатаи и темных зраков демонских прогонители: да в мире и покаянии скончавше земное поприще наше, достигнем и вечных благ наслаждения, и купно с вами да воспоем и прославим все-святое имя Отца и Сына и Святаго Духа, ныне и присно и во веки веков. Аминь.

**Молитва преподобному Давиду Га-  
реджийскому**

О всесветле, богохвальне, авва Давиде, святче Божий! Ты силою благаго законоположения явился еси нам, кознями лукаваго связанным и обуреваемым, яко наставник в покаянии и помощник в молитве. Того ради дано тебе множество даров благодати и чудотворения, раз-

решения грех наших и прегрешений оставление, болезней исцеление и диавольских наветов отгнание. Темже твоею отеческою милостию в богоцарственном разумении, многотрудными молитвами и молениями твоими, наипаче же непрестанным твоим заступлением о нас, рабах Божиих (имена), да возставит Господь Бог ны, во грех впадшие, силою Своею непобедимою на всякаго видимаго и невидимаго врага, дабы благодаряще совершая святую память твою, желанием возжелали мы поклоняться Превечному Богу в Троице Единому, Отцу и Сыну и Святому Духу, ныне и присно и во веки веков. Аминь.

### **Давиду, Псалмопевцу**

#### Тропарь, глас 2

Пророка твоего Давида память, Господи, празднующе, тем Тя молим: спаси души наша.

#### Молитва

О святыи угодниче Божий, царю и пророче Давиде! Подвигом добрым подвизався на земли, восприял еси на Небесех венец правды, егоже уготовал есть Господь всем любящим Его.



Темже взирающе на святыи твой образ, радуемся о преславнем скончании жительства твоего и чтем святую память твою. Ты же, предстоя Престолу Божию, приими моления наша и ко Всемилостивому Богу принеси, о еже простити нам всякое прегрешение и помощи нам стати противу кознем диавольским, да избавльшеся от скорбей, болезней, бед и напастей и всякаго зла, благочестно и праведно поживем в нынешнем веце и сподобимся предстательством твоим, аще и недостойни есмы, видети благая на земли живых, славяще Единого во святых Своих славимаго Бога, Отца и Сына и Святаго Духа, ныне и во веки веков. Аминь.

**Даниилу Московскому, благ. кн.**

Тропарь, глас 3

Явился еси в стране нашей, яко звезда пресветлая, благоверный княже Данииле, лучами света твоего озаряя град твой и обитель твою людем православным поборник еси, пленным свободитель и нищим защититель, моли Христа Бога державе Российстей даровати мир и спасти души наша.

Молитва

Церкве Христовы похвало высокая, града Москвы стено неборимая, державы Российския Божественное утверждение, преподобне княже Данииле! К раце мощей твоих притекающе, усердно молим тя: призри на нас, память твою воспевающих и с верою под кров молитв твоих прибегающих. Пролей теплое твое ходатайство ко Спасу всех, яко да утвердит миром страну нашу, грады и веси ея и обитель сию добре да сохранит, благочестие и любовь в людех твоих насаждая, злобу же, междоусобие и нравов развращение искореняя. Всем же нам вся благая ко временному животу и вечному спасению даруй молитвами твоими, яко да прославляем дивнаго во святых Своих Христа, Бога нашего, во веки веков. Аминь.

**Димитрию Донскому, благ. кн.**Тропарь, глас 3

Велика обрете в бедах тя поборника земля Русская, языки побеждающа. Якоже на Доне Мамаеву низложил еси гордыню, на подвиг сей прияв

благословение преподобнаго Сергия, тако, княже Димитрие, Христу Богу молися, даровати нам велию милость.

#### Молитва

О святыи угодниче Божий, праведне Димитрие! Подвигом добрым подвизався на земли, восприял еси на Небесех венец правды, егоже уготовал есть Господь всем любящим Его. Темже взирающе на святыи твой образ, радуемся о преславнем скончании жительства твоего и чтем святую память твою. Ты же, предстоя Престолу Божию, приими моления наша и ко Всемилостивому Богу принеси, о еже простити нам всякое прегрешение и помощи нам стати противу кознем диавольским, да избавльшеся от скорбей, болезней, бед и напастей и всякаго зла, благочестно и праведно поживем в нынешнем веце и сподобимся предстательством твоим, аще и недостойни есмы, видети благая на земли живых, славяще Единого во святых Своих славимаго Бога, Отца и Сына и Святаго Духа, ныне и во веки веков. Аминь.

**Димитрию Ростовскому, свят.****Тропарь, глас 8**

Православия ревнителю и раскола искоренителю, Российский целебниче и новый к Богу молитвенниче, списаньми твоими буйх уцеломудрил еси, цевнице духовная, Димитрие блаженне, моли Христа Бога, спастися душам нашим.

**Молитва**

О святителю Димитрие, великий угодниче Христов, златоусте Российский! Услыши нас грешных, молящихся тебе, и принеси молитву нашу к Человеколюбцу Богу о рабах Божиих (имена). Умоли Его благосердие, да не осудит нас по беззаконием нашим, но да сотворит с нами по милости Своей. Испроси нам у Христа Бога нашего мирное и безмятежное житие, здравие душевное и телесное. Даруй нам богоугодно прейти поприще временныя жизни: избави нас от воздушных мытарств и настави нас на путь, ведущий в селения праведных; подаждь нам твое

архипастырское и святое благословение, да оным осеняеми, избавимся от козней лукаваго и избегнем от всякой беды и напасти. Услыши моление наше, отче Димитрие, и моли непрестанно о нас Всесильнаго Бога, славимаго и покланяемаго в трех ипостасех, Емуже подобает всякая слава, честь и держава во веки веков.

**Димитрию Солунскому, великомуч.**

Тропарь, глас 3

Велика обрете в бедах тя поборника вселенная, страсотерпче, языки побеждающа. Якоже убо Лиеву низложил еси гордыню, на подвиг дерзновенна сотворив Нестора: тако святе Димитрие, Христу Богу молися, даровати нам велию милость.

Молитва

Святой и славный великомучениче Христов Димитрие, скорый помощниче и теплый заступниче с верою притекающих к тебе! Предстоя с дерзновением Небесному Царю, испроси у Него прощение согрешений наших и о еже избавитися нам от всегубительных язвы, труса, потопа, огня,

меча и вечныя казни. Моли благость Его, еже ущедрити град сей, обитель сию и всякую страну христианскую. Исходатайствуй у Царя Царствующих на враги победу и одоление православным христианам, всей державе православной мир, тишину, твердость в вере и преспеяние во благочестии; нам же, чтущим честную память твою, испроси благодатное укрепление на дела благая, да благоутробное Владыце нашему Христу Богу zde творяще, сподобимся молитвами твоими наследовати Царствие Небесное для вечнаго прославления Его со Отцем и Святым Духом. Аминь.

**Екатерине, великомуч.**

Тропарь, глас 4

Добродетельми, яко лучами солнечными, просветила еси неверныя мудрецы: и якоже пресветлая луна ходящим в нощи, неверия тьму отгнала еси, и царицу уверила еси, вкупе же и мучителя обличила еси, богозванная невесто, блаженная Екатерино: желанием востекла еси в небесный чертог, к прекрасному Жениху Христу, и от Него царским венцем венчалася еси: Емуже со Ангелы

предстоящи, за ны молися, творящия пречестную память твою.

#### Молитва

О святая Екатерино, дево и мученице истинная Христова невесто! Молим тя чрез особливую благодать, еюже предвари тя Жених твой, Сладчайший Иисус: якоже посрамивши прелести мучителя, мудростию твоею пятьдесят ветий победила еси и, напоивши их Небесным учением, к свету истинныя веры наставила еси, тако испроси и нам оную Божию мудрость, да и мы, расторгнувше вся козни адскаго мучителя и презрев мира и плоти соблазны, достойны явимся Божественныя славы и к расширению святыя нашея православыя веры сосуды достойны соделаемся, и с тобою в Небесной скинии Господа и Владыку нашего Иисуса Христа хвалим и прославляем во вся веки. Аминь.

#### **Елисавете, препод-муч.**

##### Тропарь, глас 1

Смирением достоинство княжеское сокрывши,  
богомудрая Елисавето, сугубым служением

Марфы и Марии Христа почтила еси. Милосердием, терпением и любовью себе предпочитавши, яко жертва праведная Богу принеслася еси. Мы же, чтуща добродетельное житие и страдания твоя, яко истинную наставницу усердно просим тя: святая мученице великая княгине Елисавето, моли Христа Бога спасти и просветити души наша.

#### Молитва

О святая новомученицы Российския, великая княгине Елисавето и сестро ея крестовая пречестная инокине Варваро, купно путь свой во мнозех муках скончавшия, евангельския заповеди делом во Обители милосердия совершившия, веры ради православныя подвизающися до смерти в последняя времена сия, и добрый плод в терпении страстей Христу принесшия! Молитесь Ему, яко победителю смерти, да утвердит Церковь Русскую Православную и отечество наше, кровию и страданьми новомучеников искупленныя, и не даст в расхищение врагом России достояния нашего. Се бо лукавый враг вооружися на ны, хотя нас погубити в междоусобных бранех, скорбех, нестерпимых пе-



чалех, болезнях, нуждах и бедах лютых. Умолите Господа низложить вся немощныя дерзости их; веру в сердцах людей российских укрепите, да егда найдет на ны испытания час, мужества дар восприимем вашими молитвами, отвергшеся себе и взявше крест свой, последуем, Христу, распинающе плоть свою со страстьми и похотьми. Сохраните нас от всякаго зла, освятите пути жизни нашея, даруйте покаяние нелицемерное, тишину и мир душам нашим, испросите у Господа всем нам мытарств горьких и вечныя муки избавитися и Небесному Царствию наследники быти со всеми святыми, от века угодившими Богу, да радующеся воздадим хвалу, честь и поклонение Отцу и Сыну и Святому Духу во веки веков. Аминь.

**Игнатию Богоносцу, священномуч.**

Тропарь, глас 4

Апостольских нравов подражателю и престола их снаследниче, архиереев удобрение и мучени-

ков славо, Богодухновенне, на огонь, и меч, и звери дерзнул еси веры ради и, слово истины исправляя, до крове пострадал еси, священномучениче Игнатие, моли Христа Бога спастися душам нашим.

Молитва

О великий угодниче Христов, священномучениче Игнатие! Призри милостивым твоим оком и прости ко Господу теплыя твоя молитвы, и испроси душам нашим оставление прегрешений. Се бо мы, раби Божии (имена), сердцем сокрушенным и духом смиренным тебе, ходатая милостива ко Владыце и молитвенника за ны, грешныя, призываем, тебе убо просим: не презри нас недостойных, твоя помощи требующих, и исходатайствуй нам вся ко спасению полезная, яко да получивше благодать и милость, прославим всех благих Источника и Дародателя, Бога Единого, Отца и Сына и Святаго Духа, ныне и присно и во веки веков.

**Игнатию Брянчанинову, свят.**

Тропарь, глас 8

Православия поборниче, покаяния и молитвы делателю и учителю изрядный, архиереев

богодуховенное украшение, монашествующих славо и похвало: писании твоими вся ны целомудрил еси. Цевнице духовная, Игнатие Богомудре, моли Слова Христа Бога, Егоже носил еси в сердце твоём, даровати нам прежде конца покаяние.

#### Молитва

О великий и пречудный угодниче Христов, святителю отче Игнатие! Милостиво прими молитвы наша, с любовью и благодарением тебе приносимыя! Услыши нас сирых и беспомощных, к тебе с верою и любовью припадающих и твоего теплаго предстательства о нас пред Престолом Господа Славы просящих. Ве мы, яко много может молитва праведника, Владыку умиловляющая. Ты от лет младенческих Господа пламенно возлюбил еси и Ему Единому служити восхотев, вся красная мира сего ни во чтоже вменил еси. Ты отвергся себе и взял крест твой, Христу последовал еси. Ты путь узкий и прискорбный жития иноческаго волею себе избрал еси и на сем пути добродетели великия стяжал еси. Ты писаньми твоими сердца человеков глубочайшаго благоговения и покорности пред

Всемогущим Творцом исполнял еси, грешников же падших мудрыми словесы твоими в сознании своего ничтожества и своей греховности, в покаянии и смирении прибегати к Богу наставлял еси, ободряя их упованием на Его милосердие. Ты николиже притекавших к тебе отвергал еси, но всем отец чадолюбивый и пастырь добрый был еси. И ныне не остави нас, усердно тебе молящихся и твоея помощи и предстательства просящих. Испроси нам у человеколюбиваго Господа нашего здравие душевное и телесное, утверди веру нашу, укрепи силы наша, изнемогающия во искушениях и скорбех века сего, согрей огнем молитвы охладевшая сердца наша, помоги нам, покаянием очистившимся, христианскую кончину живота сего получитьи и в чертог Спасов преукрашенный внити со всеми избранными и тамо купно с тобою поклонятися Отцу и Сыну и Святому Духу во веки веков. Аминь.

**Илии пророку**

Тропарь, глас 4

Во плоти Ангел, пророков основание, второй предтеча пришествия Христова Илия славный,

свыше пославый Елисееви благодать недуги отгоняти и прокаженныя очищати: темже и почитающим его точит исцеления.

Кондак, глас 2

Пророче и провидче великих дел Бога нашего, Илие великоимените, вещанием твоим уставивый водоточныя облаки, моли о нас единого Человеколюбца.

Молитва

О святыи пророче Божий Илие, моли о нас Человеколюбца Бога, да подаст нам, рабам Божиим (имена), дух покаяния и сокрушения о гресех наших, и всеильною Своею благодатию да поможет нам пути нечестия оставити, преспевати же во всяком деле блазе, и в борьбе со страстьми и похотьми нашими да укрепит нас; да всадит в сердца наша дух смирения и кротости, дух братолюбия и незлобия, дух терпения и целомудрия, дух ревности ко славе Божией и о спасении

своим и ближних доброе попечение. Отврати от нас предстательством твоим праведный гнев Божий, да тако в мире и благочестии поживше в сем веце, сподобимся причастия вечных благ во Царствии Господа и Спаса нашего Иисуса Христа, Емуже подобает честь и поклонение, со Безначальным Его Отцем и Пресвятым Духом, во веки веков.

Величание

Величаем тя, святой славный пророче Божий Илие, и чтим еже на небеса на колеснице огненной преславное восхождение твое.

**Иоакиму и Анне, богоотцам**

Тропарь, глас 1

Иже в законней благодати праведни бывше, Младенца богоданнаго породилши нам, Иоаким и Анна. Темже днесь светло торжествует, весело празднующи божественная Церковь, честную вашу память, славящи Бога, воздвигшаго рог спасения нам в дому Давидове.

Молитва

О святити праведницы, Богоотцы Иоакиме и Анно! Молите Милосердаго Господа, яко да отвратит от нас гнев Свой, по делом нашим праведно на ны движимый, и да безчисленная прегрешения наша презрев, обратит нас, раб Божиих (имена), на путь покаяния, и на стези заповедей Своих да утвердит нас. Таже молитвами вашими в мире жизнь нашу сохраните, и во всех благих благое поспешение испросите, вся к животу и благочестию потребная нам от Бога дарующе, от всяких напастей и бед и внезапных смерти предстательством вашим нас избавляюще и от всех враг видимых и невидимых защищающе, и тако в мире временное сие житие прешедше. в вечный достигнем покой, идеже вашим святым умолением да сподобимся Небеснаго Царствия Христа Бога нашего, Емуже, со Отцем и Пресвятым Духом, подобает всякая слава, честь и поклонение во веки веков.

**Иоанну Богослову, ап. и ев.**

Тропарь, глас 2

Апостоле, Христу Богу возлюбленне, ускори избавити люди безответны: приемлет тя припадающа, иже падша на перси приемый Егоже моли, Богослове, и належащую мглу языков разгнати, прося нам мира и велия милости.

Кондак, глас 2

Величия твоя, девственнице, кто повесть? Точиши бо чудеса и изливаеши исцеления, и молишися о душах наших, яко Богослов и друг Христов.

Молитва

О великий апостоле, евангелисте громогласный, Богослове изящнейший, тайновидче неизреченных откровений, девственнице и возлюбленный наперснице Христов Иоанне! Приими нас, грешных, под твое сильное заступление прибегающих. Испроси у Всещедраго Человеколюбца Христа Бога нашего, Иже пред очесы твоими Кровь Свою за ны, непотребныя рабы Своя, излиал есть, да не помянет беззаконий наших, но да помилует нас и сотворит с нами по милости Своей: да дарует нам здравие душевное и телес-



ное, всякое благоденствие и изобилие, наставляя нас обращати оная во славу Его, Творца, Спасителя и Бога нашего, по кончине же временныя жизни наша от немилосердных истязателей на воздушных мытарствах да избавит нас, и тако да достигнем, тобою водимии и покрываемии, Горняго онаго Иерусалима, егоже славу ты во откровении зрел еси, ныне же нескончаемая радости наслаждаешься. О великий Иоанне! Сохрани вся грады и страны христианския, храм сей, служащих и молящихся в нем, от глада, губительства, труса и потопа, огня и меча, нашествия иноплемennых и междоусобных брани; избави нас от всякия беды и напасти и молитвами твоими отвори от нас праведный гнев Божий, и Его милосердие нам испроси, да вкупе с тобою сподобимся прославляти в невечернем дни пресвятое имя Отца и Сына и Святаго Духа во веки веков. Аминь.

#### Величание

Величаем тя, апостоле Христов и Евангелисте Иоанне Богослове, и чтем болезни и труды твоя, имиже трудился еси во благовестии Христове.

**Иоанну Воину**Тропарь, глас 4

Всеблагаго Бога и Царя благоверный раб и воин явился еси, Иоанне чудодетелю, пострадав бо ради веры мужески, блаженно же скончав течение, зриши Всетворца Господа в небесех светлейше. От Негоже прием дарование чудес, страждущим человеком во всяких напастех помогаеши, укрепляеши воины в ратех, от врагов пленения, ран же и внезапных смертей и от бед лютых изымаеши. Темже моли Владыку Христа, приснопамятно, да во всяком обстоянии сотворит нам милость, и не введет нас во искушения, но спасет души наша, яко Человеколюбец.

Молитва

О, мучениче Христов Иоанне Воине! Храбрый во бранех, и скорый заступник православных христиан в бедах и напастях их, по данной благодати от Бога! Буди нам поборник крепок на вся видимыя и невидимыя враги наша. Воинству нашему на враги победу даруй, да смирятся противящиися нам и вразумятся, и Бога истиннаго познают и святую Его Церковь Православную.

Мы же, грешнии, да сподобимся прославляти Господа Спаса нашего во Царствии Его вкупе с тобою во веки. Аминь.

**Иоанну Златоустому, свят.**

Тропарь, глас 8

Уст твоих якоже светлость огня возсиявши благодать, вселенную просвети: не сребролюбия мирови сокровища сниска, высоту нам смиренномудрия показа. Но твоими словесы наказуя, отче Иоанне Златоусте, моли Слова Христа Бога, спастися душам нашим.

Кондак, глас 6

От небес приял еси Божественную благодать и твоими устнами вся учиши покланяться в Троице Единому Богу, Иоанне Златоусте, всеблаженне преподобне, достойно хвалим тя: еси бо наставник, яко божественная являя.

Молитва вторая

О святителю великий Иоанне Златоусте! Многая и различная дарования от Господа приял еси и, яко раб благий и верный, вся данная тебе

таланты добре умножил еси, сего ради воистину вселенский учитель был еси, яко всяк возраст и всяко звание от тебе поучается. Мы же, грешнии (имена), по единому кийждо свое дарование имуще, единения духа в союзе мира не имамы, но бываем тщеславии, друг друга раздражающе, друг другу завидяще; сего ради дарования наша разделенная не в мир и спасение, но во вражду и осуждение нам являются. Темже к тебе, святителю Божий, припадаем, раздором обуреваемы, и в сокрушении сердца просим: молитвами твоими отжени от сердец наших всяку злобу, недоброжелательство, гордость и зависть, нас разделяющия, да во многех удех едино тело церковное невозбранно пребудем, да по словеси твоему молитвенному возлюбим друг друга и единомыслием исповемы Отца и Сына и Святаго Духа, Троицу Единосущную и Нераздельную, ныне и присно, и во веки веков. Аминь.

**Иоанну Предтече**

Тропарь на Усекновение главы Иоанна Предтечи, глас 2

Память праведнаго с похвалами, тебе же довлеет свидетельство Господне, Предтече: показал бо ся еси воистинну и пророков честнейший, яко и в струях крестити сподобился еси Проповеданнаго: тем же за истину пострадав, радуясь, благовестил еси и сущим во аде Бога, явльшагося плотию, вземлющаго грех мира и подающаго нам велию милость.

#### Кондак, глас 5

Предтечево славное усекновение, смотрение бысть некое Божественное, да и сущим во аде Спасово проповестъ пришествие; да рыдает убо Иродиа, незаконное убийство испросивши: не закон бо Божий, ни живый век возлюби, но притворный, привременный.

#### Молитва

Крестителю Христов, честный Предтече, крайний пророче, первый мучениче, постников и пустынников наставниче, чистоты учителю и ближний друже Христов! Тя молю, и тебе прибегая не отрини мене от твоего заступления, не остави мя падшего многими грехи; обнови душу мою пока-

янием, яко вторым крещением; очисти мя, грехи оскверненнаго, и понуди внити, иможе ничтоже скверно входит, в Царствие Небесное. Аминь.

Величание

Величаем тя, Крестителю Спасов Иоанне, и почитаем вси честныя твоя главы усекновение.

**Иоанну Кронштадтскому, прав.**

Тропарь, глас 1

Православныя веры поборниче, земли Рос-  
сийския печальниче, пастырем правило и образе  
верным, покаяния и жизни во Христе проповед-  
ниче. Божественных Тайн благоговейный служи-  
телю и дерзновенный о людех молитвенниче, от-  
че праведный Иоанне, целителю и предивный  
чудотворче, граду Кронштадту похвало и церкви  
нашея украшение, моли Всеблагаго Бога уми-  
рити мир и спасти души наша.

Кондак, глас 3

Днесь пастырь Кронштадтский предстоит Пре-  
столу Божию и усердно молит о верных Христа

Пастыреначальника, обетование давшего: “Созиду Церковь Мою и врата ада не одолеют ей”.

#### Молитва

О великий угодниче Христов, святой праведный отче Иоанне Кронштадтский, пастырю дивный, скорый помощниче и милостивый предстателю! Вознося славословие Троидиному Богу, ты молитвенно взывал: Имя Тебе — любовь: не отвергни меня, заблуждающагося. Имя Тебе — Сила: укрепи меня, изнемогающаго и падающаго. Имя Тебе — Свет: просвети душу мою, омраченную житейскими страстями. Имя Тебе — Мир: умири мятущуюся душу мою. Ныне благодарная твоему предстательству всероссийская паства молится тебе: Христоименный и праведный угодниче Божий! Любвию твоею озари нас, грешных и немощных, сподоби нас принести достойные плоды покаяния и не осужденно причащаться Христовых Таин. Силою твоею веру в нас укрепи, в молитве поддержи, недуги и болезни исцели, от напастей, врагов, видимых и невидимых, избави. Светом лика твоего служителей и предстоятелей Алтаря Хри-

стова на святые подвиги пастырского делания подвижни, младенцем воспитание даруй, юное настави, старость поддержи, святыни храмов и святые обители озари! Умири, чудотворче и провидче преизряднейший, народы страны наша, благодатию и даром Святаго Духа избави от междуусобных брани, расточенная собери, прельщенные обрати и совокупи Святей Соборней и Апостольской Церкви. Милостию твоею супружества в мире и единомыслии соблюди, монашествующим в делах благих преуспеяние и благословение даруй, малодушныя утеша, страждущих от духов нечистых свободи, в нуждах и обстояниях сущих помилуй и нас на путь спасения настави. Во Христе живый, отче наш Иоанне, приведи нас к Невечернему Свету жизни вечныя, да сподобимся с тобою вечнаго блаженства, хваляще и превозносяще Бога во веки веков. Аминь.

**Мефодию и Кириллу, святт.**

Тропарь, глас 4

Яко Апостолом единомравнии и Словенских стран училие, Кирилле и Мефодие богомуд-



рии, Владыку всех молити, вся языки Словенския утвердите в православии и единомыслии, умирите мир и спасти души наша.

#### Кондак, глас 3

Священную двоицу просветителей наших почитим, Божественных писаний преложением источник богопознания нам источивших, из негоже даже до днесь неоскудно почерпающе ублажаем вас, Кирилле и Мефодие, Престолу Вышняго предстоящих и тепле молящихся о душах наших.

#### Молитва

О преславнии язык словенских учителя и просветителие, святии равноапостольнии Мефодие и Кирилле. К вам, яко чада ко отцем, светом учений и писмен ваших просвещеннии и в вере Христовой наставленнии, ныне усердно прибегаем и в сокрушении сердец наших молимся. Аще бо и завет ваших, яко чада непокоривая, не соблюдохом и о угождении Богу, якоже учисте, небрегохом, и от единомыслия и любве, юже словеном, яко братьям в вере и по плоти, добре завещаете, отпадохом, обаче, якоже древле в жи-

тии вашем неблагодарных и недостойных не отвращаете тщи, но благими за злая воздавате, тако и ныне грешных и недостойных чад ваши молитвы не отворотите, но, яко велие имуще дерзновение ко Господу, прилежно Того молитесь, да наставит и обратит нас на путь спасения, распри же и раздоры, посреде единовѣрных братии возникающия, умирит, отпадшия паки во единомыслие приведет и всех нас единением духа и любви во единой, Святей, Соборней и Апостольстей Церкви соединит. Вемы бо, вемы, яко много может молитва праведника ко благосердию Владыки, аще и о грешных людех приносима бывает. Не оставите убо нас, унылых и недостойных чад ваших, ихже грех ради паства ваша, вами собранная, враждою разделяема и соблазны от иноверных прельщаема, умалися, овцы же ея словесныя разсеваемы, от волков мысленных восхищаются, дадите убо нам молитвами вашими о православии ревность, да ею возгреваемы, отеческая предания добре сохраним, уставы и обычаи церковныя верно соблюдати потщимся, всяких лжеучений странных отбежим и тако, в житии богоугоднем на земли преспевающе, жиз-

ни райския на небеси сподобимся, и тамо с вами вкупе Владыку всех, в Троице Единого Бога прославим во веки веков. Аминь.

Величание

Величаем вас, святии равноапостольнии Кирилле и Мефодие, вся Словенския страны ученьми своими просветившыя и ко Христу приведшыя.

**Константину и Елене, равноап.**

Тропарь, глас 8

Креста Твоего образ на небеси видево, и якоже Павел звание не от человек прием, во царех Апостол Твой, Господи, царствующий град в руке Твоей положи: егоже спасай всегда в мире молитвами Богородицы, единае Человеколюбче.

Кондак, глас 3

Константин днесь, с материю Еленою, крест являют всечестное древо, всех убо Иудеов посрамление суще, оружие же на противныя вер-

ных царей: нас бо ради явися знамение велие и во бранех грозное.

#### Молитва

О предивнии и всехвальнии царие, святии равноапостольнии Константине и Елено! К вам, теплым заступником, возносим наши недостойныя молитвы, яко велие имате дерзновение ко Господу. Испросите у Него мир Церкви и всему миру благоденствие, начальником мудрость, пастырем попечение о пастве, пасомым смирение, старцем желанное упокоение, мужем крепость, женам благолепие, девственником чистоту, детям послушание, младенцем христианское воспитание, больным исцеление, враждующим примирение, обидимым терпение, обидящим страх Божий. Приходящим в храм сей и молящимся в нем святое благословение и всем вся по коегождо прошению полезная, да хвалим и поем Благодетеля всех Бога в Троице славимаго Отца, и Сына, и Святаго Духа, ныне и присно и во веки веков. Аминь.

#### Величание

Величаем вас, святии благовернии и равноапостольнии царице Константине и Елено, и чтим святую память вашу, вы бо святым Крестом всю вселенную просветили есте.

**Ксении Петербургской, блаж.**

Тропарь, глас 7

Нищету Христову возлюбивши, безсмертныя трапезы ныне наслаждаешия, безумием мнимым безумие мира обличивши, смирением крестным силу Божию восприяла еси. Сего ради дар чудодейственныя помощи стяжавшая, Ксении блаженная, моли Христа Бога избавитися нам от всякаго зла покаянием.

Кондак, глас 3

Днесь светло ликует град святаго Петра, яко множество скорбящих обретает утешение, на твоя молитвы надеющиеся, Ксении всеблаженная, ты бо еси граду сему похвало и утверждение.

Молитва

О святая всеблаженная мати Ксении! Под покровом Всевышняго жившая, ведомая и укрепля-

емая Богородицею, голод и жажду, холод и зной, поношения и гонения претерпевшая, дар прозорливости и чудотворения от Бога получила еси и под сенью Всемогущего покоишися. Ныне святая Церковь, яко благоуханный цвет, прославляет тя. Предстояще на месте твоего погребения, пред образом твоим святым, яко живей ти, сущей с нами, молимся ти: приими прошения наша и принеси их ко престолу милосерднаго Отца Небеснаго, яко дерзновение к Нему имущая, испроси притекающим к тебе вечное спасение, на благая дела и начинания наша щедрое благословение, от всяких бед и скорбей избавление. Предстани святыми твоими молитвами пред Всемилостивым Спасителем нашим о нас, недостойных и грешных. Помози, святая блаженная мати Ксение, младенцы светом святого крещения озарити и печатию дара Духа Святаго запечатлети, отроки и отроковицы в вере, честности, богобоязненности воспитати и успехи в учении им даровати; болящия и недугующия исцели, семейным любовь и согласие ниспосли, монашествующих подвигом добрым подвизатися удостой и от поношений огради, пастыри в крепости Духа

Святаго утверди, народ и страну нашу в мире и безмятежии сохрани, о лишенных в предсмертный час причащения Святых Христовых Тайн умоли. Ты наша надежда и упование, скорое услышание и избавление, тебе благодарение воссылаем и с тобою славим Отца и Сына и Святаго Духа, ныне и присно, и во веки веков. Аминь.

**Луке, ап. и ев.**

Тропарь, глас 5

Апостольских деяний сказателя и Евангелия Христова светла описателя, Луку препетаго, славна суца Христове Церкви, песньми священными святаго апостола похвалим, яко врача суца, человеческие немощи, естества недуги и язи душ исцеляюща и молящася непрестанно за души наша.

Кондак, глас 2

Истиннаго благочестия проповедника и тайн неизреченных ритора, звезду церковную, Луку Божественнаго восхвалим: Слово бо его избра, с Павлом мудрым языков учителя, Един ведый сердечная.

### Молитва

О святыи угодниче Божий, апостоле Луко! Подвигом добрым подвизався на земли, восприял еси на Небесех венец правды, егоже уготовал есть Господь всем любящим Его. Темже взирающе на святыи твой образ, радуемся о преславнем скончании жительства твоего и чтем святую память твою. Ты же, предстоя Престолу Божию, приими моления наша и ко Всемилостивому Богу принеси, о еже простити нам всякое прегрешение и помощи нам стати противу кознем диавольским, да избавльшеся от скорбей, болезней, бед и напастей и всякаго зла, благочестно и праведно поживем в нынешнем веце и сподобимся предстательством твоим, аще и недостойни есмы, видети благая на земли живых, славяще Единаго во святых Своих славимаго Бога, Отца и Сына и Святаго Духа, ныне и во веки веков. Аминь.

### **Моисею Мурину, преп.**

О преподобный, ты от тяжких грехов достиг пречудных добродетелей, помоги молящимся те-



бе рабам Божиим (имена), влекомым в погибель оттого, что предаются безмерному, вредному для души и тела употреблению вина. Склони на них свой милостивый взор, не отклони и не презри их, но внимли им, прибегающим к тебе. Моли, святой Моисей, Владыку Христа, чтобы не отверг их Он, Милосердный, и да не возрадуется диавол их гибели, но да пощадит Господь этих бессильных и несчастных, которыми овладела пагубная страсть пьянства, ведь мы все Божии создания и искуплены Пречистою Кровию Сына Его. Услышь же, преподобный Моисей, их молитву, отгони от них диавола, даруй им силу победить страсть, помоги им, простри твою руку, выведи их на путь добра, освободи их от рабства страстей и избавь их от винопития, чтобы они, обновленные, в трезвении и светлом уме возлюбили воздержание и благочестие, и вечно прославляли Всеблагого Бога, всегда спасающего Свои создания. Аминь.

**Николаю, свят.**

Тропарь, глас 4

Правило веры и образ кротости, воздержания учителя яви тя стаду твоему яже вещей истина: сего ради стяжал еси смирением высокая, нищетою богатая. Отче священноначальниче Николае, моли Христа Бога спастися душам нашим.

Кондак, глас 3

В Мирех, святе, священнодействитель показался еси: Христово бо, преподобне, Евангелие исполнив, положил еси душу твою о людех твоих, и спасл еси неповинныя от смерти; сего ради освятился еси, яко великий таинник Божия благодати.

Тропарь на рождество святителя

Николая Чудотворца, глас 4

Чудное и славное рождество твое, святителю Николае, Церковь днесь православных светло празднует, ибо стоянием ногу твою яви тя Господь и провозвести быти светильника и учителя миряном, весь мир обогащающа и просве-

щающа чудесы. Тем вопием ти: моли Христа Бога спастися душам нашим.

Тропарь на перенесение мощей  
святителя и чудотворца Николая,  
архиепископа Мир Ликийских, глас 4

Приспе день светлаго торжества, град Барский радуется, и с ним вселенная вся ликовствует песнями и пеньми духовными: днесь бо священное торжество, в пренесение честных и многоцелебных мощей Святителя и Чудотворца Николая, якоже солнце незаходимое возсия светозарными лучами, разгоняя тьму искушений же и бед от вопиющих верно: спасай нас яко предстатель наш, великий Николае.

Молитва первая

О добрый наш пастырю и богомудрый наставниче, святителю Христов Николае! Услыши нас грешных, молящихся тебе и призывающих в помощь скорое предстательство твое; виждь нас немощных, отвсюду уловляемых, всякаго блага лишенных и умом от малодушия помраченных; потщися, угодниче Божий, не оставити нас в

греховнем плену быти, да не будем в радость врагом нашим и не умрем в лукавых деяниих наших. Моли о нас недостойных Содетеля нашего и Владыку, ему же ты со безплотными лики предстоиши: милостива к нам сотвори Бога нашего в нынешнем житии и в будущем веце, да не воздаст нам по делом нашим и по нечистоте сердец наших, но по своей благости воздаст нам. На твое бо ходатайство уповающе, твоим предстательством хвалимся, твое заступление на помощь призываем, и ко пресвятому образу твоему припадающе, помощи просим: избави нас, угодниче Христов, от зол находящих на нас, и укроти волны страстей и бед возстающих на нас, да ради святых твоих молитв не обымет нас напасть и не погрязем в пучине греховней и в тине страстей наших. Моли, святителю Христов Николае, Христа Бога нашего, да подаст нам мирное житие и оставление грехов, душам же нашим спасение и велию милость, ныне и присно и во веки веков.

#### Молитва вторая

О великий заступниче, архиерею Божий, Николае преблаженне, иже подсолнечную осиявый чудесы, призывающим же тя скорый услышатель являйся, ихже присно предваряеши и спасаеши, и избавляеши, и от бед всяческих изымаеши, от Бога данную ти чудес и даров благодатию! Услыши мя недостойнаго, с верою тя призывающа и молебное тебе приносяща пение; тебе бо ходатая на умоление ко Христу предлагаю. О пресловущий в чудесех, святителем высоту! яко имеяй дерзновение, скоро Владыце предстани, и преподобнии свои руце молебне к Нему простри о мне грешнем, и от Него щедроты благодати подаждь ми, и приими мя в свое заступление, и от всех бед и зол мя избави, от нашествия врагов видимых и невидимых свобождая, и тех всех наветы и злохитрства погубляя, и борющихся мя во всей жизни моей отражая; прегрешением же моим прощение испроси, и спасена мя Христу представи и Царствия Небеснаго сподоби улучшить за множество того человеколюбия, емуже подобаеи всяка слава, честь и поклонение, со безначальным его Отцем, и с Пресвятым и Благим и

Животворящим Духом, ныне и присно и во веки веков.

**Нине, равноап.**

Тропарь, глас 4

Слова Божия служительнице, во апостольстей проповеди первозванному Андрею и прочим апостолом подражавшая, просветительнице Иверии, и Духа Святаго цевнице, святая равноапостольная Нино, моли Христа Бога, спаситися душам нашим.

Молитва

О всехвальная и предивная равноапостольная Нино, воистинну великое украшение Церкви Православныя и изрядная похвало народу Божию, просветившая всю страну Грузинскую Божественным учением, и подвиги апостольства победившая врага нашего спасения, трудом и молитвами насадившая zde вертоград Христов и возвращая его в плод мног! Празднующе святую память твою, притекаем к честному лику твоему и благоговейно лобызаем всехвальный дар тебе от Божия Матере, чудотворный Крест, егоже ты

обвила еси драгими власы твоими, и умильно просим, яко присную предстательницу нашу: огради нас от всяких зол и скорбей, вразуми врагов Святыя Церкви Христовы и противников благочестия, охраняй твое стадо, упасенное тобою, и моли Всеблагаго Бога, Спасителя нашего, Емуже ты ныне предстоиши, да дарует православному народу нашему мир, долгоденствие и во всяком добрем начинании поспешение, и да приведет Господь нас в Небесное Свое Царствие, идеже вси святии славословят Всесвятое Его имя ныне и присно и во веки веков. Аминь.

**Ольге, равноап.**

Тропарь, глас 1

Крилами богоразумия вперивши твой ум, возлетела еси превыше видимыя твари, взыскавши Бога и Творца всяких и Того обретши, паки рождение крещением прияла еси, древа животного наслаждающихся, нетленна во веки пребываеши, Ольго приснославная.

Кондак, глас 4

Воспоем днесь Благодетеля всех Бога, прославльшего в России Ольгу богомудрую, да молитвами ея подаст душам нашим грехов оставление.

#### Молитва

О, великая угоднице Божия, богоизбранная и богопрославленная, равноапостольная великая княгине Ольго! Ты отринула еси зловерие и нечестие языческое, уверовала еси во Единого Истинного Триипостаснаго Бога, и восприяла еси святое Крещение и положила еси начало просвещения земли Российския светом веры и благочестия. Ты еси духовная родоначальнице наша, ты по Христе Спасителе нашем первая виновница просвещения и спасения рода нашего. Ты еси, теплая молитвенница и ходатаица о царстве все-российстем, о царех его, народоправителех, воинстве и о всех людех. Сего ради смиренно молим тя: призри на немощи наша и умоли премилосердаго Царя Небеснаго, да не прогневется на ны зело, яко по немощем нашим по вся дни согрешаем, да не погубит нас со беззаконьми нашими, но да помилует и спасет нас по милости



Своей, да всадит в сердца наша спасительный страх Свой, да просветит Своею благодатию ум наш, во еже разумети нам пути Господни, оставити стези нечестия и заблуждений, тщатися же во стезях спасения и истины, неуклоннаго исполнения заповедей Божиих и уставов святых церкви. Моли, блаженная Ольга, Человеколюбца Бога, да пробавит нам великую милость Свою: да избавит нас от нашествия иноплеменных, от внутренних нестроений, мятежей и раздоров, от глада, смертоносных болезней и от всякаго зла: да подаст нам благорастворение воздуха и плодоносие земли, да даст пастырем ревность о спасении пасомых, всем же людям споспешение о еже усердно службы своя исправляти, любовь между собою и единомыслие имети, на благо отечества и святых церкви верне подвизатися, да возсияет свет спасительныя веры в царстве нашем во всех концах его: да обратятся к вере неверующии, да упразднятся вся ереси и расколы, да тако поживше в мире на земли, сподобимся с тобою вечнаго блаженства на небеси, хваляще и превозносяще Бога во веки веков. Аминь.

Величание

Величаем тя, блаженная и равноапостольная княгине Ольго, и чтим святую память твою, идо-  
лы поправшую и многия люди Российския свя-  
тым Крещением просветившую.

Величание

Величаем тя, святая равноапостольная княгине  
Ольго, яко зарю утреннюю в земли нашей возси-  
явшую и свет веры Православныя народу своему  
предвозвестившую.

**Пантелеимону, великомуч.**Тропарь, глас 3

Страстотерпче святыи и целебниче Пантелеи-  
моне, моли Милостивого Бога, да прегрешений  
оставление подаст душам нашим.

Кондак, глас 5

Подражатель сый Милостиваго, и исцелений  
благодать от Него прием, страстотерпче и муче-  
ниче Христа Бога, молитвами твоими душевныя

наша недуги исцели, отгоня присно борца соблазны от вопиющих верно: спаси ны, Господи.

#### Молитва первая

О великий Христов угодниче и преславный целебниче, великомучениче Пантелеимоне! Душею на Небеси Престолу Божию предстояй и триипостасныя Его славы наслаждайся, телом же и ликом святым на земли в Божественных храмах почивай и данною ти свыше благодатию различная чудеса источай, призри милостивным твоим оком на предстоящая люди, честней твоей иконе умильно молящихся и просящих от тебе целбных помощи и заступления: простри ко Господу Богу нашему теплыя твоя молитвы и испроси душам нашим оставление согрешений. Се бо мы, за беззакония наша не смеюще возвести очеса наша к высоте небесней, ниже вознести глас молебный к Его в Божестве неприступней славе, сердцем сокрушенным и духом смиренным тебе, ходатая милостива ко Владыце и молитвенника за ны, грешныя, призываем, яко ты приял еси благодать от Него недуги отгоняти и страсти исцеляти. Тебе убо просим: не презри нас, недо-

стойных, молящихся тебе и твоея помощи требующих. Буди нам в печалех утешитель, в недужех лютых страждующим врач, напастуемым скорый покровитель, очесем недугующим прозрения датель, ссущим и младенцем в скорбех готовейший предстатель и исцелитель: исходайствуй всем вся, яже ко спасению полезная, яко да твоими ко Господу Богу молитвами получивше благодать и милость, прославим всех благих Источника и Дароподателя Бога, Единого в Троице Святей славимаго Отца и Сына и Святаго Духа ныне и присно и во веки веков. Аминь.

#### Молитва вторая

(благодарственная, после исцеления от болезни)

Святыи великомучениче, целителю и чудотворче Пантелеимоне, всеизрядный угодниче Божий и молитвенниче присный христиан православных! Достоинно наречен еси Пантелеимоном, еже есть всемилостивый, яко, прияв от Бога благодать молитися за ны и болезни целити, ты богатно подаеши всем, к тебе притекающим, различная исцеления и вся к жизни временней и ко

спасению потребная: сего ради и мы недостойнии, сподобившися твоя милости, паки пред святою твоею иконою прибегаем к тебе, и прославляюще тя, яко искренняго угодника Божия, нашего же вернаго молитвенника и исцелителя, усердне благодарим тя и подателя всех благ Господа Бога нашего о великих благодеяниях, от Него тобою нам бывших. Приими убо милостивно малое сие молитвенное благодарение наше, зане не имамы ино что по достоянию воздати тебе, и прочее время живота нашего не лиши нас, немощных и грешных, твоя помощи и молитвеннаго ходатайства у Господа Бога нашего, Емуже подобает всякая слава, благодарение и поклонение, Отцу и Сыну и Святому духу, ныне и присно и во веки веков. Аминь.

#### Величание

Величаем тя, страстотерпече святыи великомучениче и целебниче Пантелеимоне, и чтим честная страдания твоя, яже за Христа претерпел еси.

**Параскеве Пятнице, муч.**Тропарь, глас 4

Премудрая и всехвальная Христова мученица Параскева, мужескую крепость приемши, женскую же немощь отвергши, диавола победи, и мучителя посрами, вопиющи и глаголющи: приидите, тело мое мечем ссецъте, и огнем сожгите, аз бо радующися иду ко Христу, Жениху моему. Тоя молитвами, Христе Боже, спаси души наша.

Кондак, глас 3

Всесвятое и непорочное мучение принеши, яко вено пречестное Безсмертному Жениху Христу, ангельское ликостояние возвеселила еси, и победила еси демонския козни: сего ради ты честно верою чтим, мученице Параскево, многострадальная.

Молитва

О святая и преблаженная мученице Христова Параскево, красото девическая, мучеников похвало, чистоты образе, великодушных зеркало, премудрых удивление, веры христианския хранительнице, идольския лъсти обличительнице,

Евангелия Божественнаго поборнице, заповедей Господних ревнительнице, сподобльшаяся приити ко пристанищу вечнаго покоя и в чертозе Жениха твоего Христа Бога светло веселящаяся, сугубым венцем девства и мученичества украшенная! Молим тя, святая мученице, буди о нас печальница ко Христу Богу, Его же преблаженнейшим зрением присно веселитися; моли Всемилостиваго, иже словом очи слепым отверзе, да избавит нас от болезни очес наших, телесных вкупе и душевных; разжени твоими святыми молитвами темный мрак прибывший от грехов наших, испроси у Отца Света свет благодати душевным и телесным очесем нашим; просвети нас, омраченных грехми, светом Божия благодати, да твоих ради святых молитв дастся безочесным сладкое зрение. О великая угодница Божия! О мужественнейшая дево! О крепкая мученице святая Параскево! Святыми твоими молитвами буди нам грешным помощница, ходатайствуй и молися о окаянных и зело нерадивых грешницех, ускори на помощь нам, ибо зело немощны есмы. Моли Господа, чистая девице, моли Милосердаго, святая мученице, моли Жениха твоего, не-

порочная Христова невесто, да твоими молитвами пособствоваши, мрака же греховнаго избывше, во свете истинныя веры и деяний Божественных внидем во свет вечный дне невечерняго, во град веселия приснаго, в немже ты ныне светло блистаеши славою и веселием безконечным, славословящи и воспевающи со всеми Небесными Силами Трисвятительное Единое Божество, Отца и Сына и Святаго Духа, ныне и присно и во веки веков. Аминь.

Величание

Величаем тя, страстотерпице Христова Параскево, и чтим честное страдание твое, еже за Христа претерпела еси.

**Петру и Павлу, апп.**

Тропарь, глас 4

Апостолов первопрестольницы и вселенныя учителие, Владыку всех молити, мир вселенней даровати и душам нашим велию милость.

Кондак, глас 2



Твердыя и боговещанныя проповедатели, верх апостолов Твоих, Господи, приял еси в наслаждение благих Твоих и покой: болезни бо оных и смерть приял еси паче всякаго всеплодия, Едине сведый сердечная.

#### Молитва

О преславнии апостоли Петре и Павле, души за Христа предавшии и кровию вашею пажить Его удобрившии! Услышите чад ваших молитвы и воздыхания, сердцем сокрушенным ныне приносимыя. Се бо беззаконьми омрачихомся и того ради бедами, якоже тучами, обложихомся, елеа же добраго жития обнищавом зело и не возможем противитися волком хищным, иже расхищати наследие Божие дерзостно тщатся. О сильнии! Понесите немощи наша, не отлучайтесь духом от нас, да не разлучимся в конец от любве Божия, но крепким заступлением вашим нас защитите, да помилует Господь всех нас, молитв ваших ради, да истребит же рукописание безмерных грехов наших и да сподобит со всеми святыми блаженнаго Царствия и Брака Агнца

Своего, Ему же честь и слава, и благодарение и поклонение, во веки веков. Аминь.

Величание

Величаем вас, Апостоли Христовы, весь мир ученьми своими просветившыя и вся концы ко Христу приведшия.

**Серафиму Вырецкому, преп.**

Тропарь, гл. 3

Купец велик соделался еси,/ преподобне отче Серафиме,/ сый в мире, к многуму богатству тленному/ ты николиже сердца прилагал еси,/ послушник истинен/ и добродетелей подвижник,/ егда же, вся оставль,/ на крест монашества восшел еси,/ дары Святаго Духа многи тебе дашася/ и яко единаго от древних тя явиша/ пророка, старца,/ чудотворца и молитвенника,/ столпа подвижником, спасения вожда./ Сего ради молим тя:// и нас премудро ко спасению управи.

Молитва

О, богоблаженный и премилосердый отче наш Серафиме! Ведуще тя и по смерти яко живаго су-

ща, с верою припадаем ти и вопием: не забуди убогих твоих до конца, но милостивно призри на стадо твое духовное и упаси е, добрый пастырю, благоприятными твоими к Богу молитвами. Испроси нам от Господа время на покаяние и греховныя жизни исправление, веси бо вся немощи наша душевныя: не имамы дел веры и спасения, не имамы ревности ко истинному богоугождению, пленихомся умом в погубительных страстех, растлехом сердца во гнусных похотях. Что убо чаем, и на что надеемся, неключимии, разоривше храмины душ наших? Ей, святыи отче, простри молитвенно руце твои ко Господу и умоли Спасителя рода человеческого коснуться благодатию окаменелых сердец наших, омыти нас слезами покаяния, возставити в вере, укрепити во благочестии и вся полезная ко спасению даровати. Не посрами упования нашего, еже по Бозе и Богородице на тя возлагаем, но буди нам скорый помощник, утешитель в скорбех и покровитель во обстояниих, да сподобимся молитвами твоими наследником быти Царствия Небесного, идеже вси святии непрестанно славят и воспевают Пречестное и Великолепое Имя Отца и Сына, и Свя-

таго Духа, ныне и присно, и во веки веков.  
Аминь.

**Серафиму Саровскому, преп.**

Тропарь, глас 4

От юности Христа возлюбил еси, преподобне,  
и Тому Единому поработати пламенно вождедел  
еси, в пустынном житии твоём непрестанною  
молитвою и трудом подвизался еси, умиленным  
сердцем любовь Христову стяжав, Небесным Се-  
рафимом в песнословии споборниче, в любви  
притекающим к тебе Христу подражателю,  
темже избранник возлюблен Божия Матере явил-  
ся еси, сего ради вопием ти: спасай нас молит-  
вами твоими, радости наша, теплый пред Богом  
заступниче, Серафиме блаженне.

Молитва

О пречудный отче Серафиме, великий Саров-  
ский чудотворче, всем прибегающим к тебе ско-  
ропослушный помощниче! Во дни земнаго жи-  
тия твоего никтоже от тебе тощ и неутешен  
отъиде, но всем в сладость бысть видение лика  
твоего и благоуветливый глас словес твоих. К

сим же и дар исцелений, дар прозрения, дар немощных душ врачевания обилен в тебе явися. Егда же призва тя Бог от земных трудов к небесному упокоению, николиже любовь твоя проста от нас, и невозможно есть исчислити чудеса твоя, умножившаяся, яко звезды небесныя: се бо по всем концем земли нашаея людем Божиим являешия и даруеши им исцеления. Темже и мы вопием ти: о претихий и кроткий угодниче Божий, дерзновенный к Нему молитвенниче, николиже призывающия тя отреваяй, вознеси о нас благомошную твою молитву ко Господу Сил, да дарует нам вся благопотребная в жизни сей и вся к душевному спасению полезная, да оградит нас от падений греховных и истинному покаянию научит нас, во еже безпреткновенно внити нам в вечное Небесное Царство, идеже ты ныне в незаходимей сияеши славе, и тамо воспевати со всеми святыми Живоначальную Троицу до скончания века. Аминь.

**Сергию Радонежскому, преп.**

Тропарь, глас 4

Иже добродетелей подвижник, яко истинный воин Христа Бога, на страсти вельми подвизался еси в жизни временней, в пениих, бдениих же и пощениих образ быв твоим учеником: темже и вселися в тя Пресвятый Дух, Егоже действием светло украшен еси: но яко имея дерзновение ко Святей Троице, поминай стадо, еже собрал еси мудре, и не забуди якоже обещался еси, посещай чад твоих, Сергие преподобне, отче наш.

Тропарь, глас 4 (Обретение мощей)

Днесь пресветло красуется царствующий град Москва, яко светолучными зарями, молниями чудес твоих осияемь, всю вселенную созывает похвалити тя, Богомудре Сергие; пречестная же и славная обитель твоя, юже во Имя Святыя Троицы многими труды твоими создал еси, отче, имущи в себе стада ученик твоих, веселия и радости исполняется. Мы же, празднующе преславное обретение честных мощей твоих, в земли сокровенных, яко цвет благоуханен и кадило благовонно, любезно я лобызающе, различная исцеления приемлем и твоими молитвами грехов

прощения сподобляемся, отче преподобне Сергие, моли Святую Троицу спасти души наша.

Тропарь, глас 8

От юности восприял еси Христа в души твоей, преподобне, и паче всего возжелал еси мирскаго мятежа уклонитися: мужески в пустыню вселился еси, и чада послушания в ней, плоды смирения возрастил еси. Тем быв Троице вселение, чудеса твоими всех просветил еси, приходящих к тебе с верою, исцеления всем подавал обильно, отче наш Сергие, моли Христа Бога, да спасет души наша.

Молитва

О священная главо, Преподобне и Богоносне отче наш Сергие, молитвою твоею, и верою, и любовью, яже к Богу, и чистотою сердца, еще на земли во обитель Пресвятыя Троицы душу твою устроивый, и ангельскаго общения и Пресвятыя Богородицы посещения сподобивыйся, и дар чудодейственныя благодати приемый, по отшествии же твоем от земных наипаче к Богу приобщивыйся, и Небесныя Силы приобщивыйся, но и от нас духом любви своя не отступивый и

честныя твоя мощи, яко сосуд благодати полный и преизливающийся, нам оставивый! Велие имея дерзновение ко Всемилостивому Владыце, моли спасти рабы Его, сущей в тебе благодати Его верующия и к тебе с любовию притекающия. Испроси нам от великодаровитаго Бога нашего всякий дар, всем и коемуждо благопотребен, веры непорочны соблюдение, градов наших утверждение, мира умирение, а от глада и пагубы избавление, от нашествия иноплеменных сохранение, скорбящим утешение, недугующим исцеление, падшим возставление, заблуждающим на путь истины и спасения возвращение, подвизающимся укрепление, благоделающим в делах благих преуспеяние и благословение, младенцам воспитание, юным наставление, неведущим вразумление, сиротам и вдовицам заступление, отходящим от сего временнаго жития к вечному благое уготовление и напутствие, отшедшим блаженное упокоение, и вся ны споспешествующими твоими молитвами сподоби в день Страшнаго Суда шуия части избавится, десныя же страны общники быти и блаженный оный глас Владыки Христа услышати: приидите, благословеннии



Отца Моего, наследуйте уготованное вам Царствие от сложения мира. Аминь.

**Феодосию Черниговскому, свят.**

Тропарь, гл.4

Преудобрен во архиереех, святителю Феодосие, / был еси светило своему стаду, / таже преставился еси в вечныя Обители. / Умоли у Престола Царя Славы избавитися нам от находящихся на ны зол / и спастися душам нашим, святе, молитвами твоими.

**20. Тропари и величания общие**

Господу Богу и Спасу нашему

Иисусу Христу, глас 2:

Пречистому Твоему образу поклоняемся, Благий, / просяще прощения прегрешений наших, Христе Боже: / волю бо благоволил еси плотию взыти на Крест, / да избавиши яже создал еси от работы вражия. / Тем благодарственно вопием Ти: / радости исполнил еси вся, Спасе наш, / пришедый спасти мир.

Ин Тропарь, глас 8:

С вышних призирая, убогия приемля. / посети  
ны, озлобленныя грехми, Владыко Все милости-  
ве, / молитвами Богородицы даруй душам нашим  
велию милость.

Пресвятой Богородице, глас 4:

К Богородице прилежно ныне притецем, /  
грешнии и смиреннии, и припадем, / в покаянии  
зовуще из глубины души: / Владычице, помози,  
на ны милосердовавши, / потщися, погибаем от  
множества прегрешений, / не отврати Твоя рабы  
тщи, / Тя бо и едину надежду имамы.

Величание:

Достойно есть / величати Тя, / Богородице, /  
Честнейшую Херувим / и Славнейшую / без  
сравнения Серафим.

Величание (Иконе Божией Матери):

Величаем Тя, / Пресвятая Дево / Богоизбран-  
ная Отроковице / и чтим образ Твой святой, /  
имже точиши исцеления / всем с верою прите-  
кающим.

Святым Ангелам  
и прочим безплотным Сидам, глас 4:

Небесных воинств Архистратизи, / молим Вас  
присно мы недостойнии, / да вашими молитвами  
оградите нас / кровом крил невестественныя  
вашея славы, / сохраняюще ны припадающие  
прилежно и вопиющия: / от бед избавите ны, /  
яко чиновачальницы Вышних Сил.

Величание:

Величаем Вас /, Архангели и Ангели и вся  
воинства, / Херувими и Серафими, / славящие  
Господа.

Пророку единому , глас 2:

Пророка Твоего [имя-рек] память, Господи,  
празднующе, / тем Тя молим: / спаси души наша.

Величание:

Величаем тя, / пророче Божий [имя рек], / и  
чем святую память твою, / ты бо молиши за  
нас / Христа Бога нашего.

Апостолу единому, глас 3:

Апостоле святыи [имя рек], моли Милостиваго Бога, / да прегрешений оставление / подаст душам нашим.

Величание:

Величаем тя, / апостоле Христов [имя рек] / и чтим болезни и труды твоя, / имиже трудился еси / во благовестии Христове.

Апостолам, глас 3:

Апостоли святии, / молитв Милостиваго Бога, / да прегрешений оставление / подаст душам нашим.

Величание:

Величаем вас, / святии апостоли [имя рек], / весь мир ученьми своими просветившия / и вся концы / ко Христу приведшия.

Святителю единому, глас 4:

Правило веры и образ кротости, / воздержания учителя / яви ты стаду твоему, / яже вещей истина: / сего ради стяжал еси смирением высокая, / нищетою богата, / Отче [имя рек], / моли Христа Бога / спастися душам нашим.

Величание:

Величаем тя, / святителю отче [имя рек], / и  
чтем святую память твою / ты бо молиши за нас /  
Христа Бога нашего.

Святителям, глас 4:

Боже отец наших, / творяй присно с нами по  
Твоей кротости, / не остави милость Твою от нас,  
/ но молитвами их / в мире управи живот наш.

Величание:

Величаем вас / святителие велиции, / и чтем  
святую память вашу: вы бо молитесь за нас / Хри-  
ста Бога нашего.

Преподобному единому, глас 8:

В тебе, отче, известно спасеся еже по образу: /  
приим бо крест, последовал еси Христу, / и дея  
учил еси презирати убо плоть, преходит бо, /  
прилежати же о души, вещи безсмертней. /  
Темже и со ангелы срадуется, преподобне [имя  
рек], дух твой.

Преподобному Печерскому, глас 8:

Постом душу твою просветил еси, / молитвами  
непрестанными сердце твое сосуд Духа Святаго  
соделал еси, / преподобне отче наш [имя рек], /  
темже вся вражия ополчения крепко посрамил  
еси /и, яко победоносец истинный, воздаяния по-  
лучил еси от Христа Бога. / Тому помолися о  
душах наших.

Затворнику Печерскому, глас 2:

Велия веры исправления, / в пещернем затво-  
ре, яко на воде упокоения, / преподобне отче  
[имя рек], радовался еси, / огнем бо любви Боже-  
ственныя распаляемь, / бдением и молитвою без-  
страстия достигл еси / и явился еси равноангель-  
ный на земли. / Того молитвами, Христе Боже,  
спаси души наша.

Величание (преподобному):

Ублажаем тя, / преподобне отче [имя рек], / и  
чтим святую память твою, / наставниче монахов /  
и собеседниче ангелов.

Преподобным, глас 4:

Боже отец наших, / творяй присно с нами по  
Твоей кротости, / не остави милость Твою от нас,  
/ но молитвами их / в мире управи живот наш.

Преподобным Печерским, глас 3:

Преблаженнии и Богоноснии отцы наши [имя  
рек], / яко стяжавший дерзновение ко Господу /  
равноангельным своим житием, / егоже ради  
обогасти Христос нетлением и чудесы мощи  
ваша, / молим вас прилежно: / испросите душам  
нашим очищение / и велию и богатую милость.

Величание (преподобным):

Ублажаем вас, преподобные отцы, / и чтем  
святую память вашу, / наставницы монахов / и  
собеседницы ангелов.

Мученику единому, глас 4:

Мученик Твой, Господи, [имя рек], / во страда-  
нии своем венец прият нетленный от Тебе, Бога  
нашего: / имей бо крепость Твою, / мучителей

низложи, / сокруши и демонов немощныя дерзости. / Того молитвами / спаси души наша.

Величание:

Величаем тя, / святыи мучениче [имя рек], / и чтим честная страдания твоя, / яже за Христа / претерпел еси.

Мученикам, глас 4:

Мученицы Твои, Господи, / во страданиях своих венцы прияша нетленные от Тебе, Бога нашего: / имуще бо крепость Твою, / мучителей низложиша, / сокрушиша и демонов немощныя дерзости. / Тех молитвами / спаси души наша.

Величание:

Величаем вас, / страстотерпцы святии, / и чтим честная страдания ваша, / яже за Христа / претерпели есте.

Священномученику единому, глас 4:

И нравом причастник, / и престолом наместник апостолом быв, / деяние обрел еси, Богодух-



новенне, / в видения восход, / сего ради слово истины исправляя, / веры ради пострадал если даже до крове, / священномучениче [имя рек], / моли Христа Бога / спастися душам нашим.

Величание:

Величаем тя, / священномучениче [имя рек], / и чтем святую память твою: / ты бо молиши за нас / Христа Бога нашего.

Священномученикам, глас 4:

Боже отец наших, / творяй присно с нами по Твоей кротости, / не остави милость Твою от нас, / но молитвами их / в мире управи живот наш.

Величание:

Величаем вас, / священномученицы Христовы, / и чтем святую память вашу: вы бо молите за нас / Христа Бога нашего.

Преподобномученику единому, глас 8:

В тебе отче, известно спасеся еже по образу: / приим бо крест последовал еси Христу, / и дея учил еси презирати убо плоть, преходит бо, /

прилежати же о души, вещи безсмертной. /  
Темже и со ангелы срадуется, преподобне [имя рек], дух твой.

Величание:

Ублажаем тя, / преподобномучениче [имя рек],  
/ и чтем святую память твою, / наставниче монахов / и собеседниче ангелов.

Преподобномученикам, глас 4:

Боже отец наших, / творяй присно с нами по  
Твоей кротости, / не остави милость Твою от нас,  
/ но молитвами их / в мире управи живот наш.

Величание:

Ублажаем вас, / преподобнии мученицы, / и  
чтем святую память вашу, / наставницы  
монахов / и собеседницы ангелов.

Мученице единой, глас 4:

Агница Твоя, Иисусе, [имя рек], / зовет велиим  
гласом: / Тебе, женише мой, люблю, / и Тебе  
ищущи страдальчествоую, / и сраспинаются и

спогребаюся крещению Твоему, / и стражду Тебе ради, / яко да царствую в Тебе, и умираю за Тя, / да и живу с Тобою: / но яко жертву непорочную приими мя с любовию пожершуюся Тебе. / Тоя молитвами, / яко милостив, спаси души наша.

Величание:

Величаем тя, / страстотерпице Христова [имя рек], / и чтем честное страдание твое, / еже за Христа / претерпела еси.

Мученицам, глас 1:

Агницы словесныя / Агнцу и Пастырю приведостеся мучением ко Христу, / течение скончавше, и веру соблюдше. / Темже днесь радостною душею совершаем, досточудныя, / святую вашу память, / Христа величающе.

Величание:

Величаем вас, / страстотерпицы святыя, / и чтем честная страдания ваша, / яже за Христа / претерпели есте.

Преподобной жене, глас 8:

В тебе, мати, известно спасеся еже по образу: /  
приимши бо крест, последовала еси Христу, / и  
деющи учила еси презирати убо плоть, преходит  
бо, / прилежати же о души, вещи безсмертней. /  
Темже и со ангелы срадуется, преподобная [имя рек], дух твой.

Величание:

Ублажаем тя, / преподобная мати [имя рек], / и  
чем святую память твою: / ты бо молиши за  
нас / Христа Бога нашего.

Преподобным женам, глас 2:

Истинному желанию уневестившася, христо-  
славныя, / и временного обручника отвергшася  
совокупления, / и добродетельными подвигами  
возрастша, / на высоту востекосте нетления, /  
краснодушныя и многобогатыя, / столпи мо-  
нашествующих жен и правило: / темже о нас  
молите непрестанно, / любовь вашу память  
празднующих.

Величание:

Ублажаем вас, / преподобнии матери, / и чтем святую память вашу: / вы бо молитесь за нас, Христа Бога нашего.

Преподобномученице единой, глас 4:

Агница Твоя, Иисусе, [имя рек], / зовет велиим гласом: / Тебе, женише мой, люблю, / и Тебе ищущи страдальчествую, / и сраспинаюся и спогребаюся крещению Твоему, / и стражду Тебе ради, / яко да царствую в Тебе, и умираю за Тя, / да и живу с Тобою: / но яко жертву непорочную приими мя с любовию пожержуюся Тебе, / тоя молитвами, / яко милостив, спаси души наша.

Величание:

Величаем тя, / страсотерпице святая [имя рек], / и чтем святую память Твою: / ты бо молиши за нас / Христа Бога нашего.

Священноисповеднику и  
преподобноисповеднику, глас 8:

Православия наставниче, / благочестия учителю и чистоты, / вселенная светильниче, / архиереев богодухновенное удобрение, [имя рек]

премудре, / ученых твоими вся просветил еси,  
цевнице духовная, / моли Христа Бога спастися  
душам нашим.

Величание Священноисповеднику:

Величаем тя, / святителю отче [имя рек], / и  
чем святую память твою, / ты бо молиши за  
нас / Христа Бога нашего.

Величание преподобноисповеднику:

Ублажаем тя, / преподобне отче [имя рек], / и  
чтим святую память твою, / наставниче монахов /  
и собеседниче ангелов.

Безсребреникам, глас 8:

Святии безсребреницы и чудотворцы, / посети-  
те немощи наша: / туне приясте, туне дадите нам.

Величание:

Величаем вас, / чудотворцы славнии  
[имярек], / и чем честная страдания ваша, / яже  
за Христа / претерпели есте.

Христа ради юродивому, глас 1:

Глас апостола Твоего Павла услышав глаголющ: / мы юроди Христа ради, / раб Твой, Христе Боже, [имя рек] / юрод бысть на земли Тебе ради: / темже память его почитающе, / Тебе молим. Господи, спаси души наша.

Величание:

Ублажаем тя, / святой праведный [имя рек], / и чтем святую память твою: / ты бо молиши за нас / Христа Бога нашего.

**21. Тропари, кондаки и величания  
Дванадцатым праздникам**

**Рождеству Пресвятой Богородицы**

Тропарь, глас 4:

Рождество Твое, Богородице Дево, / радость возвести всей вселенной: / из Тебе бо возсия Солнце правды Христос Бог наш, / и разрушив клятву, даде благословение, / и упразднив смерть, дарова нам живот вечный.

Величание:

Величаем Тя, / Пресвятая Дево, / и чтем святых твоих родителей, / и всеславное славим / Рождество Твое.

Кондак, глас 4:

Иоаким и Анна поношения безчадства, / и Адам и Ева от тли смертныя свободистася, Пречистая, / во святем рождестве Твоем. / То празднуют и людие Твои, / вины прегрешений избавльшеся, / внегода звати Ти: \ неплоды раждает Богородицу и питательницу жизни нашея.

**Воздвижению Креста Господня**

Тропарь, глас 1:

Спаси, Господи, люди Твоя / и благослови достояние Твое, / победы православным христианом на сопротивныя даруя / и Твое сохраняя Крестом Твоим жительство.

Величание:

Величаем Тя, / Живодавче Христе, / и чтем Крест Твой Святой, / имже нас спасл еси от работы вражия.



Кондак, глас 4:

Вознесыйся на Крест волею,/ тезоименитому  
Твоему новому жительству,/ щедроты Твоя да-  
руй, Христе Боже,/ возвесели нас силою Твоею,  
победы дая нам на сопостаты,/ пособие имущим  
Твое оружие мира, непобедимую победу.

**Введению во храм Пресвятой Богородицы**Тропарь, глас 4:

Днесь благоволения Божия предображение, / и  
человеков пасения проповедание, / в храме  
Божии ясно Дева является, / и Христа всем пред-  
возвещает. / Той и мы велегласно возопиим: /  
радуйся смотрения Зиждителя исполнения.

Величание:

Величаем Тя, / Пресвятая Дево, / Богоизбран-  
ная Отроковице, / и чтем еже в храм Господень  
вхождение Твое.

Кондак, глас 4:

Пречистый Храм Спасов,/ многоценный Чер-  
тог и Дева,/ священное Сокровище славы Божия,  
днесь вводится в дом Господень, благодать сов-

водящи,/ яже в Дусе Божественном,/ Юже воспе-  
вают Ангели Божии:\ Сия есть селение небесное.

### **Рождеству Христову**

#### Тропарь, глас 4:

Рождество Твое, Христе Боже наш, / возсия  
мирови свет разума: / в нем бо звездам служа-  
щий, / звездою учахуся, / Тебе кланяются Солнцу  
правды, / и Тебе ведети с высоты Востока: /  
Господи, слава Тебе.

#### Величание:

Величаем Тя, / Живодавче Христе, / нас ради  
ныне плотию Рождшагося / от Безневестных / и  
Пречистых Девы Марии.

#### Кондак, глас 3:

Дева днесь Пресущественнаго раждает,/ и зем-  
ля вертеп Неприступному приносит,/ Ангели с  
пастырьми славословят,/ волсви же со звездою  
путешествуют:\ нас бо ради родися отроча  
младо, Превечный Бог.

### **Крещению Господню**

Тропарь, глас 1:

Во Иордане крещающуся Тебе, Господи, /  
троическое явися поклонение, / Родителей бо  
глас свидетельствоваше Тебе, / возлюбленного  
Тя Сына именуя, / и Дух в виде голубине, / из-  
вествоваше словесе утверждение. / Явлейся Хри-  
сте Боже, / и мир просвещей, слава Тебе.

Величание:

Величаем Тя, / Живодавче Христе, / нас ради  
ныне плотию Крестившагося / от Иоанна / в  
водах Иорданских.

Кондак, глас 4:

Явился еси днесь вселенней, / и свет Твой,  
Господи, знаменая на нас, / в разуме поющих  
Тя: / пришел еси, и явился еси, \ свет неприступ-  
ный.

**Сретению Господню**Тропарь, глас 1:

Радуйся, Благодатная Богородице Дево, / из  
Тебе бо возсия Солнце правды, Христос Бог наш,  
/ просвещаяй суция во тьме. / Веселися и ты,

старче праведный, / приемый во объятия Свободителя душ наших, / дарующаго нам воскресение.

Величание:

Величаем Тя, / Живодавче Христе, / и чтем, Пречистую Матерь Твою, / Еюже по закону ныне / принеслся еси в храм Господень.

Кондак, глас 1:

Утробу Девичу освятивый рождеством Твоим, / и руце Симеоне благословивый, / якоже подобаше, предварив, / и ныне спасл еси нас Христе Боже, / но умири во бранех жительство, \ еди-не Человеколюбче.

**Благовещению Пресвятой Богородицы**

Тропарь, глас 4:

Днесь спасения нашего главизна, / и еже от века таинства явление, / Сын Божий, Сын Девы бывает, / и Гавриил благодать благовестует, / тем же и мы с ним Богородице возопиим: / радуйся, Благодатная, / Господь с Тобою.

Величание:

Архангельский глас вопием Ти, Чистая: Радуйся, Благодатная, Господь с Тобою.

Кондак, глас 8:

Взбранной воеводе победительная,/ яко избавльшися от злых,/ благодарственная восписуем Ти раби Твои, Богородице,/ но яко имущая державу непобедимую,/ от всяких нас бед свободи, да зовем Ти:\ радуйся, Невесто Неневестная.

**Входу Господню в Иерусалим, глас 1:**

Общее воскресение / прежде Твоя страсти уверяя / из мертвых воздвигл еси Лазаря, Христе Боже. / Темже и мы, яко отроцы победы знамения носяще, / Тебе Победителю смерти вопием: / осанна в вышних, / благословен Грядый во имя Господне.

Величание:

Величаем Тя, / Живодавче Христе, / Осанна в вышних / и мы Тебе вопием / Благословен Грядый во Имя Господне.

Кондак, глас 6-й:

На престоле на небеси,/ на жребяти на земли  
носимый, Христе Боже,/ Ангелов хваление и  
детей воспевание/ приял еси зовущих Ти:\ благо-  
словен еси, грядый Адама воззвати.

**Вознесению Господню, глас 4:**

Вознеслся еси во славе, Христе Боже наш, /  
радость сотворивый учеником / обетованием  
Святаго Духа, / извещенным им бывшим благо-  
словением, / яко Ты еси Сын Божий, Избавитель  
мира.

Величание:

Величаем Тя, / Живодавче Христе, / и почита-  
ем Еже на небеса, / с Пречистою Твоею плотию, /  
Божественное Вознесение.

Кондак, глас 6:

Еже о нас исполнив смотрение,/ и яже на зем-  
ли соединив небесным,/ вознеслся еси во славе,  
Христе Боже наш,/ никакоже отлучаяся,/ но пре-  
бывая неотступный,/ и вопия любящим Тя:\ Аз  
есмь с вами и никтоже на вы.

**В Неделю Пятидесятницы  
(День Святой Троицы), глас 8:**

Благословен еси, Христе Боже наш, / Иже премудры ловцы явлей, / низпослав им Духа Святаго, / и теми уловлей вселенную, / Человеколюбче, слава Тебе.

Величание:

Величаем Тя, / Живодавче Христе / и чтем Всесвятаго Духа Твоего, / Егоже от Отца, / послал еси божественным учеником Твоим.

Кондак, глас 8:

Егда снизшед языки слия, / разделяше языки Вышний, / егда же огненные языки раздаяше, / в соединение вся призва; \ и согласно славим Всесвятаго Духа.

**Преображению Господню**

Тропарь, глас 7:

Преобразился еси на горе, Христе Боже, / показавый учеником Твоим славу Твою, / якоже можаху: / да возсияет и нам грешным / свет Твой присносущный, / молитвами Богородицы, / Светодавче, слава Тебе.

Величание:

Величаем Тя, / Живодавче Христе, / и почитаем пречистыя плоти Твоя / преславное Преображение.

Кондак, глас 7:

На горе преобразился еси, / и якоже вмещаху ученицы Твои / славу Твою, Христе Боже, видеша: / да егда Тя узрят распинаема, / страдание убо уразумеют вольное, / мирови же проповедят, \ яко Ты еси воистинну Отчее сияние.

**Успению Пресвятой Богородицы**Тропарь, глас 1:

В рождестве девство сохранила еси, / во успении мира не оставила еси, Богородице: / преставилася еси к животу, Мати сущи Живота, / и молитвами Твоими избавляеши от смерти души наша.

Величание:



Величаем Тя, / Пренепорочная Мати Христа  
Бога нашего, / и всеславное славим / Успение  
Твое.

Кондак, глас 2:

В молитвах неусыпающую Богородицу,/ и в  
предстательствах непреложное упование,/ гроб и  
умерщвление не удержаста:/ якоже бо Живота  
Матерь,/ к животу престаи,\ во утробу Все-  
ливыйся Приснодевственную.

**22. На погребении**

**Прокимен, гл.6:** Блажен путь, вонже идеше  
днесь душе, яко уготовася тебе место упокоения.

**Стих:** К Тебе, Господи, воззову....

Апостол к Солунянам

/зач. 270./

Братие, не хочу вас не ведети о умерших, да  
не скорбите, якоже и прочии не имущии упова-  
ния.

Аще бо веруем, яко Иисус умре и воскресе, тако и Бог умершия во Иисусе приведет с Ним.

Сие бо вам глаголем словом Господним, яко мы живущии, оставшии в пришествие Господне, не имамы предварити умерших:

Яко Сам Господь в повелении, во гласе архангелове и в трубе Божии снидет с небесе, и мертвии о Христе воскреснут первее:

Потом же мы, живущии оставшии, купно с ними восхищени будем на облацех в сретение Господне на воздухе, и тако всегда с Господем будем.

Евангелие от Иоанна

/зач. 16/

Рече Господь ко пришедшим к Нему иудеом: аминь, аминь глаголю вам, яко слушаый словесе Моего и веруый Пославшему Мя имать живот вечный, и на суд не приходит: но прейдет от смерти в живот. Аминь, аминь глаголю вам, яко грядет час, и ныне есть, егда мертвии услышат глас Сына Божия, и услышавше оживут.

Якоже бо Отец имать живот в Себе, тако даде и Сынови живот имети в Себе, И область даде

Ему и суд творити, яко Сын Человечь есть. Не дивитесь сему: яко грядет час, в онъже вси сущии во гробех услышат глас Сына Божия, И изыдут сотворшии благая в воскрешение живота, а сотворшии злая в воскрешение суда. Не могу Аз о Себе творити ничесоже. Якоже слышу, сужду, и суд Мой праведен есть, яко не ищу воли Моея, но воли пославшаго Мя Отца.

Молитвы:

Господь Иисус Христос Бог наш, иже божественныя заповеди святым Своим учеником и апостолом давый, во еже вязати и решити падших грехи, и от оных паки мы приемши вины тожде творити: да простит тебе, чадо духовное (имя), аще что соделал еси в нынешнем веце, вольное или невольное, ныне и присно и во веки веков. Аминь.

\* \* \*

Господь наш Иисус Христос, Божественною Своею благодатию, даром же и властию, данною святым его учеником и апостолом, во еже вязати и решити грехи человеков, /рек им: примите Духа Святаго, ихже отпустите грехи, отпустятся

им: ихже удержите, удержатся: и елика аще свяжите и разрешити на земли, будут связана и разрешена и на небеси/. От оных и на ны друг другаприимательно пришедшею да сотворит через мене смиренного прощено и сие по духу чадо /имя/ от всех, елико яко человек согреши Богу словом, или делом, или мыслью, и всеми своими чувствами, волею или неволею, ведением или неведением. Аще же под клятвою или отлучением архиерейским или иерейским бысть, или аще клятву отца своего или матери своей наведе на ся, или своему проклятию подпаде, или клятву преступи, или иными некими грехи яко человек связаяся: но о всех сих сердцем сокрушенным покайся, и от тех всех вины и юзы да разрешит его /ю/: елика же за немощь естества забвению предаде и та вся да прости ему /ей/, Человеколюбия ради Своего, молитвами Пресвятыя Преподобныя Владычицы нашея Богородицы и Приснодевы Марии, святых славных и всехвалных апостолов, и всех святых. Аминь.

\* \* \*

Боже духов и всякия плоти, смерть поправый, и Дявола упразднивый, и живот миру Твоему

даровавый: Сам Господи, упокой душу усопшего раба Твоего /имя/ в месте светле, в месте злачнее, вместе покойне: отнюдуже отбеже болезнь и печаль и въздыхание. Всякое согрешение содеянное им словом или делом или помышлением, яко Благий Человеколюбец Бог прости, яко несть человек иже жив будет и не согрешит: Ты бо Един кроме греха, правда Твоя, правда во веки, и слово Твое истина.

Заупокойная  
великая ектеня

Миром Господу помолимся.

О свышнем мире, и о спасении душ наших, Господу помолимся.

О оставлении согрешений, во блаженной памяти преставльшихся, Господу помолимся.

О приснопамятных рабех Божиих (имена), покой, тишины, блаженныя памяти их, Господу помолимся.

О прости им всякое прегрешение вольное и невольное, Господу помолимся

О неосужденным предстати у страшнаго престола Господа славы, Господу помолимся.

О плачущих и болезнующих, чающих Христова утешения, Господу помолимся.

О отпуститися им от всякия болезни, и печали, и въздыхания, и вселити их идеже присещает свет лица Божия, Господу помолимся.

О яко да Господь Бог наш учинит души их в месте светле, в месте злачне, в месте покойне, идеже вси праведнии пребывают, Господу помолимся.

О причтении их в недрах Авраама, и Исаака, и Иакова, Господу помолимся.

О избавитися нам от всякия скорби, гнева, и нужды, Господу помолимся.

Заступи, спаси, помилуй и сохрани нас, Боже, Твоею благодатию.

Милости Божии, царства небснаго и оставления грехов испросивши тем, сами себе, друг друга, и весь живот наш Христу Богу предадим.

Возглас: Яко Ты еси воскресение, живот, и покой усопших рабех Твоих (имя): Христе Боже наш: и Тебе славу возсылаем со безначальным Твоим Отцем и пресвятым и благим и животво-

рящим Твоим Духом, ныне и присно, и во веки веков.

### **Погребение младенцев**

#### Ектенья

Паки и паки миром Господу помолимся.

Еще молимся о упокоении блаженного младенца /имя/, и о еже по неложному Своему обещанию, Небесному Своему Царствию того сподобити.

Яко да Господь наш учинит дух его, идеже вси праведнии почивают.

Милости Божия, Царства Небеснаго, и со святыми упокоения, у Христа бессмертнаго Царя и Бога нашего тому и сами себе просим.

Господу помолимся

Господи Иисусе Христе Боже наш, породившимся от воды и Духа и в непорочном житии к Тебе представляющимся Царство небесное дати обещавай, и рекий: оставити дети приходяти ко Мне, таковых бо есть Царство Небесное, смиренно молимся, ныне от нас преставленному рабу Твоему непорочному младенцу /имя/ по Твоему неложному обещанию Царствия

Твоего наследие даруй: нас же беспорочное сподоби прейти и христианское скончати житие, со всеми святыми Твоими, в небесных чертозех водворитися.

**Возглас:** Яко Ты еси Воскресение, живот и упокоение всех рабов Твоих, и ныне представленному рабу Твоему младенцу /имя/, Христе Боже наш, и Тебе славу возсылаем, со Безначальным Твоим Отцем, и с Пресвятым и благим, и Животворящим Твоим Духом, ныне и присно, и во веки веков.

**Прокимен:** Блажен путь, воньже пойдеше душе:...

**Стих:** Обратися душе моя в покой твой.

#### Апостол к КОРИНФИЯНАМ

/зач. 162/ Братие, не всякая плоть, та же плоть: но ина убо плоть человеком: ина же плоть скотом, ина рыбам, ина же птицам. И телеса небесная, и телеса земная: но ина убо небесным слава, и ина земным. Инна слава солнцу, и ина слава луне, и ина слава звездам: звезда бо от звезды разнствует во славе. Такожде и воскрес-



ние мертвых: сеется в тление, встает в нетлении: сеется не в честь, восстает в славе: сеется в немощи, восстает в силе. Сеется тело душевное, восстает тело духовное. Тако и писано есть: бысть первый человек Адам в душу живу, последний Адам в дух животворящ.

#### ЕВАНГЕЛИЕ ОТ ИОАННА

/зач.21/ Рече Господь ко пришедшим к Нему иудеем: Аз есмь хлеб животный, грядый ко Мне не имам взалкати: и веруй в Мя, не имать вжаждатися никогдаже. Но рех вам: яко и видите Мя и не веруете. Все еже даст Ми Отец, ко мне приидет, и грядущего ко Мне не изжену вон. Яко снедох с небесе, не да творю волю Мою, но волю пославшего мя Отца, да все, еже даст Ми, не погублю от Него, но воскрещу е в последний день.

#### Молитва

Храняй младенцы Господи, в нынешнем житии, в будущем же веце уготовавый им про-

странство, Авраамово ложе и почистоте ангельская светообразная места, в нихже водворяются праведных Дуси: Ты Сам Владыко Христе, душу раба Твоего младенца /имя/ прими с миром.

Ты бо рекл еси: оставите дети приити ко Мне, таковых бо есть Царство Небесное. Тебе бо подобает всякая слава, честь и поклонение, со Отцем, и Святым Духом ныне и присно, и во веки веков.

(Богородичен: Преложение скорбящих, освобождение немощствующих сущи Богородице Деве, спасай град и люди, ратуемых мире, обуреваемых Тишино: едино предстательство верных.)

Воскресый из мертвых, и живыми и мертвыми обладая, Христе истинный Боже наш, молитвами Пресвятыя Твоея Матери, и всех святых Твоих, душу от нас преставленного младенца /имя/, в скиниях святых всели, и с праведными притчи, яко Благ и Человеколюбец.

### Последование погребения

Плачу и рыдаю, егда помышляю смерть, и вижду во гробех лежащую по образу Божию созданную нашу красоту, безобразну бесславну, не имущую вида. О чудесе! Что сие еже о нас бысть таинство; како предахомся тлению; како сопрягохомся смерти; воистину Бога повелением, якоже писано есть, подающего преставляемому упокоение.

Зряща мя безгласна, и бездыханна предлежаща, восплачите о мне, братие и друзи, сродницы и знаемии: вчерашний бо день беседовах с вами, и внезапно найде на мя страшный час смертный: но придите все любящи мя, и целуйте мя последним целованием: не к тому бо с вами похожду, или собеседую прочее, к судии бо отхожду, идеже несть лицеприятия: раб бо и владыко вкупе предстоят, царь и воин, богатый и убогий в равнем достииоинстве: кийждо бо от своих дел или прославится, или постыдится, но прошу всех и молю, непрестанно о мне молитися Христу Богу, да не низведен буду по грехом моим на ме-

сто мучения: но да вчинит мя, идеже свет животный.

Молитвами рождшая Тя, Христе и Предтечи Твоего, апостолов, пророков, иерархов, преподобных и праведных, и всех святых, усопшего раба Твоего упокой.

#### **Чин исповеди**

Боже, Спасителю наш, иже пророком Твоим Нафаном покаявшемуся Давиду о своих согрешениях оставление даровавый, и Манасиину в покаяние молитву приемый, Сам и раба Твоего (рабу Твою) ИМЯ, кающагося ( кающуюся), о нихже содела согрешениях, прими обычным Твоим человеколюбием, презираяй ему (ей) вся содеянная, оставляй неправды, и превосходяй беззакония. Ты бо рекл еси Господи: хотением не хочу смерти грешника, но яко еже обратится, и живу бытии ему: и яко седмьдесят седмицею оставляти грехи. Понеже яко величество Твое безприкладное, и милость Твоя безмерная: аще бо беззакония назриши, кто постоит;

Яко Ты еси Бог кающихся, и Тебе славу возсылаем, Отцу и Сыну, и Святому Духу, ныне и присно, и во веки веков, аминь.

Се чадо, Христос невидимо стоит, приемля исповедание Твое, не усрамяся, ниже убойся, и да не скроеши что от мене: но не обинуюся рцы вся, елика соделал еси, да приимеши оставление от Господа нашего Иисуса Христа. Се и икона Его пред нами: аз же точию свидетель есмь, да свидетельствую пред ним вся. Елика речеши мне: аще ли что скроеши от мене, сугуб грех имаши. Внемли убо: понеже бо пришел еси во врачбницу, да не исцелен отыдеши.

Господи Боже спасения рабов Твоих, милостивее и щедре и долготерпеливе, каяйся о наших злобах, не хотяй смерти грешника, но еже обратитися, и живу быти ему: Сам и ныне умилиствися о рабе Твоем (рабе Твоей) ИМЯ, и подаждь ему образ покаяния, прощение грехов и отпущение, прощай ему всякое согрешение, вольное же и невольное: примири, и соедини его святей Твоей церкви, о Христе Иисусе Господе нашем, с

Нимже Тебе подабаает держава и великолепие,  
ныне и присно, и во веки веков, аминь.

### **Молитвы жене**

#### Егда извержет младенца

Владыко Господи Боже наш, рождейся от святых Богородицы, и Приснодеи Марии, и во яслех яко младенец возлегий, Сам рабу Твою сию ИМЯ днесь сущу во гресех, во убийство впадшую, волею или неволею, и зачатое в ней извергшую, помилуй по велицей Твоей милости: и прости ея вольная прегрешения: и сохрани от всякаго диавольскаго кознодействия, и скверну очисти, болезни исцели: здравие и благомощие телу с душею ея Человеколюбче даруй, и ангелом светлым сию соблюди, от всякаго нашествия невидимых демонов, ей Господи, от недуга и ослабления. И очисти ю от телесны скверны, и различных ей находящих стужений утробных, и изведи ю многою Твоею милостию, во смиреннем ея теле. И возстави ю от одра, на немже лежит: яко во гресех родихомся, и в беззакониих, и скверны вси есмы пред Тобою Господи, и со страхом вопием и глаголем: призри с небесе и

виждь немощь нас осужденных, и прости рабе Твоей сей ИМЯ, сущей во гресех, убийству впадшей, волею или неволею, и в ней зачатое извергшей, и всех обретающихся ей, по велицей Твоей милости, яко Благ и Человеколюбец Бог помилуй и прости: яко Ты Един имаши власть оставляти грехи и беззакония, молитвами Пречистыя Твоея Матере, и всех святых.

Яко подобает Тебе всякая слава, честь и поклонение, со Отцем и Святым Духом, ныне и присно, и во веки веков, аминь.

#### Молитвы жене на 40 день

Господи Боже Вседержителю, Отче Господа нашего Иисуса Христа, все естество словесное же и безсловесное словом Твоим создавый, и вся от несущих во еже быти приведый, Тебе молимся, и Тебе просим: Твоею волею спасл еси рабу Твою ИМЯ, очисти от всякаго греха, и от всякия скверны, приходящую ко святей Твоей церкви, да неосужденно сподобится причаститися Святых Твоих Таин.

\* \* \*

И от нея рожденное отроча благослови, возрасти, освяти, вразуми, уцеломудри, удобромудрости: яко Ты привел еси е, и показал еси ему свет чувственный, да и умнаго сподобится света, во время еже определил еси, и сопричтется святому Твоему стаду, Единородным Твоим Сыном: с Нимже благословен еси, с Пресвятым, и Благим, и Животворящим Твоим Духом, ныне и присно, и во веки веков, аминь.

Мир всем.

Главы ваша Господеви приклоните.

Господи Боже наш, пришедый на спасение рода человеческого, приди и на рабу Твою ИМЯ, и сподоби ю честным Твоим пресвитерством, входа храма славы Твоея: омый ея скверну телесную и скверну душевную во исполнении сорокадесяти дний: творяй ю достойну и причащения честнаго Тела и Крове Твоея.

Яко освятися и прославися пречестное и великолепое имя Твое, со отцем и святым духом, ныне и присно, и во веки веков, аминь.

#### Молитва отрочати



Господи Боже наш, в сорокый день  
младенец законному храму принесенный от Ма-  
рии неискусобрачныя и святыя Твоя Матери, и  
на объятиях праведнаго Симеона носимый, Сам  
Владыко Всесильне, и принесеннаго сего мла-  
денца, явитися Тебе всех творцу, благослови и на  
всякое дело благое и Тебе благоугодное возрас-  
ти, отганяя от него всякую сопротивную силу,  
знамением воображения Креста Твоего. Ты бо еи  
храняй младенцы Господи: да сподобився свя-  
таго крещения, получит часть избранных Цар-  
ствия Твоего, соблюдаемъ с нами благодатию  
Святыя и Единосущныя, и нераздельныя Трои-  
цы: Тебе бо подобает всякая слава, благодарение,  
и поклонение со безначальным Твоим Отцем, и  
Пресвятым, и Благим, и Животворящим Твоим  
Духом, ныне и присно, и во веки веков, аминь.

### 23. Пасхальный канон и стихиры Пасхи

#### Песнь 1

Воскресения день, просветимся людие: Пасха, Господня Пасха! От смерти бо к жизни и от земли к небеси, Христос Бог нас преведе, победную поющия.

Припев: Христос воскресе из мертвых.

Очистим чувства, и узрим неприступным светом воскресения Христа блистающася, и радуйтесь, рекуща ясно да услышим, победную поюще.

Христос воскресе из мертвых.

Небеса убо достойно да веселятся, земля же да радуется: да празднует же мир, видимый же весь и невидимый, Христос бо воста, веселие вечное.

Богородичны

Слава: Умерщвления предел сломила еси, вечную жизнь рождшая Христа, из гроба возсиявшего днесь, Дево Всенепорочная, и мир просветившаго.

И ныне: Воскресшаго видевши Сына Твоего и Бога, радуйся со апостолы Богоблагодатная чи-

стая: и еже радуйся первее, яко всех радости вина, восприяла еси, Богомати Всенепорочная.

### Песнь 3

Приидите пиво прием новое, не от камене неплодна чудодеемое, но нетления источник, из гроба одождивша Христа, в Немже утверждаемся.

Ныне вся исполнишася света, небо же и земля и преисподняя: да празднует убо вся тварь востание Христово, в немже утверждается.

Вчера спогребохся Тебе, Христе, совостаю днесь воскресшу Тебе, сраспинахся Тебе вчера, Сам мя прослави, Спасе, во Царствии Твоем.

Слава: На нетленную жизнь прихожду днесь благодатию рождшагося из Тебе, Чистая, и всем концем свет облиставшаго.

И ныне: Бога, Егоже родила еси плотию, из мертвых, якоже рече, воставша видевши, Чистая, ликуй, и Сего яко Бога Пречистая возвеличай.

### Ипакои, глас 4-й

Предварившия утро яже о Марии, и обретшия камень отвален от гроба, слышаху от ангела: во свете присносущем Сущаго, с мертвыми что

ищите яко человека? Видите гробныя пелены. Тецьте и миру проповедите, яко воста Господь умертвивый смерть, яко есть Сын Бога, спасающаго род человеческий.

#### Песнь 4

На божественней стражи, богоглаголивый Аввакум да станет с нами и покажет светоносна ангела, ясно глаголюща: днесь спасение миру, яко воскресе Христос, яко Всесилен.

Мужеский убо пол, яко разверзый девственную утробу, явился Христос: яко человек же, агнец наречеса: непорочен же, яко невкусен скверны, наша Пасха, и яко Бог истинен, совершен речеса.

Яко единолетний агнец, благословенный нам венец Христос, волею за всех заклан бысть, Пасха очистительная, и паки из гроба красное правды нам возсия солнце.

Богоотец убо Давид пред санным ковчегом скакаше играя, людие же Божии святии, образов сбытие зряще, веселимся Божественне, яко воскресе Христос, яко Всесилен.

Слава: Создавый Адама, Твоего праотца, Чистая, зиждется от Тебе, и смертное жилище разори Своею смертию днесь, и озари вся божественными блистаньями воскресения.

И ныне: Егоже родила еси Христа, прекрасно из мертвых возсиявша, Чистая зрящи, добрая и непорочная в женах и красная, днесь во спасение всех, со апостолы радуящися, Того прославляй.

### Песнь 5

Утренюем утреннюю глубоку, и вместо мира песнь принесем Владыце, и Христа узрим правды солнце, всем жизнь возсияюща.

Безмерное Твое благоутробие адовыми узами содержимии зряще, к свету идяху Христе, веселыми ногами, Пасху хваляще вечную.

Приступим свещеноснии исходящу Христу из гроба яко Жениху, и спразднуим любопытными чинми Пасху Божию спасительную.

Слава: Просвещается божественными лучами и живоносными воскресения Сына Твоего, Богомати Пречистая, и радости исполняется благочестивых собрание.

И ныне: Не разверзл еси врата девства в воплощении, гроба не разрушил еси печатей, Царю создания: отонудуже воскресшаго Тя зрящи Мати, радовашеся.

### Песнь 6

Снизшел еси в преисподняя земли и сокрушил еси верей вечныя, содержащия связанныя Христе, и тридневен, яко от кита Иона, воскресл еси от гроба.

Сохранив цела знамения, Христе, воскресл еси от гроба, ключи Девы не вредивый в рождестве Твоем, и отверзл еси нам райские двери.

Спасе мой, живое же и нежертвенное заклание, яко Бог Сам Себе волю привел Отцу, совоскресил еси всероднаго Адама, воскрес от гроба.

Слава: Возведеша древле держимое смертию и тлением, воплотившимся от Твоего пречистаго чрева, к нетленной и присносущней жизни, Богородице Дево.

И ныне: Сниде в преисподняя земли, в ложесна Твоя, Чистая, сшедый, и вселивыйся и вопло-

тивыйся паче ума, и воздвиже с Собою Адама, воскрес от гроба.

Кондак, глас 8-й

Аще и во гроб снизшел еси, Безсмертне, но адову разрушил еси силу, и воскресл еси яко победитель, Христе Боже, женам миносицам вещавый: радуйтеся, и Твоим апостолом мир даруй, падшим подай воскресение.

Икос

Еже прежде солнца Солнце зашедшее иногда во гроб, предвариша ко утру, ищущия яко дне миносицы девы, и друга ко друзей вопияху: О другини! приидите, вонями помажем Тело живоносное и погребенное, плоть Воскресившаго падшаго Адама, лежащую во гробе. Идем, потщимся якоже волсви, и поклонимся, и принесем мира яко дары, не в пеленах, но в плащанице Обвитому, и плачим и возопиим: О Владыко, востани, падшим подай воскресение.

Воскресение Христово видевши, поклонимся Святому Господу Иисусу, Единому Безгрешному, Кресту Твоему поклоняемся, Христе, и святое воскресение Твое поем и славим: Ты бо еси Бог наш, разве Тебе иного не знаем, имя Твое

именуем. Приидите, вси вернии, поклонимся святому Христову воскресению: се бо прииде Крестом радость всему миру. Всегда благословяще Господа, поем воскресение Его: распятие бо претерпев, смертью смерть разруши. (Трижды)

Воскрес Иисус от гроба, якоже прорече, даде нам живот вечный и велию милость. (Трижды)

### Песнь 7

Отроки от печи избавивый, быв человек, страждет яко смертен, и страстию смертное в нетления облачит благолепие, Един благословен отцев Бог и препрославлен.

Жены с миры богомудрыя вслед Тебе течаху: Егоже яко мертва со слезами искаху, поклонишася радующияся живому Богу, и Пасху тайную Твоим, Христе, учеником благовестиша.

Смерти празднуем умерщвление, адово разрушение, иного жития вечного начало, и играюще поем Виновнаго, Единого Благословеннаго отцев Бога и препрославленнаго.

Яко воистинну священная, и всепразднственная сия спасительная ночь, и светозарная, светоноснаго дне востания сущи провозвестница: в



нейже безлетный Свет из гроба плотски всем возсия.

Слава: Умертвив Сын Твой смерть, Всенепорочная, днесь всем смертным пребывающий живот во веки веков дарова, един благословенный отцев Бог и препрославленный.

И ныне: Всем царствуй созданием, быв человек, вселися в Твою, Богоблагодатная, утробу, и распятие претерпев и смерть, воскресе боголепно, совозставив нас яко всесилен.

### Песнь 8

Сей нареченный и святой день, един суббот царь и господь, праздников праздник, и торжество есть торжеств: воньже благословим Христа во веки.

Приидите новаго винограда рождения, божественнаго веселия, в нарочитом дни воскресения, Царствия Христова приобщимся, поюще Его яко Бога во веки.

Возведи окрест очи твой, Сионе, и виждь: се приидоша к тебе яко богосветлая светила, от запада, и севера, и моря, и востока чада твоя, в тебе благословящая Христа во веки.

Пресвятая Троице, Боже наш, слава Тебе.

Отче Вседержителю, и Слове, и Душе, трем соединяемое во ипостасех естество, пресущественно и пребожественно, в Тя крестихомся и Тя благословим во вся веки.

Слава: Прииде Тобою в мир Господь, Дево Богородице, и чрево адово расторг, смертным нам воскресение дарова: Темже благословим Его во веки.

И ныне: Всю низложив смерти державу Сын Твой, Дево, Своим воскресением, яко Бог крепкий совознесе нас и обожил: темже воспеваем Его во веки.

### Песнь 9

Припев: Величит душа моя воскресшаго тридневного от гроба Христа Жизнодавца.

Ирмос: Светися, светися новый Иерусалиме, слава бо Господня на тебе возсия. Ликуй ныне и веселися, Сионе. Ты же, Чистая, красуйся. Богородице, о востании Рождества Твоего.

Припев: Христос новая Пасха, жертва живая, Агнец Божий, возьми грехи мира.

О божественного, о любезного, о сладчайшаго Твоего гласа! С нами бо неложно обещался еси быти до скончания века Христе, Егоже вернии, утверждение надежды имуще, радуемся.

Припев: Ангел вопияше Благодатней: Чистая Дево, радуйся, и паки реку: радуйся! Твой Сын воскрес тридневен от гроба, и мертвыя воздвигнувый, людие, веселитесь.

О Пасха велия и священнейшая, Христе! О мудросте, и Слове Божий, и сило! Подавай нам истее Тебе причащатися, в невечернем дни Царствия Твоего.

Ексапостиларий

Плотию уснув, яко мертв, Царю и Господи, тридневен воскресл еси, Адама воздвиг от тли, и упразднив смерть: Пасха нетления, мира спасение.

**Стихиры Пасхи**

Стих: *Да воскреснет Бог, и расточатся врази Его.*

Пасха священная нам днесь показася: Пасха нова святая, Пасха таинственная, Пасха всечестная, Пасха Христос Избавитель, Пасха непорочная,

Пасха великая, Пасха верных, Пасха двери рай-  
ския нам отверзающая, Пасха всех освящающая  
верных.

Стих: *Яко исчезает дым, да исчезнут.*

Приидите от видения жены благовестницы, и  
Сиону рцйте: приими от нас радости благовеще-  
ния воскресения Христова; красуйся, ликуй и  
радуйся, Иерусалиме, Царя Христа узрев из  
гроба яко жениха, происходяща.

Стих: *Тако да погибнут грешницы от лица  
Божия, а праведницы да возвеселятся.*

Мироносицы жены, утру глубоко, представша  
гробу Живодавца, обретоша ангела, на камени  
сидяща, и той провещав им сице глаголаше: что  
ищите Живаго с мертвыми? Что плачете Нелен-  
наго во тли? Шедше проповедите учеником Его.

Стих: *Сей день, егоже сотвори Господь, воз-  
радуемся и возвеселимся в онь.*

Пасха красная, Пасха, Господня Пасха! Пасха  
всечестная нам возсия! Пасха! Радостию друг  
друга обьемем. О Пасха!  
Избавление скорби, ибо из гроба днесь яко от  
чертога возсияв Христос, жены радости исполни  
глаголя: проповедите апостолом.

*Слава, и ныне:* Воскресения день, и просветимся торжеством, и друг друга обьемем. Рцем, братие, и ненавидящим нас, простим вся воскресением, и тако возопиим: Христос воскресе из мертвых, смертию смерть поправ и сущим во гробех живот даровав.

#### 24. Евангелия общие

Служба Пресвятой Богородицы: Лк 1:39-49:56

Служба святых небесных бесплотных Сил: Евр 2:2-10

Лк 10:16-21; или Мф 13:24-30:36-43

Служба святых пророков общая: 1 Кор 14:20-25;

или Евр 6:13-20;

или Иак 5:10-20 Мф 23:29-39;

или Лк 11:47-54

Служба святых апостолов общая: 1 Кор 4:9-16  
Лк 10:1-15;  
или 10:16-21

Служба святителя: Евр 7:26-8:2 Ин 10:9-16

Служба святителей общая: Евр 13:17-21 Мф  
5:14-19;  
или Ин 10:9-16

Служба преподобных и Христа ради  
юродивых: Гал 5:22-6:2 Мф 11:27-30;  
или Лк 6:17-23

Служба мученика: 1 Тим 2:1-10 Лк 12:2-12;  
или Ин 15:17-16:2

Служба мучеников общая: Рим 8:28-39  
или Евр 11:33-40 Мф 10:16-22;  
или Лк 21:12-19

Служба священномученика: Евр 13:7-16 Лк  
12:32-40

Служба священномучеников общая: Евр 5:4-10;

или Флп 3:20-4:3 Лк 6:17-23;

или 10:22-24

или 14:25-35

Служба преподобномученика: 2 Тим 1:8-18 Мк 8:34-9:1

Служба преподобномучеников общая: Рим 8:28-39 Мф 10: 32-33, 37-38 19:27-30;

или Лк 12:8-12

Служба святых мучениц общая: 2 Кор 6:1-10;

или Гал 3:23-29 Мф 15:21-28;

или Мк 5:24-34

Служба преподобных жен общая: Гал 3:23-29 Мф 25:1-13;

или Лк 7:36-50

Служба исповедников: Еф 6:10-17 Лк 12:8-12

Служба безмездников: 1 Кор 12:27-13:8 Мф 10:1, 5-8

**Чин освящения автомобиля**

Благословен Бог наш всегда, ныне и присно, и во веки веков.

Обычное начало: Царю Небесный..., пс.90

**Господу помолимся**

Господь Иисус наш путь, истина и жизнь, он охраняет нас Своим благословением на всех путях. Вся наша жизнь – Бог, и пусть этот автомобиль никогда не заслоняет вашего пути к Богу, а способствует вашему спасению. Пусть он в ваших руках будет безопасен для себя и для других. Выезжая в путь, не забудьте перекреститься и помолиться Богу, чтобы Он в пути не оставил вас.

**Господу помолимся**

Боже, сотворивший весь мир и даровавший человеку власть над ним и силу его совершенствовать по Твоему предвечному замыслу, благослови, Господи этот автомобиль, чтобы он служил рабу Божию ИМЯ на благо в его трудах и отдыхе.

**Господу помолимся**



Господи Боже, седяй на Серафимах и ездяй на Херувимах, мудростью украсивый человека и благим Твоим промыслом вся ко благу направляй, низпосли благословение на этот автомобиль и на вас, которые будут в нем ездить и представь им Ангела-Хранителя, наставляющего в мире и благополучии путь совершати.

**Господу помолимся**

Молим Тебя, Господи по ходатайству святителя Николая ( и св. ...) и всех святых сохрани всех, кто будет пользоваться этим автомобилем от всяких опасностей для души и тела. Господи, укажи нам путь спасения, укрепи нас Своею благодатию, чтобы мы могли совершать добрые дела, и по скончанию странствия в мире сем наследовать вечное блаженство во Царствии Отца и Сына и Святого Духа.

[по благословению отца Алексия Амбарцумова читается прокимен и Евангелие:

**Прокимен, гл.4:** Благословен грядый во имя Господне, Бог Господь и явился нам.

**Стих:** Яко Той рече, и быша, Той повеле и создашася.

Евангелие от Иоанна гл. 12, 18-27.(Защ.41 от  
полу)]























## Дополнение

### Владимиру Московскому, мученику

#### Елисавете, препод-муч.

##### Тропарь, глас 1

Смирением достоинство княжеское сокрывши, богомудрая Елисавето, сугубым служением Марфы и Марии Христа почтила еси. Милосердием, терпением и любовью себе предпочитавши, яко жертва праведная Богу принеслася еси. Мы же, чтуще добродетельное житие и страдания твоя, яко истинную наставницу усердно просим тя: святая мученице великая княгине Елисавето, моли Христа Бога спасти и просветити души наша.

##### Молитва

О святая новомученицы Российския, великая княгине Елисавето и сестро ея крестовая пречестная инокине Варваро, купно путь свой во мнозех муках скончавшия, евангельския заповеди делом во Обители милосердия совершившия, веры ради православныя подвизающися до смерти в последняя времена сия, и

добрый плод в терпении страстей Христу принесши! Молитесь Ему, яко победителю смерти, да утвердит Церковь Русскую Православную и отечество наше, кровию и страданьями новомучеников искупленная, и не даст в расхищение врагом России достояния нашего. Се бо лукавый враг вооружися на ны, хотя нас погубити в междоусобных бранех, скорбех, нестерпимых печалех, болезнях, нуждах и бедах лютых. Умолите Господа низложить вся немощныя дерзости их; веру в сердцах людей российских укрепите, да егда найдет на ны испытания час, мужества дар восприимем вашими молитвами, отвергшися себе и взявше крест свой, последуем, Христу, распинающе плоть свою со страстьми и похотьми. Сохраните нас от всякаго зла, освятите пути жизни нашея, даруйте покаяние нелицемерное, тишину и мир душам нашим, испросите у Господа всем нам мытарств горьких и вечныя муки избавитися и Небесному Царствию наследники быти со всеми святыми, от века угодившими Богу, да радуящися воздадим хвалу, честь и поклонение Отцу и Сыну и Святому Духу во веки веков. Аминь.

### **Петру и Павлу, апостолам**

Тропарь, гл.4

Апостолов первопрестольницы и вселенныя учителие, Владыку всех молити, мир вселенней даровати и душам нашим велию милость.

Тропарь Апостолу общий, глас 3

Апостоле Святый *Павле*, моли милостиваго Бога, да прегрешений оставление подаст душам нашим.

Кондак Апостолу, глас 4

Яко звезду пресветлую Церковь всегда стяжати, апостоле (*имярек*), чудес твоих многоподаванием просвещаемы. Тем же зовем Христу: спаси чтущих верою память Твоего апостола, Многомилостиве.

Величание Апостолу

Величаем тя, апостоле Христов *Павле*, и чтим болезни и труды твоя, имиже трудился еси во благовестии Христове.

Молитва апп. Петру и Павлу

О преславнии апостоли Петре и Павле, души за Христа предавшии и кровию вашею пажить Его удобрившии! Услышите чад ваших молитвы и воздыхания, сердцем сокрушенным ныне приносимыя. Се

бо беззаконьми омрачихомся и того ради бедами, якоже тучами, обложихомся, елеа же добраго жития обнищом зело и не возможем противитися волком хищным, иже расхищати наследие Божие дерзостно тцатся. О сильнии! Понесите немощи наша, не отлучайтесь духом от нас, да не разлучимся в конец от любве Божия, но крепким заступлением вашим нас защитите, да помилует Господь всех нас, молитв ваших ради, да истребит же рукописание безмерных грехов наших и да сподобит со всеми святыми блаженнаго Царствия и Брака Агнца Своего, Емуже честь и слава, и благодарение и поклонение, во веки веков. Аминь.

Молитва вторая, святому апостолу Павлу

О святыи первоверховный апостоле Павле, не отлучайтесь духом твоим от нас, грешных и недостойных чад твоих, да не разлучимся вконец от любве Божия, но крепким заступлением твоим да защитит и помилует Господь всех нас, зде предстоящих и молящихся и благочестивых тружеников Покровския общины сия. Да истребит рукописание безмерных грехов наших, и да сподобит нас со всеми святыми блаженнаго Царствия и брака Агнца Своего, Господа нашего Иисуса Христа, Емуже подобает честь и слава,



благодарение и поклонение, ныне и присно, во веки веков. Аминь.

### **Молитва новомученикам Российским**

О, святии Новомученицы и Исповедницы Российскойсии: Святителие и пастырие Церкви Христовы, Царственнии Стратотерпцы, благовернии князие и княгини, доблии воины, монаси и мирстии, благочестивии мужие и жены, во всяцем возрасте и сословии за Христа пострадавшии, верность Ему даже до смерти свидетельствовавшии и венец жизни от Него приявшии! Вы во дни гонения лютаго, землю нашу от безбожных постигшаго, на судищах, в заточениях и пропастьях земных, в горьких работах и всяких скорбных обстояниях образ терпения и непостыднаго упования мужественне явили есте. Ныне же, в раи сладости наслаждающесе,

пред Престолом Божиим во славе предстоите и присно хвалу и ходатайство со Ангелы и всеми святыми Троидиному Богу возносите. Сего ради мы, недостойнии, молим вас, святии сродницы наши: не забудьте земнаго отечества вашего, грехом каинова братоубийства, поруганием святынь, безбожием и нашими беззаконии отягченнаго. Умолите Господа Сил, да утвердит Церковь Свою непоколебиму в мире сем многмятежном и лукавом; да возродит в земли нашей дух братолюбия и мира; да паки будем мы царское священство, род Божий, избранный и святыи, присно с вами славящий Отца и Сына и Святаго Духа во веки веков. Аминь.

Собор Новомучеников и Исповедников Российских в этом году празднуется 8 февраля (26 января ст. ст.)